



Ud 5602

37 16 K 190



Belmol. Ud 5602

736091

P O L O N I A

Siue

DE SITV, POEVLIS,
MORIBVS, MAGISTRATI-
bus, & Republica regni Poloni-
ci libri duo.

*Authore Martino Cromero, Coadiutore,
ac designato Episcopo Varmiensi.*

ADIVNCTA EST SACERDOTIS
cuiusdam Poloni, ad lectorem admonitio, de Silesiorum,
nouis annalibus.

Secunda æditio priore locupletior &
emendatior.



COLONIÆ.

Apud Maternum Cholinum.

A N N O M. D. LXXVIII.

Cum Gratia & Privilegio Casareæ Maiestatis.

MARTINVS
CROMERVS CAN-
DIDO LECTORI.



Nte complures annos, poste-
ditum opus id, quod de origi-
ne & rebus gestis Polonorum
conscripsi, cum essem in aula
& ministerio D. Sigismundi
Augusti regis, operæ precium me facturum
esse existimaui, si de situ quoque & natura
terræ Poloniæ, & de moribus, magistratibus,
atque omni Republ. gentis aliquid conscri-
berem, quod quasi clavis foret ad annales il-
los nostrates facilius intelligendos. Et orsus
quidem sum opus, multis nominibus per dif-
ficile: Sed abstractus ab eo eiuſdem regis ius-
sis ad obeundas subinde peregrè legationes:
& in aula optimi Imperatoris Ferdinandi in
septimum annum commoratus, intermisi,
ad finem quidem deductum, sed rude & im-
politū, nec satis fortassis exquisitè conscrip-
tum: Cum amicis tamen aliquot, quales tunc

A ij erat



P R A E F A T I O.

erat, communicavi. Quamuis autem postea plus à publicis functionibus ocij nactus essem, non resumpsi tamen id in manus, siue tædio ac desidia quadam senili, siue alijs curis ac muneribus ecclesiasticis impeditus: cogitabamque id quasi abortiuum foetum intra domesticos parietes sepelire. Sed aliter Stanislao Carnouio Episcopo VVladislauensi viro non solum iuris prudentia, verum etiam elegantiore literatura, theologia, pietate, & omni virtute ornatiss. meique amantissimo visum est. Nam ante annum tertium cum Henricus Valesius (quem non sine præfatione honoris nomino) Francisci Francorum regis F. tunc Andegauensium dux, nunc autem post obitum Caroli fratris Rex Francorum, magno ordinum Regni Polonici & annexarum ei prouinciarum consensu, liberisque suffragijs rex creatus esset, & ad suscipiendum id regnum adueniret, suavit & persuasit mihi Carnouius (cuius ego iudicio plurimum tribuo) vt opus id ipsi offerrem. Fore enim ei gratissimum, & venienti ad oras & gentes

P R A E F A T I O.

gentes sibi incognitas accommodatissimum, vt iam inde à primo quasi limine eas salutans pernosceret, neque diutiùs apud eos populos, quibus præfutura esset, in eorumque republ. peregrinaretur. Obsecundaui: Resuscitaui opus abortiuum: Resumpsi in manus: Recognoui, quoad breuitas temporis, quo rex aduentabat, & negocia muneris mei ecclesiastici patiebantur. Et cum ipse Regi obuiam prodire commodè non possem, obtulit ei munusculum meum ipse Carnouius, qui tunc eum in finibus regni nomine vniuersæ Poloniæ publicè salutabat, & faustum aduentum ipsi gratulabatur. Ex illo autem exemplari castigatiss. descriptum est postea à nescio quo (nec scio an à pluribus deinceps) opusculum. Quod nactus Vechelus typographus Francofurtensis, vt erat descriptum, ita excudit: nempe mendosissimè, non solum proprijs & vernaculis hominum, locorum, & magistratum nominibus, ab imperito quoque Polonicæ linguæ, sed etiam latinis verbis ab illiterato prorsus scriptore deprauatis

q. excudit à
1575. d'appendi-
cis instar adje-
cit Kramtzi
Wandalia.

P R A E F A T I O.

uatis atque corruptis, ita ut à nemine intelligi, à me verò vix agnosci posset. Præfatio tamen loquebatur quasi per coniecturam, à me id conscriptum esse. Cuius ita excusi exemplum cum mihi fuisset exhibitum, puduit me magnoperè, non tam meo, quam patriæ meæ nomine, cui tam mala opera nauata esset: & quo opere illustrari ea deberet, non sine infamîa quasi traduceretur: Misertum est etiam eorum, qui id lecturi essent nō sine iactura temporis & molestia, & pro thesauro, ut est in prouerbio, carbones reperturi. Et cupiebant id Vechelus, & aliquot alij typographi castigatiùs recudere. Proinde non existimaui mihi committendum esse, quin existimationi cum meæ, tum patriæ meæ consulerem, ac tibi, optime lector, iuxta, ac Martino Cholino, nostri studiosissimo, qui nostrarum lucubrationum non minimam partem hætenus excudit, gratificarer. Misi itaque eidem exemplar ita, ut tunc Regi oblatum est, castigatum. Admonendus autem mihi es, candide lector: ne requiras in tali opere

P R A E F A T I O.

Opere puritatem & elegantiam sermonis Latini. Neque enim in eo ab usitatis vulgò verbis, & nominibus vernaculis temerè discedendum fuit, si non quasi per somnium, sed ^{ὕπνα} ut græco verbo utar, id intelligendum, de quo conferendum est. Nonnulla quidem alia, fat scio, requires, nimirum de principe prouincia Lithuania & Lituanis: De Prussis etiam & Prussia, ducali præsertim: Itemque de Liuania, Volynia, Polessia, & magna parte Podoliæ, cuius metropolis est Kiouia: Quæ prouinciæ cum quodam tempore (Liuania excepta) à Polonia ferè abalienatæ fuissent, quemadmodum suo loco à nobis memoratum est, nuper ad eò post conscriptum hoc opus in ditionem Polonorum reuenerunt. Requires & ea fortassis, quæ proximis aliquot superioribus annis publicè in comitijs Polonicis acta & constituta sunt. Sed ea partim non huius sunt operis: partim huius quidem modo sunt, tunc autem non fuerunt, cum id nobis laboraretur, vel certis de causis à me omissa, & alijs scriptoribus, qui exactiùs ea

A iiij nosset,

P R A E F A T I O.

nossent, & conscribere possent, relicta sunt
Supplere autem nunc ea, quæ non iniuste de-
siderari possunt, ætas, & munus mihi impo-
situm prohibent. Non deerunt, spero, qui flo-
rentes annis & ingenijs, emunctioribus iu-
dicijs, & stylo elegantiori præditi, maiore cu-
ra ac diligentia non solum illa residua per-
quirent, persequentur, & attexent, verum eti-
am hæc nostra ornabunt. Tu lector amice,

quæ dantur, & qualia dantur, boni
consules. Vale. Ex arce nostra

Heilsbergensi, Prid. Non.

Januarij. M. D.

L X X V I.

S A C E R -

S A C E R D O S A M I -
C O L E C T O R I.



V M opus hoc non nemine postulante in publicum
proditurum esset, obtulerunt se mihi Gentis Silesiæ
annales cuiusdam, qui se Ligium (etymo nimirum
liguæ suæ Germanicæ) haberi vult è fabulosis campis
Elysijs. Qui quamuis sedulo dissimulare studeat, quo
animo scripserit, & vnde pleraque omnia compilarit, prodit tamen
se se petulans eius malevolentia & maledicentia. Non tam authorem
autem huius operis, & eius, quod est, De origine & rebus gestis Po-
lonorum (quem suppresso nomine immerito nonnunquam per-
stringit) quam gentem Polonam omnem (cui se amicum esse simu-
lat) & res gestas eius deprimere & insectari sibi proposuit. Et tamen
homo modestus & integer contra alienas calumnias sese præmunit.
Non est autem operæ precium, hoc tempore eum refellere, quando-
quidem ipse reprehendit modo nostratia nudis verbis, aut citandis
authoribus non grauisimis, & in sua ipsorum gentisque suæ causa
non minus, quam nostrates ipse iudicat, suspectis, ne utiquam cohæ-
rente sibi alicubi rerum serie. Commone facere tamen te, optime
lector, mihi visum est, vt cogites, quantam fidem habere debeas ei
homini, qui, quem non raro citat Dlugossum, ne nominare quidem
nouit, tantum abest, vt legerit, opusque illud de origine & rebus ge-
stis Polonorum, quod sibi ad mordendum inprimis proposuit,
Dlugossi epitomen esse dicat. Nec animaduertit, homo lepidus, ali-
os quoque authores in eo citari, & Dlugossum nonnunquam repre-
hendi, & leniter refelli. Ad hæc onerat is suspicionibus vniuersæ Po-
lonicam historiam eo nomine, quod à Polonis, & ijs quidem sacer-
dotibus, conscripta sit. Cur autem non iisdem de causis etiam Ger-
manicæ suspectæ sint, à Germanis & ipsæ conscriptæ, & ferè à sacer-
dotibus & monachis? Quod nomen gregalibus istius pseudeuange-
licis longè abominabilius est. Quasi verò non apud omnes populos
peculiaris cura sacerdotum fuerit antiquitus, conseruare publica li-
erarum monumenta, & prodere in publicum res gestas. Et quasi
non maxima fides semper eis habita sit. Idonei scilicet ijs rebus &
actionibus sunt magis coci, vel baiuli, vel lenones, aut certè medici,
quorum ars ferè omnis coniecturalis est, historiæ scilicet inprimis

B

consen.

EPISTOLA.

consentanea. Nec sanè à professione sua iste in erucendis & recensendis Ligiorum & Elyfiorum suorum, & nescio quorum non portentorum, vel, ut ipsius verbis utar, terribilium nominum, quæ ipse maiores suos appellat, originibus vel latum, quod aiunt, vnguem discedit, non rarè ex vna aut altera litera coniecturas captans. Quælia sunt, quòd Suiones, Sidinos, & Sitones, Sueuos vult esse: Nimirum quia in his omnibus nominibus prima litera eadem est: Nortuedos item, quia duæ mediæ v & e, Misnios à Mysis, Lignicienses & Libussenses à Ligijs, Saxones à Sacis deducit: Liouonas Lemonios, propter primâ itidem literam, Silesios Elyfios propter duas, quàmuis interpolatas, esse autumat: Burios, Byrrias Comicos, Brugos, Bituriges, Phryges simili ratione coniungit: Et ne linguarum diuersitas ei obstet, Gotos, (quos etiam cum his eiusdem stirpis esse censet) Gallica, hoc est, Heneta lingua loqui asserit. Quasi non *διὰ πᾶσῶν* hæ tres linguæ inter se differant, si modo Heneti Poloni & Slaui sunt, è Paphlagonia profecti, ut ipsi cum præceptoribus suis Melanchthone & Peucero videtur. Sic nempe ille in præbendis ægroto pharmacis butyrum pro buglossa, aconitum pro acoro fortassis administrat. Cur autem idem Germanos non à Carmanis (Quæ duo nomina non vna aut altera, sed omnibus fermè literis inter se congruunt) potiùs, quàm aliunde deducit? Cur autem mauult tam infirmas & incertas coniecturas, aut verius somnia sua, nulla Sueuicæ linguæ aut cuiusquàm de tribus illis etymologia adstipulante sequi, & excisa olim cum ipsis populis nomina ab orco reuocare, quàm oppidorum, locorum, & populorum nomina non vetustissima, eorumque etyma Polonis & Slauis (à quibus ipse non differtur loca illa habitata, & culta esse) relinquere? Est hoc candoris eius: est eximia scilicet erga gentem Polonam benevolentia. Nemo sanè vel mediocriter peritus linguæ Polonicæ non intelligit, Polonica esse, & Polonicas habere etymologias Suidnicam, Legnicam, Bregam, Glogouiam, Boleslauiam, Gorliciam, Odrum, & penè innumera alia locorum vocabula, eo tempore indita, quo Poloni extirpatis priscis illis istius maioribus eas oras tenuerunt: Slesiam verò & Vratislauiam Boëmica, posterius vsurpari cœpta. Nec scio, an gentilitium ipsius nomen eiusdem notæ sit, à gallo gallinaceo sumptum. Nisi fortè Polonicæ originis cum pudet. Nos quidem eum inuitum nobis

DE ANNAMIEVS SILESIAE

nobis non vindicabimus, ut olim decem Græciæ ciuitates de Hæmero contendisse memorantur. Sit sanè Sueuus, vel Phryx, vel Elyfius, vel Ligius, vel Stygius denique, dummodò Polonis Venedicam Sarmaticamque originem ne inuideat. Sed non est nobis propositum suavis & vnguenta olentis hominis, atque etiam ma (hoc est, valde) theologice ineptias refutare. Rectè autem is & ordine fecit, quòd religionem suam non dissimulauit, & leges historiæ videlicet, non transiit: eademque opera optimum Cæsarem Maximilianum, cui opus illud suum, dedicauit, non idem secum sentientem, vna cum d. Patre, & maioribus, & liberis eius inclytis, non semel impietatis condemnauit. Nimirum hoc sibi proposuit (ut & Sleidanus, & personatus Carion, & Magdeburgenses centuriatores, & alij eiusdem farinae historici) historiæ prætextu virus hæreticum incautis obtrudere. Sed vellem, apertius is nobis explicasset, quemnam in præclaro isto euangelio suo & verbo Dei ducem, vel interpretem cum suis Ligijs & Elyijs sequatur. Non Syvencfeldium, opinor, ciuem suum, licet permultos is habeat sectatores in ea gente, Confessionem Augustanam, ni fallor. Eam verò quamnam? Primæne, an mediæ, an vltimæ æditionis, (Quandoquidem ex diuersa sunt) Siue, ut eam Flacciani, an ut Interimistæ & Melanchthoniani, an ut Calviniani probant? Omnes enim, quamuis admodum dissentientes inter se, & pro hæreticis se inuicem damnantes, eam sibi vendicant. Authoris eius, opinor, & præceptoris sui sensum cæteris anteponit. Piè: Et nemo rectiùs & synceriùs leges interpretatur, quàm qui eas condidit. Sed cum Melanchthon ante mortem suam, & post mortem Lutheri, aliter de præcipuis quibusdam dogmatibus senserit, quàm antea senserat, (quod in confesso est) queram ex isto, primò sine sensus eius sequatur, an postremos? Hos nodos ubi soluerit, tum demum fortassis patiemur nobis persuaderi, nihil eum ne in historia quidem fingere, nihil odio vel gratia deprauare, nihil denique calumniari. Quinetiam non indulgentem affectibus, probabiliora secutum esse. Cæterum leges historiæ eum non transiisse, nullum honestum ordinem fauciare voluisse, Polonicæ nationi amicum esse, ut credamus, ne ita quidem adduci poterimus. De eo verò, quòd ea, quæ mutili, ut ipse vult, Polonici historici omiserunt, ipse suppleuerit (quæ duntaxat alicuius momenti sint) amplius deliberandū censēbimus. Quod si quid eiusmodi proferetur, admirabimur

EPISTOLA.

bimur hominem, è muscis elephantos facientem. Laudabimus etiam acumen oculorum, qui Carpathum montem maiori Poloniae proximum esse perspexerit. Sed non vacat ineptijs diutius immorari. Satis est, lector candide, nos tibi qualem qualem gustum fidei, sinceritatis, & integritatis annalium illorum, subdolè aliena scripta factaque sugillantium, & venena incautis instillantium, præbuisse. Vale.

P O L O.

P O L O N I A E
M A R T I N I C R O M E R I
L I B E R P R I O R.

De situ Poloniae, & gente Polona.



LN ijs libris, quos triginta de origine & rebus gestis Polonorum conscripsimus, ostendimus, Polonos gentem esse Sлавicam, & Sarmaticam: Quae quodam tempore è Sarmatia progressa, transmissa Vistula flumine, in ijs Germania locis, quae prius Venedi & Vandali tenuerant, confederit, finesq; domiciliij & imperij sui versus occasum & Septentrionem longè lateq; protulerit, ita, ut à Sarmaticis montibus in Septentrionem quidem secundum utranque ferè eius fluminis ripam, in occasum verò secundum dorsum Hercyniae silvae, quo Boëmia clauditur, atque inde porro secundum Albim fluvium, ad eius ipsius, atque adeò usque ad Visurgis seu Vesperae ostia, & sinum Venedicum sive Baltheum, quicquid ter-

Polonorum origo.

Poloniae priscae fines

Populorū
nomina.

rarum est, eius gentis ditione teneretur. Ac
 uniuersè quidem eos populos Slauos, seu Slau-
 nos sese dixisse: Afinitimis verò cum Venedos,
 seu Vinidas, tum Vandalos etiam, eorum, qui
 prius ea loca incoluerant, populorum nomini-
 bus appellatos esse: Peculiariter verò, eos, qui
 versus occasum Germanis erant viciniore,
 partim Sorabos, partim Obotritos, Lutitios, si-
 ue Lutzitios, Vinulos, Ranos, Vilzos, Rugios,
 Vetalabos, Retareos, Licicauicos, Heueldos,
 Vuloinos etiam: quod nomen cum Polonorum
 nomine cognationē habet, dictos esse. Quos om-
 nes Slauica nationis atque lingua fuisse, & par-
 tim domesticis satraparum ac ducum defectio-
 nibus & pactionibus, partim armis in finitimo-
 rum Saxonum, & Germanorum ditionem no-
 menq; postea transisse memoria proditum est.
 Polonorum autem nomen vernaculum an com-
 mune fuerit horum omnium, an peculiare uni-
 us cuiusdam populi: & vetustimne, an recenti-
 us, non liquet. Ante septingentos quidem annos,
 nusquam in annalibus vllis externis id inuenio.
 Nec unum eius etymon memoratur, quemad-
 modum

Polonorū
nomen.

M A R T. C R O M. L I B E R I. 3
 modum alibi ostendimus. Nonnulli enim à Le-
 cho, seu Lacho, duce Polachos, quasi posterita-
 tem Lachi dictos esse: Alij verò à campestri pla-
 nicie, quam incolunt, vel à venationibus, qui-
 bus impensius delectantur, Polacos & Polanos,
 mutataq; una litera Polonos, & ab ijs regio-
 nem Poloniam appellari volunt. Eius autem
 non idem semper fines fuere. Nam Russia per-
 magnam partem cum Podolia subactam, & Polonia fi-
nes acciti
& prolati.
 Prussia nonnullam, & Polessensem tractum
 barbaris lazigibus siue lazuingis ademptum
 quodam tempore, Poloni suo adiecerunt impe-
 rio. Præter illa autem dudum memoratorū à me
 populorum occidentalium detrimenta, posteri-
 ori tempore Silesia ferè omnis Polonis sese sub-
 duxit, & Pomerania Cassubiq; reliqua magna
 pars detracta est. Decefferat & Russia Podolia-
 q; pars magna, & Volynia, & Polessensis tra-
 ctus. Culmensis quoque ac Dobrinum, & Ma-
 souia ferè. Sed hæc prouincia his duobus, non am-
 plius, seculis recuperata sunt: Recuperata est eti-
 am nonnulla pars Silesie & Cassubie, Pomer-
 niaq; ea, quæ nunc Prussiam continetur. Rursus

tamen Lithuani, securis fœdore & societate ipso-
rū Polonis, Polessensem tractum ferè omnem, &
Volyniam, & magnam partem finitima ei Rus-
sia & Podolia auorum nostrorum memoria, re-
gibus vel fauentibus, vel coniuuentibus, ad se
reuocarunt, quemadmodum suo loco exposui-
mus. Sed ij populi nuper adeò extremo regni Si-
gismundi Augusti tempore, cum hoc opus nos ad
finem perduxissemus, relictis Lithuanis, ultro
in ius & ditionem Polonorum a quo fœdere pror-
sus uenerunt. Quin & Lithuani ipsi, exemplum
secuti, sese cum Polonis, renouato & ampliato
antiquo fœdere, coniunxere. Instituta tamen
sua, & magistratus, & Iurisdictionem peculia-
rem retinere. Caterum nos quemadmodum il-
la superius recensita Polonia detrimenta in hac
descriptione præteruimus, ita modo commemo-
ratas accessiones cuiuspiam alijs operi reserua-
mus, alijs iam distenti studijs, & occupationibus.
Nec Liouoniam attingimus, cuius à vicinis
principibus miserè discerpta maxima pars ante
pauculos annos in ditionem eiusdem regis uenit.
Ne Prussiam quidem ducalem exactius descri-
bemus

Lithuani
se cum Po-
lonis con-
iunxere.

Quatenus
describitur
hic Polo-
nia.

Prussia du-
calis.

Hist. lib. 27.

bemus. Licet enim ea iustis armis repressa ac do-
mita, ex fœdere maiestatem regis Poloni à cen-
tum amplius annis comiter agnoscat, neque lin-
guam tamen, neque instituta & leges Polono-
rum accepit. Sed deletis penè priscis Prussis, à
Germanici sanguinis hominibus habitatur &
regitur: ea parte excepta, quæ finitima est Maso-
uia: Quæ à Polonis colitur antiquitus, & Polo-
nicis ferè iuris olim fuit. Nec citerioris autem
Pomerania partem eam, in qua est oppidum
Lemburgum, & arx Bythouia, complectemur,
propterea, quòd ea beneficio regum superiorum
in ius ducum ulterius Pomerania transijt.
Quo nomine sunt tamen & ipsi beneficiarij re-
gis Poloni, iurantq; ritu solenni in uerba eius,
quemadmodum & dux in Prussia, & ante eum
nostra memoria creatum, Magistri cum primo-
ribus ordinis Crucigerorum, seu Teuthonico-
rum Sanctæ Mariæ militum, cum eius prouin-
cia dominarentur, iurabant. Valachiam quoq;
prætermittimus: quæ fuit & ipsa intra hos du-
centos annos in clientela regum Polonorum, sed
suis legibus, sua lingua, suisq; ducibus utens, qui
Voieuoda seu Palatini dicuntur. Qui duo pri-

Lembur-
gum & By-
thouia.

Pomeraniæ
duces Va-
sali regis
Poloniæ.

Pruss. dux
& magistri
Vasalli Po-
lonorum.

Valachia
& partes
eius.
Hist. lib. 15.

6 POLONIAE

mum fuere, Transalpinensis, & Moldauicus quorum hic à nostratibus peculiariter Valachia Palatinus dicitur: ille verò Multanicus. Verum extitit postea tertius Bessarabicus ad pontum Euxinum, diuiso inter fratres principatu Moldauico. Ac Bessarabia quidem iam pridem subacta est à Turcis: Reliquarum autem duarum Palatini & ipsi iam dedititij sunt eiusdem gentis, patrum, auorum, & proauorum nostrorum memoria in verba regum Polonorum, nonnunquam Vngaricorum quoque, & ipsi iurare soliti. Nunc igitur Polonia, quae quidem uno regno & iure continetur, quatenus à nobis describitur, secundum longitudinem terra habitabilis, è sententia geographorum, & imprimis secundum deliniationem amici mei Venceslai Grodecij, à tricesimo octauo gradu, ad quinquagesimum secundum, vel tertium (incerti sunt enim in illa solitudine Scythica fines eius) ab occasu aestiuo versus ortum hibernum obliqua protenditur, amplius quàm per ducenta milliaria Polonica: quorum unum quodq; quatuor Italica in se continet. Tametsi Russica & Podolica sunt aliquantolongiora. Quin certis literarum monumentis doceri

Bessarabia.

Hist. lib. 3.

Valachia
in clientela
Polonorum.

Poloniae
fitus geo-
graphicus.

Longitudo

Milliaria
Polonica
& Russica.

MART. CROM. LIBER I. 7

doceri potest. Ociacouiam arcem ad ostium Boristhenis 54. gradu longitudinis sita, aliquando in ditione Polonorum regum fuisse. Latitudo autem Polonia, quae maximè Orientalis, & quae Occidentalis est, triginta plus minus milliariorum est. Et Occidentalis quidem habet imam polielevationem quinquaginta duorum summam 54 grad. & 40. ferè minorum. orientalis verò summam quidem 51. ferè, imam autem graduum. Pocucensis tamen Russia tractus à quadragesimo octauo incipit. Caterum in medio, quae latissimè centum miliaribus patet Polonia, & cum in meridiem paululum recuruatur, tum in septentrionem magis ad mare Balticum seu Venedicum, & secundum extremam oram Masouiae dorso prominere, imam quidem poli elevationem habet in ora Scepusij quadraginta nouem grad. summam verò in litore maris, & in Puscensi ora quinq; ferè, & quinquaginta: ita ut figura eius intensi arcus speciem praeseferat: cuius neruus paululum reductus, ad meridiem & occasum hybernium quaedatenus spectet, exterior verò curuatura in septentrionem, & ortum aestiuum obuersa sit. Quod si quis nouas accessiones Polesia, & ei confinis Russia,

Latitudo
Poloniae

Figura.

Poloniae
regni am-
plitudo.

8 POLONIA

Volynia, Podolia, & Liuania, Prusiamque du-
 calem, & Lithuaniam cum sua Samogitia, &
 Russia alba Moschis finitima (qua omnia iam
 uno regno continentur) annumeret, multò lon-
 gius & latius versus orientem solem, & Septen-
 trionem ea patebit. Ad Nieprum enim sita sunt
 arces & oppida, Kiouia, Canionia, & Circassi,
 ultra 54. gradum longitudinis. Prussia verò
 ducalis & Samogitia latus Septentrionale quin-
 quagesimum sextum, finitima autem Russia al-
 ba 57. gradum latitudinis attingit. Porro conti-
 nens his Liuania, quatenus cum duce nouo Cu-
 ronensi, siue Curlandico (qui partem eius non-
 nullam obtinet) regis Poloni Maiestatem ag-
 noscit, 61. gradum excedit. Atque ita longitudo
 regni Polonici à finibus Marchia Brandebur-
 gensis ad Nieprum ducta recta linea non minus
 240. milliaria complectitur, si 15. milliaria uni
 gradui respondent: Latitudo verò ab ora Pocu-
 censi ad Pernauiam Liuania ducenta plus mi-
 nus. Cingitur autem Polonia, sicut eam nunc cir-
 cumscribimus, ab occidente sole incipientibus,
 Marchia Brandeburgensi, & Pomerania vlte-
 riore: A Septentrione mari Venedico & Sar-
 matico

Curonien-
 dux.

Finitimi
 Poloniarum
 populi.

MART. CROM. LIBER I. 9

matico: Cuius aduersa litora tenent Sueones si-
 ue Sueti. Inde Prussia ducali, eiq; continente
 Lithuania in ortum aestiuum ferè vergente.
 Hinc porrò campestribus Scytharum siue Ta-
 tarorum solitudinibus prorsus Orientalibus, &
 flexa in Euronothum Bialogrodensi Turcarum
 ora. Inde verò planè Australi Valachia siue
 Moldauia: Deinceps Vngaria, & in Africum
 & occasum hybernum obuersa Silesia Boëmica
 ditionis, ad Marchiam pertinente. Et à Silesia
 quidem, & Marchia, & Pomerania vltiore,
 & Lithuania palustres densaq; silua eam ferè di-
 rimunt: Mare à Suetia: Ab Vngaria verò syl-
 uestrium montium cacumina: itemq; ab Occi-
 dentali parte Moldauix. Nam à reliqua Mol-
 dauia, quæ in ortum & ad Pontum vergit, Ne-
 ster fluius eam & finitimam ei Podoliam diui-
 dit: Idemq; nisi fallor, limes est eius ipsius Podo-
 liæ cum Bialogrodensi Turcarum ora, vt Nie-
 per & Ponti Euxini sinus cum Tataris Ociaco-
 uensibus: Aut certè cum vtrisque incertus is
 est, vt diximus, propter vastitatem, & solitudi-
 nem. Equa solitudine pensitant tamen opiliones
 Turcici regi Polono vectigal pascuorum nomi-
 ne.

Limites.

ne. Prussia verò ducalis sic est implicata regia (hoc enim nomine à ducali seiungenda est) difficulter ut queant distingui. A Masovia silux eam dirimunt. Partes insigniores Polonix sunt, Maior & minor Polonia, Russia, & Prussia regia, Podolia, Masovia, & Cuiavia. Quæ & ipsæ deinde satrapijs, vel, ut vulgò loquuntur, palatinatibus, ac territorijs ferè distinctæ sunt. Maior Polonia duas satrapias, nimirum Posnaniensem, & Calisiensem complexa, Occidentalis est Silesiam, Marchiam, Pomeraniamq; ulteriorem meridionali, occiduo, & Arctoo latere attingens. Magis autem ad Occidentem vergit Posnaniensis satrapia, Calisiensis contra ad ortum & septentrionem: qua parte sunt Paluci, Craina, & Cassubia, tractus terræ non contemnendi. Minor Polonia orientalis est, Cracouiensi, Sendomirensi, & quæ huius pars quoddam fuit, Lublinensi satrapijs definita, hoc ipso ordine quo nunc sunt enumeratæ, versus Aquilonem & ortum æstiuum sitis. Quæ à septentrione Masovia & Polesse tractui, qui dudum Lithuanicæ ditionis erat, ab ortu Russiæ, à meridiè verò Vngariæ, & Silesiæ finitima est. Sunt autem Satrapix Cracouiensis

Polonia partes & satrapia.

Maior Polonia, Posnaniensis, & Calisiensis satrapia.

Paluci, Craina, Cassubia. Minor Polonia. Cracouiensis, Sendomirensis, & Lublinensis satrapia.

uiensis partes, tractus Sciricius, & Submontanus, uterq; Scepusio & Vngaria finitimus. Ac Sciricius quidem ad occidentem vergens, Cracouiæ vicinior est: Submontanus verò Russiæ & Sendomirensi satrapix iungitur. Lublinensis ite satrapix pars est Polesse reliquæ, quæ à Lithuanis detractum non fuit, utrunq; à siluis ita dictum verius, quàm Podlasse dialecto Russica, quasi Polonix finitimum. Nisi quis fortè Podlasse Polonis subiectum interpretari malit. Silesiæ pars ea, quæ adhuc est Polonicæ ditionis, sic implicata est Cracouiensi satrapix, ut ab ea magna ex parte ambiatur. Satrapia ea nullam habet: Sed in Cracouiensi ferè censetur: Habet autem tria territoria, Osuëcimense, Zatorienese, & Seueriense, quorum duo priora superiori tempore suos habuerunt duces: Nunc prefecturæ Regiæ sunt. Seueriense est in ditione Episcopi Cracouiensis. Meridionale & Occidentale latus eius ipsius Silesiæ: cetera tenet Silesia Boëmicæ ditionis, nempe Cessinensis, & huius pars quondam Pelcinensis, Ratiboriensis item & Opoliensis principatus, siue ducatus, ut vocant. Ab ortu verò hiberno Scepusioensem tractum vix & modicè ea attingit.

Sciricius & Submontanus.

Polesse seu Podlasche.

Silesia.

Scepusium

Hist. lib. 5.
& 17.

Est autem Scepusium non exiguus terræ tractus, olim cum Polonici iuris esset, ad Vngaricum traductus: de quo alibi suis locis attigimus. Deinde verò nonnulla pars eius, cum tredecim oppidis & arce Liblio, siue Lubouulia rursus Polono regi certo pacto ab Vngaricis Regibus addicta est, atque etiam nunc ab eius præfecto, & eius nomine administratur Cracouiensi satrapia, tractuiq; Sciricio versus meridiem adiacens. Inter minorem verò & maiorem Poloniam primarias totius Poloniæ partes intermediæ sunt Satrapia, Siradiensis, Lenciciensis, & Rauensis, nullum commune nomen habentes. Quarum prima ad meridiem & Silesiam, Lenciciensis & Rauensis ad septentrionem vergunt, Masouiamque attingunt. Harum autem occidentalior est Lenciciensis. Nonnunquam ex tres unà cum Cuiavia, imò & Masouia, maiori Poloniæ, sicut Russia & Podolia minori, accensentur. Cuiavia verò ab ortu Masouia & Rauensis satrapia, à meredie Lenciciensis & Calisiensis iungitur. Continet autem in se duas satrapias, Brestensem, quæ magis ad ortum, & meridiem vergit, atque In-vuladislauiensem, siue Iuni-vuladisla-

Siradien.
Lencicien.
& Rauen.
satrap.

Maioris &
minoris
Poloniæ
appellatio-
ne que cõ-
tineantur.
Cuiavia.

Bresten. &
Inovvladis-
lauien. sa-
trapia.

ladislauiensem, quæ magis est occidua & septentrionalis. Cuius non exigua pars est Dobrinum, ultra Vistulam, ab oppido sic dictum, latere orientali confine Masouia: septentrionali verò Prussia. Masouia quoque eodem latere Prussia, Orientali Lithuaniam & Polessensem tractum, & versus ortum hibernum Poloniam minorem, eiusq; satrapiam Sendomiriensem, Meridionali verò Rauensem attingit. Duabus satrapijs distincta, Plocensi nimirum, quæ Occidentalior est, & ea, quæ peculiariter Masouia nomen retinet, propterea quòd diutius ducum suorum (de Polonorum principum stirpe oriundorum) dominatu segregata, postrema omnium nostra memoria defecta ducibus, ex pactis, & iure feudi, ut vocant, Polonia redintegrata est. Quæ quidem Orientalis est. Rauensis quoque satrapia quòdam pars Masouia fuit, suosq; duces habuit, sicut & Plocensis, & pleraque omnes. Prussia Regia præter meridionale latus, quod iam est expositum, ab occasu ulteriores Pomeraniam confinem habet. A septentrione sinu Baltheo seu Venedico, siue Codano, Ab ortu Prussia ducali cingitur. Tribus autem satrapijs distincta

Dobrinum

Masouia.

Plocensi &
Masouia
satrapia.

Prussia Re-
gia.

Culmensi.
Marienburg.
S. Pomeraniae.
satrap.

distincta est, Culmensi, Marieburgensi, & Pomeranica. Quarum haec Occidentalis est. Reliqua dua Vistula flumine ab illa dirempta, orientales. Ex his autem Culmensis ad meridiem spectat, Marieburgensis verò ad Septentrionem.

Varmia.

Varmia, & ipsa pars est Prussia Regia, ad Aquilonem seu Euroaquilonem vergens, ducali ferè undique cineta & ab ea quodam tempore maiorem in modum accisa: Marieburgensem quoque satrapiam contingit: Nec in ulla satrapiacensetur, subiecta episcopo suo, & sacro Ecclesiae eius collegio, Regis Poloni Maiestatem agnoscentibus. Michalouienense autè territorium est in satrapia Culmensi Masouia ac Dobrino finitimum: olim pars Masouia. Ducalis Prussiae (ut

Michaloui
en. tractus.

Prussiae
du.
sahe.

eam quoque magis perspicua sit haec Polonia descriptio, hic obiter attingamus) praeter Regiam Prussiae, limes est à septentrione mare Sarmaticum cum Lacu Curoniensi, & ora Liuania: Ab ortu Samogitia, ceteraque Lithuania: A meridie verò Masouia. Satrapiam ea nullam habet: praefecturas per multas. Olim Prussia priusquam sub iugum Christi missa est, alios fines habuit, & aliter diuisa fuit. Fuit autem ea decem re-

Prussiae
vetus
diuisio.

gioni-

gionibus siue tractibus descripta: videlicet Pomesaniensi, in quo est Marieburgum, Christi-
burgum, Quizinum siue Marieuerderum: Pogesaniensi, in quo est Elbinga & Hollandia: Erminio siue Varmienensi, qui retinet etiam nunc in lingua Germanica vetus nomen, & Ermeland vocatur: Natagino, ubi est Balga, Brädemburgum, Cruciburgum: Sambienensi, in quo sunt mōs regis siue Kænixberga & Lochstete: Nadrauen-
si, quo Tapelaunca, Insterburgū, & Vonsdorfia cōtinentur: Salauenensi, in quo est Ragneta & Labia: Sudino, qui & ipse nomen suū retinet, & ad aquilonem ortumque astium inter utrunque, Habum & mare longè pminet: Bartheno, quo Rastenburgum, Barthesteinū, & Resla siue Reselia cōtinentur: & Salindo, qui nescio an is sit, in quo Galindas populos ponit Ptolemæus. In his Sudin tractus fuit primarius, opibus & viribus maximè pollēs, ita ut ad sex millia equitum, peditum etiā ingentem numerum cōficeret. Ceterorum quilibet minimū ter mille equites, peditū verò decem millia cōficere potuit, si vera sunt ea, quae nos in vetusto quodā libro Germanica lingua scripto legimus. Ceterū Culmensis tractus & Pomerania,

Russia Re-
gia, siue ru-
bra.

Polonia non Prussia partes fuere. Sed nos cetera
prosequamur. Russia, quam rubram nonnulli
vocant, latere occidentali minori Polonia iun-
gitur. A septentrione Russiam albam, & Voly-
niam habet: Ab Austro Vngariam, eiusque po-
pulum Ceculos, & nonnullam Moldaviae par-
tem attingit eo tractu terra, qui Pocuce appel-
latur. Nam cetera Moldavia siue Valachia,
qua Podolia quoque iungitur, magis est Orien-
talis Russiae. Continet Russia duas satrapias,
nempe Belsensem, quae ad Volyniam & Lithua-
niam vergit & eam, quae peculiariter Russica
& Leopoliensis dicitur, australem magis & ori-
entalem: Nisi quod Chelmensis tractus eius non
exiguus ad septentrionem, etiam ultra Belsen-
sem prominat, & Polesiae finitimus est. Reliqu-
um autem orientale latus eiusdem Russiae, ac to-
tius Polonici regni claudit Podolia, ab Aquilo-
ne & Euro albae Russiae, à cetero ortu vastis cam-
pis Tataricis atque Turcicis, ut diximus, à
meridie verò Moldaviae continens: Totaque
vna satrapia censetur, quam Podolicam vo-
cant. Olim Podolia & Russia tam ea, quae nunc
Poloniae pars est, quam ea, quae est in ditione
Lithuano-

Podolia.

Lithuanorum & Moschorum, suos habuit du-
ces, quemadmodum luculentius ostendimus in
historia: Quorum stirps cum latè propagata es-
set, partim ipsa sese intestinis dissidijs atque civi-
libus bellis confecit, partim à Polovucijs, qui
Goti fuisse videntur, ac Tataris extirpata, par-
tim Polonorum & Lithuanorum adiuncta est
imperio, partim in nomen & ius de se ortorum
Moschorum transijt. Extant etiam nunc per-
multi, ducale nomen, sed plerique nudum prope-
modum & inane retinentes: Inter Polonos ve-
rò nulla ducum superest memoria. Hi nunc sunt
Poloniae, quatenus hic eam descripsimus fines:
hae partes. Est autem regio tota ferè plana & a-
prica, maximè quae ad occidentem solem & sep-
tentrionem vergit, & quae penitus orientalis est
Podolia, ac vel nomine ipso decliuitatem pre se
fert, vicinorū Moldaviae, Russiae & Vngariae mō-
tanorum intuitu. Minor Polonia itidem atque
Russia, quo propius accedit ad fines Vngariae,
hoc magis montana est, & sylvestris. Quo lon-
gius autem inde recedit, eò lenius decliuus est, ma-
gisq; culta & meliore gleba. Tamen si in medi-
tullio quoque Sendomiriensis satrapia aliqua

Ruffi duces

Hist. Pol.
lib. 3.

Polovucij
Goti

Solum Po-
lonicum
quale.

Podolia
vnde dicta.

ex parte leniter montosa seu verius cliuosa est. Prussia pleraque omnis excepta Marieburgensi satrapia, qua ad Habum & mare vergit collibus molliter & adfertilitatem, amœnitatemq; commode distincta est. Itemq; pars nonnulla Cuiavia. Montes Sarmatici, qui Poloniam & Russiam ab Vngaria dirimunt, ardui & syluestres, non ignoti sunt etiam veteribus Geographis & Historicis: & in his celebris est in primis Carpathus, quem nos Crempacum, ni fallor, vocamus: Alij Biesciadi, Modra, Turza, Vapienna, vernacula lingua appellari, externis ignoti sunt. In medietate verò minoris Poloniae Lysecius est, quasi tu dicas caluum, siue caluastrum, in quo monasteriorum est S. Crucis nomine lignoq; celebre: & Vauelus, arce Cracouiensi, quam suo ipsius nomine nobilior, & is, in quo situm est Cienstochouiense monasterium, quem clarum latine Monachi, ni fallor, incolae appellauerunt. Syluestris sanè fuit superioribus temporibus pleraq; omnis Polonia: Ex eone autem tempore, ex quo habitari coepit, an postea pestium, bellorumq; in commodis eo redacta, non liquet. Sed Sigismundi senioris, filijq; eius Sigismundi Augusti optimorum

Montes
Polon.

Vbertas.

rum & mitissimorum, sapientiumque regum studio diuturnam pacem nacta, nunc ubique diligenter excolitur, frugum leguminumq; ferax, & pratis abundans. Nec tamen deest etiam nunc sylvarum copia. Neque enim ea penitus exciduntur & extirpantur, partim propter pascula & mellificia, partim propter ædificiorum materiam, & ligna mitigando frigori utilia ac necessaria, partim etiã propter saxosi, vel arenosi soli sterilitatem. Sunt autem sylvae pleraque piceæ, quernæ, fagineæ, & abiegnæ: Ac piceæ quidem ferè in planis & arenosis locis, abiegnæ & fagineæ in montanis, quernæ in utrisque, sed vberiore gleba præditis. Multa sunt etiam in planis iuxta ac montanis locis mixtim omni genere arborum referta, & pasuis optimæ. Ex his abietes, tilix, picea, quercus, apum aluearijs grauida sunt, materiamq; ædificijs nauium ac domorũ, malis, tabulis, & vasis aptam, ut & taxi & terebinthi, suppeditant. Quercus & fagi etiam pastum vberè porcis ferisq; præbent: Omnes autem focorum, & fornacum, furnorumq; ignibus alimenta subministrant. Tãta est enim vis frigoris in his regionibus interdũ, ut radicitus arefcant

Syluæ.

Frigoris &
gelu vis.

arbores, & aqua ex editiori loco effusa, priusquam terram contigerit, in glaciem concrescat. Lacus quidem & paludes & flumina duobus tribusve mensibus hibernis, nonnunquam autem vel in quintum ac sextum usque glacie concreta, non modo peditibus, verum etiam equitibus & curribus ac plaustris, quamuis oneratis, multis simul longo spacio peruia & secura praebent itinera. Equidem quodam tempore ultima die mensis Martij Vistulam in Masovia per firmam adhuc glaciem cum curru & quadrigis, & aliquot equitum comitatu transiit. Hac etiam praeterita hyeme in Prussia glacialis piscatio in lacubus post initium Nouembris coepta, durauit per totum Martium: gelu autem per totum Aprilem. In tanta autem caeli intemperie pomaria tamen sunt non infrequentia, & fructuosa, ad Vistulam praesertim, & in suburbanis Cracouiensibus, Sendomiriensibus, Varsauiensibus, Torunenensibus, Gdanensibus: Elbingensibus item, Fraumburgensibus, Veliscensibus & Bochnensibus, licet remotioribus à Vistula, totoque tractu submontano atque Sciriciensi. In quibus pirorum, malorum, prunorum, persicorum

Pomaria.

rum, cerasorum, & nucum bonitas & varietas certat cum Vngaricis & Italicis. Sunt & vites, quarum vna in minore Polonia esui quidem non insuauis sunt, praesertim si aestas & autumnus temperiem suam seruent: sed vinum inde expressum acerbius, ubi defecatum est. Aliquanto suauius & copiosius exprimitur apud Crofnam Silesiae in finibus maioris Poloniae. Apud Toruniam quoque in Prussia vineae coli coepere non infeliciter, ut audio. Neque negat solum Polonicum castaneas, mora, cotonea, ficus, amigdalas, pepones, melopepones, herbas & flores omnis generis, & alias hortenses Italiae delicias, & palatinariumque lanocinia, si adhibeatur culture diligentior, & à gelu custodia. Nec metalla fossiliaque desunt in montanis: plumbi quidem intermixto argento apud Ilcussum, Slauuconiam, Chranouiam, & Nonagoram oppida satrapiae Cracouiensis, & in finibus Silesiae: Argenti viui apud Tustanum in Russia: Aëris & Lazurij, & plumbi item apud Chencinos: Ferri plurimis in locis syluestribus: Nitri apud Visliciam & alibi: Salis apud Bochnam & Veliscam in satrapia Cracouiensi, & apud Haliciam, Colomeiam,

Vineae.

Metalla.

Salinae.

E lomeiam,

lomeiam, Solum (quod quidem à sale nomen habet) & alijs compluribus in locis Russia. Ac in Russia quidem id ex aqua ex profundis puteis hausta decoquitur, & partim in modum farine vel niuis minutum relinquitur, partim in frustula conformatur: In tractu verò Cracouiensi, partim lapidea duritie solidum instar ingentium saxorum & rupium in subterraneis specubus, altè lateq; excavatis, & villas, templa, oppidaq; superaedificata sustinentibus, ferro excinditur, comminutumq; deinde, & mola tritum, ad usus hominum accommodatur, partim & ipsum ex aqua iniectis lapidei salis frustulis & quisquilijs, qua secantibus id abraduntur, decoquitur. Color lapidei in massa liuidus est ferè, ac luto respersus. Candidum, & in modum cristalli pellucidum rarius est. Tritum candet aliud alio magis. Coctum verò despumatis sordibus candidissimum redditur, niui non dissimile. Fertur in salinis Bochnensibus reperiri quiddam picis concretæ simile, quod vocant carbunculum: Quod tritum & epotum soluat aluum. Ibidem exaudiuntur nonnunquam canum, gallorum, & aliorum animalium a simulatæ voces.

in profundissimis specubus: idque mali & incommodi alicuius imminentis portentum vulgò habetur. In maiore quoque Polonia apud Pincum saline sunt, verum tenuiores. Sunt etiam in confinio Osuencimensis territorij & Scepusij aqua salsa, unde salem coctum vidimus regi exhibitum. Saline tamen nulla sunt. Porrò in desertis Podolia, & Boristheni vicinis locis lacus est, cuius aqua sereno & ardente sole in solidum salem concrescit, ita ut homines cum iumentis & curribus in eo, tanquam in glacie, versentur, sectumq; in frusta arbitrato suo auerant. Quamprimum autem pluit, soluitur illa glacies non sine periculo insistentium. Apud Biezzum verò siue Beciam oppidum in submontana regione, vitreolum effodi, ac in viridem lapideamq; duritiem decoqui nupercepit: Copperuasser, hoc est, aris aquam Germani, & nostrates item appellant. Antiquitus autem id conficitur ad aris metalla in Scepusio. Marmor quoque & alabaster quibusdam locis effodiuntur. Est in maiore Polonia prope Sremum oppidum collis, ubi (res incredibilis, sed à multis confirmatur) ollæ, amphoræ,

Lacus salis in Podolia.

Vitreolum.

Ollæ spon-
te nascentis.

cacabi, & aliarum figurarum vasa fictilia spon-
 te nascuntur, & sub terra effodiuntur mollia, in
 aërem autem prolata durefcunt. Vidi unum at-
 que alterum, quod inde erutum esse dicebatur,
 rude, nec satis bene conformatum. Porro in ma-
 ri Sarmatico Prussiam alluente colligitur suc-
 cinum. Succinum. (Ambram etiam externi vocant) Quod
 fluctibus appulsum ad litora, homines nudi ob-
 uiam euntes paruis retibus excipiunt & extra-
 hunt, molle primum, sed mox in aëre durefcit,
 tornosq; ac scalpro varie conformatur. In lacu-
 bus quoque nonnullis à mari remotioribus id
 reperitur: ut in Pissia Episcopæ Varmiensis,
 modicum tamen. Quin & in editioribus locis fos-
 sa altius humo fertur inueniri. Spumane maris
 concreta id sit, an succus & guma arboris, an
 quippiam aliud, non est huius loci disputare. Est
 sanè leue & pellucidum: Est que fuluum & can-
 didum: Candido maius precium. Ferunt, si in-
 cendatur, odore eius venenata necari. Visuntur
 in nonnullis frustulis formicæ, muscæ, culices &
 alia insecta, non arte, sed vel opificio nature, vel
 fortuitis casibus inclusa. Fluuij Aquis irrigua est ple-
 raq; omnis Polonia, sed fluuios nauigabiles non
 multos

multos habet: Præcipui sunt Vistula, Donaieci-
 us, Sanus, Nieper quasi quis dicat Porcū, Varta,
 Notessius, Nester, Prutus, Bugus, Bobus siue
 Bogus, Pripetius, Narua, Dreuancia. Nam O-
 dra, in consinio Morauix & Silesix existens, &
 per hanc secundum Polonix litem, perque
 Marchiam ac Pomeraniam vltiorem perme-
 ans, infra Scecinum in Venedicum sinum decur-
 rit. Olim intra fines Polonix tum oriebatur, tum
 decurrebat. Nieper Russiam albam, eiq; confi-
 nem Podoliam alluens, longo tractu in pontum
 Euxinum apud Ociacouiam munitionem Ta-
 taricam sese exonerat, ortus in Moschouia. Bo-
 risthenes is est veteribus Græcis & Latinis, om-
 nium scriptorum consensu, præter Bernardum
 Vapouium. Qui similitudine nominis, ut credi-
 bile est, adductus, Boristhenem vult esse Berezi-
 nam: qui in Nieprum ab æstiuo occasu influit,
 minor eo & ignobilior. Vistula in Cessinensi ora
 è Sarmaticis montibus exoriens, versus æsti-
 uum occasum & septentrionem primum, mox
 versus orientem aliquantis per, deinde à Sendo-
 miria versus septentrionem rursus per mino-
 rem Poloniam decurrit. A Varsavia verò rur-
 sus

Odra.

Berezina.

Vistula.

sus ad occasum equinoctialem, & mox aestiuum flexus, Masouiam interluit: Dobrinumq; à reliqua Cuiavia dirimit. Vbi autem Prussiae fines attigit, in septentrionem reflexus, deinceps mediam eam diuidit. Supra Marieburgum autem in duos alueos praetis aggeribus obiectis sectus, insulam insignem & fertilem, quam Zuluam maiorem vocant nostri, efficit, & nomen amittit. Ac sinister quidem alueus, qui maior est Leniuuca, dexter verò Nogatus vocatur: Quorum hic in Habum lacum tribus ostijs, ille verò duobus partim in eundem Habum, partim in mare infra Gdanum sese exonerat, longitudinis quidem gradu 41. latitudinis verò 54. Fontes autem Vistula sunt longitudinis itidem 41. gradu, latitudinis 49. minuto 20. Fluens autem amplius centum milliarium Polonicorum spacio Vistula, Solam, Premsam, Scauam, Donaiecium, Vislocam Ropa auctam, Nidam, Sanum, Vieprum, Pilciam receptis Dreuicia & Volboria, Bsuram, Naruam cum Bugo, Dreuanciam, Berdam, Ossam, & Motlauiam minora flumina excipit: & Osuencimum, Zatoriam, Cracouiam, Całimiriam, Sendomiriam, Varsa-

Flumina
Vistulam
in fluentia.

Urbes oppida & arces ad Vistulam sitae.

Varsauiam, Ploscum, Vladislauiam, Toruniam, Culmam, Grudentum, Quilinum, Nouum, Gneuum siue Metam, Marieburgum, Dersauiam, & Gdanum vrbes & oppida non ignobilia praeterfluit. Arces item Lipoueciam, Nepolomice, Corcinum Zauichostum, Ceruenscum, Monasterium, Zacrocinum, Vissegradum, Sochaciouiam, Dobrinum, Bobrovnicos, Racianzum, Sluzouiam, Dybouiam, Niessouiam, Starigradum, siue Althausum, & Suece, & adherentes eis vicos alluit. Donaieci-^{Donaieci?} us (quod nomen paruum Danubium significat) ex eisdem Sarmaticis iugis non longè à Vistula fontibus paulò orientaliore exortus, per Scepusium & Submontanum tractum decurrit, Sortenumque & Mussinam, & Melstinum arces & Sandeciam oppidum, ubi Popruto augetur, ^{Popruto.} praeterlapsus, non longè ab Opatouecio vico Vistula miscetur. Sanus è Biesciadis iugis longitu-^{Sanus.} dinis gradus 44. latitudinis 48. minuto 30. nascens, & versus septentrionem & occasum aestiuum profluens, posteaquam Liescum, Sobenum, Sanocum, Brozouiam, Praemisliam, Radimnum, Iaroslauiam, Lezeis-

Lezeistum, Russiæ arces & oppida prætergressus est, Vislocumq; alium à Visloca, & viarum minores fluuios in se recepit, apud Sendomiriam oppidum longitud. grad. 44. ferè, latitud. 50. minuta 30. Vistulam & ipse subit. Varta apud Cromolouiam satrapix Cracouiensis oppidum ortus, longitudinis gradu 40. min. 50. latitudinis gradu 50. min. 30. per Siradiensem satrapiam, & maiorem Poloniam versus occasum æstiuum ferè decurrit, Olstinum, Censtochouiam, Mestouiam, Siradiam, Vartam, Vneouiam, Colum, Coninum, Pysdros, Sremum, Curnicum, Pofnaniam urbem, Obornicos, Stobniciam, Vvroncos, Siracouiam, Mezichodum oppida & vicos cum adiunctis arcibus, & Landisbergam veteris Marchiæ præterfluens, Nyrumq; Vvresniam, Velinam, Prosniam, Obram, & Notesium minores fluuios excipiens: Et apud Costrinum oppidum in Odram è Silesia occurrentem, influit longitud. grad. 37. latitud. 52. minut. 50. Notesium verò apud Crusuiciam Cuiavia oppidum è Goplo lacu existens, & ipse per maiorem Poloniam versus occasum hibernum means, Pacoffum ambit, Labissinum, Naclum, Pila-

Varta.

Notesium.

lam, Vscæ, Drenumq; arces & oppida præterlabitur. Nester, quem Tyram veteribus vocari volunt, in Russia è Sarmaticis iugis non longè à Tybisci & Sani fontibus ortus, initio versus Aquilonem profuit, deinde ad ortum conuersus, Bistriciam, Lipam, Seretum Russicum, alium à Valachico, Sbrucium, Smotricium, Vsciam, & Moraquam ignobiliora flumina absorbet, & Zidaciouiam, Haliciam, Cestsibios, Ceruonum, Chocimum Valachia, & alia quedam oppida præter lapsus, infra Pocuce Podoliam à Valachia longo spacio diuidit: Ad extremum deflexo nonnihil in meridiem alueo, super Bialogrodum urbem Scythicam, siue Turcicam, quæ & Moncastrum dicitur, in Pontum Euxinum, siue continentem ei Obidouum lacum influit longitud. grad. 53. latitud. 47. minut. 30. Bugus

Nester siue Tyras.

Bugus!

F liam

liam Russica, Brestequae, Iancuam, Drohicinum, Polessensia, & Cameneciam Masouiticam oppida praetergressus est, apud Serocium vicum longitud. grad. 43. latitud. 52. minut. 40.

Narua venenosis carens.

Narua a septentrione & ortu estiuo è Lithuania profuente agrè miscetur, nigrorem suum retinens aliquamdiu: Nec multo inferius victor Narua apud Nouidvorum oppidum Vistulam subit. Est autem peculiaris Naruae natura, sicut & Dlugossus annotauit, quod non fert venenosa animalia, usque adeò, ut serpentes, qui nauibus Bugo delatis adhaeserint, edito sibilo refugiant, cum primum aquam eius fluminis attigerint. Pripetius in Chelmenstractu è palude non longe à Lubomlia existens longitud. gradus 47. latitud. 50. praeter occidentum & septentrionale latus Volymia diuersus à Bugo per Russiam albam longo spacio versus Orientem solem progreditur, & cum nonnullis alijs, tum Styro, Turo, Slucio, Suislocio grandibus fluijs actus, Nieprum siue Boristhenem supra Kiouiam subit, longitud. grad. 51. latitud. 53. ferè. Bohus autè, siue Bogus è palude ortus in sinibus Podolia long. grad. 49. latitud. 49. min. 30. itidè per

Pripetius.

Bogus.

Russi-

Russia albà meridionalior longo terrarū tractu ad ortū tendit: ad extremū deflexo in meridiem cursu, & ipse in Boristhenem non longe ab ostijs eius long. grad. 55. lat. 48. sese exonerat. Prutus è iugo montium Sarmaticorum long. grad. 46. minut. 50. latitud. 47. minut. 30. versus aquilonem in Pocuce delapsus, & Colomeiam Sniatinumq; praeterlapsus, inde per Valachiam siue Moldauia primū orientalis, deinde australis versus Bulgariā in Danubiū decurrit, long. gra. 52. lat. 45. ferè. In Prussia verò Alla siue Alna, & Passaria, non longis inter se spatijs orti, versus septentrionē fluunt: Et Passaria quidem infra Olstinecium, siue Hochsteinum (ut vocant Germani) ducale oppidum existens, Morango, Libstada, Brunsberga, & Helgebeila oppidis praeteritis, Habum lacum subit, long. gradu 42. min. 30. latitud. 54. Alla verò supra Allesteinum S. Collegij Varmiensis arcē & oppidū, cui etiam nomen dedit, oriens, praeteritis Vartemberga, Gutestadia, Heilsberga, siue Allesberga Varmiensibus, & Barthesteino, Sipelbeino, Fridelandia, Allemburgo ducalibus oppidis, apud Velam Prægolæ, ab ortu hiberno per

Prutus.

Passaria.

Alla.

Prægola.

ducalem Prusiam decurrenti, miscetur, & cum eo infra Kænixbergam, hoc est, Regium montem, urbem longitud. grad. 43. latitud. 54. Habo lacu recipitur. Dreuantia verò non ita longo ab ijs interuallo oriens, diuersoque meatu versus Austrum fluens supra Toruniam à Vistula excipitur. Atque hæc de Auminibus nunc sufficiant. Lacubus piscosis imprimis abundat Prussia. In his nominatissimus est Habus, cuius modo mentionem fecimus: quem etiam recens mare vulgò vocant. Ad quindecim milliaria in longitudinem inter Gdanum & Regium montem urbes secundum mare patens, & ab eo angusta insula, quæ Neringa appellatur, disunctus: In latitudinem verò duo milliaria plus minus. Ac Elbingam quidem urbem non longo spacio adspicit, eiq; portum efficit, eiusdem nominis flumine nauigabili influente. Tolkemitam verò, Fraumbergam, (cui basilica Varmiensis in modum arcis munita impendet) Balgam, Brandenburgum, & Fishausum oppida & arces alluit, receptisque, ut dixi, Vistula & Pragola, & alijs minoribus fluminibus, apud Lochstete arcem mari miscetur. Hoc aliquanto amplior lacus al-

Dreuantia.

Lacus Habus.

Neringa Insula.

ter

ter est eodem nomine, cognomento Curoniensis, in Prussia ducali, in quo sunt ostia Nemenis fluminis (Memelam vocant Germani) per Lithuaniam defluentis. Inter hos duos Habos & mare peninsula est, quæ & ipsa Neringa, sed Curoniensis appellatur, arces & oppida continens. Secundum hos est Drusnus siue Drausenus lacus in Marieburgensi satrapia, unde Elbinga flumen profluit: Partecinus Lubnus, Reusina, & Viecininus in Culmensi: In Pomeranica verò Sturorzonagaci, quasi quis stratum vel factum aggerem dicat, inter Choiniciam, Slochouiam, ac Tucholiam oppida, septem milliarium spacio longus, quinque latus: Vnde Berda fluius profluens, per Crempscum, Lubonum, & Charfscouum minores lacus in Vistulam influit infra Bydgosciam. Nec ignobiliores his sunt Vsdice, Lubscus, & Osiecinius in eodem tractu: Alij minores. Sunt & in Varmiensi ditione non pauci. Præcipui verò Dadaius, Zainus, Vadangus, Pissia, Blanke, quasi albus, Sinser, Lingenaus, Lemanglus, Ellingus, Plaucicus, Vulpingus, Clebergus, Cosnicus, Obelus, Marangus, & alij complures. Sunt & in ducali Prussia multi &

Habus Curoniensis.

Elbinga flumen.

Varmiensis lacus.

F 3 gran-

grandes, quos ommittimus. Habet & maior Polonia & Cuiavia nonnullos, piscososque. In quibus Goplus princeps est, quinque milliaria patens in longum, semis in latum: Secundum hunc sunt Blendnus, Pouizus, Slesinus, Sanus, Piednicia, Niezamylus, Voniesca, Lomunice, Pcieuus, Lubstouus, Drauiscus, Noblun, Turlangus, Ielen, & Lednicia, in cuius insula Gnesnensis basilica initio condita fuisse, indeque propter difficilem aditum, in eum, in quo nunc est, locum translata esse putatur, quemadmodum Dlugossus memorat. In Cuiavia verò Tur, Lanscus, Bielscus, Lubotinus, Orlic, Berdouus, Borimouus, Creuianta: Et in Dobrinensi tractu Gorznus, Mocouus, & Scampscus, minores aliquanto superioribus. Pro lacubus minor Polonia, Silesia, Russia, ac Podolia piscinas habent arte manuq; factas permultas & grandes. Non carent tamen & lacubus, Lublincensis maxime & Chelmcensis tractus. Equibus Biale, hoc est, ^{Biale lacus.} Albus, per antiphrasim sic dictus, prater eundem non est: Cuius aqua Aprili & Maio mensibus fuscus reddit lauantes: Pisces autem pinguisimos profert, qui brasmi, à nostratibus autem

MART. CROM. LIBER I. 35
tem Clefcy vocantur. Est & in Belsensilacus Crinice, non amplius, verum profundus. De quo ^{Crinice.} illud memorabile annotauit item Dlugossus, quod certis temporibus altero vel tertio quoque anno cum mugitu fluctus attollens exhauritur prope ad fundum usque, aquis vicini montis cauernas subeuntibus: Atque ibi tunc facile prehenduntur pisces in aqua ^{Piscationes hybernae.} vadabili. Post dies aliquot ea refluit. In ceteris lacubus, atque etiam in maioribus piscinis & fluminibus hiberno tempore commodiores ferè sunt piscationes, quam estate, pertusa certis interuallis glacie, retique per maius foramen in aquam immisso: quod longis funibus ad perticas alligatis hominum equorumve opera longo spacio in diuersum tractum, coeuntibus rursum piscatoribus alio foramine piscibus referuntur extrahitur. Sunt autem eadem generum piscium in lacubus & piscinis. Vtrobique enim ^{Piscium genera.} sunt lupi, siue lucei, prasmi, percæ, rhombi (si modo sic appellandi sunt ij, quos nos Carassios dicimus) sumi, sendacij, cirtæ, siue certæ, à delitijs, ni fallor, apud Germanos nomen sortitæ, tineæ, anguilla, ruboculi, carpones, quos re-

ginas vocat Itali, Latini Cyprinos, quem admodum vult Ioannes Dubravius Olomucensis Episcopus. Tametsi minus frequentes hi sunt in lacubus, quam in piscinis: In quas paruuli tanquam in viuaria studiose includuntur. Ferunt etiam lacus nonnulli eos, quos suluizas & sielauas nostrates, Germani Marenas vocant. Piscis est dulcis & sapidus, aleci similis: Fluiatiles vero sunt cum iisdem ferè omnes, tum delicati imprimis, truta, barbo siue mullus (Paruenam vocant) fundulus, occulata, quæ lampreda quoque dicitur, alosa, siue borbocha, cuius iecur potissimum est in delicijs, à nostratibus Mientus vocatur: Itemque Lipien, sliż, berżana, vcleia, iafdeż, & quæ bialariba, hoc est, albus piscis à nostratibus appellatur: quibus latina nomina dare non habemus. Quanquam quid vetat Alberti Magni, & aliorum scriptorum, qui eiusmodi res persecuti sunt, exemplo, eos vernaculis nominibus ad latinum sonum conformatis appellare? Quod in superioribus quoque nonnullis factum est. Cancris & anguillis abundat imprimis Nida fluuius. Anguillis etiam & Stintis Habus, & alij nonnulli lacus Prusici. Marinis piscibus

non

Pisces fluuiatiles.

non admodum abundat ea regio. Nobiles autem precipue sunt haleces, quos haringas Germani vocant, quorum sale conditorum maximus est vulgo usus in tota Polonia, atque adeò in Lithuania quoque, Boemia, Silesia, Moravia & Vngaria. Tanta eorum copia est. Sed in Prussia pauci prehenduntur: A Cymbrica autem Chersoneso, & Scandia, & ex Oceano Germanico plurimi & optimi nauibus eò importantur. Pomuchla non desunt, neque passerres. Salmonem siue esocem, & sturionem inter marinos ne, an fluiatiles numerem, nescio, Vtrobique quidem prehenduntur: Sed è mari sursum fluminum certis temporibus enatant, transilientes obstacula. In quibus etiam insidiosis capsis collocatis capiuntur. Tanto sunt autem suauiores, quanto longius à mari & Habo recesserint. Quin vniuersè pisces ij, qui in fluuijs iuxta ac lacubus & mari victitant, sapidiores sunt in fluuijs, quam in mari vel lacubus capti. Non est hic prater eunda quarundam aquarum non vulgari natura. Est in Scepusio riuus ex arduis montibus profluens, cuius gutta in lapideam duriciem concrescunt, ita ut ex ijs sponte existant ful-

Salmones & Sturiones.

Aquam mira natura.

G

cra

cra sustentantia canales, quibus rivus ille ad moletrinas deducitur. Est & fons siue lacus pestilentem aquam & vaporem emittens, cuius non modo gustu, sed etiam afflatu animalia & aves necantur. Sunt etiam nonnullis in locis Polonia scaturigines tepidarum aquarum, sulfuris & aluminis odorem redolentium, quibus scabies & ulcera hominum & iumentorum curantur, sed nos ab aquis & aquatilibus ad terrestres animantes transeamus. E ferarum animantium genere fert hac regio copiam leporum, dorcarum, sciurorum: cuniculorum quoque alicubi: Ceruorum etiam, & aprorum, & ursorum, & luporum nonnullis in locis. In primis autem Neopolomicensis & Radomiensis saltus nobiles sunt Ceruorum venationibus. Et horum autem, & Onagrorum atque Bisontium Prussia ducalis, eius finitima Masouia ferax est & in primis Podolia: ubi agminatim in campis non modo haec fera, verum etiam ferre equi pascuntur. Est autem bisons praegrandis, verum perniciosissima fera, magnis & introrsus leniter incuruis cornibus nigris armata, quibus equum cum sessore correptum in sublime identidem iactat, & arbores mediocri crassitudine e-

uertit.

uertit. Magnitudinis eius illud quoque est argumentum, quod in capite eius inter cornua, duo imò tres etiam homines possunt considerare. Habet villosum & hispidum corium, & sub mento palearia. Caro eius sale condita in delitijs est magnatibus & principibus. Cornu sonorum, & ob id venatoribus in usu est. Zubrum seu Zambrum vocant nostrates: Imò & Graeci recentiores: Onager vero los appellatur. Alcē hanc esse volunt: De qua scribunt Plinius, & nonnulli alij ex veteribus. Fera est longis cruribus, & auribus, aliquanto maior equo, colore cesio & fusco, mas capite cornuto: Cuius ungula posteriorum crurum, si Autumni initio spiranti adhuc descentur, expetitur, comitiali praesertim morbo laborantibus salutaris. Ferunt etiam capreas montana loca Vngaria finitima. Caeterum Vri, hoc est, boues syluestres, quos nos thuros dicimus, in solis Masouiticis syluis apud Vyskitcos extant. Et harum quidem ferarum carnes aptae sunt humano esui: Cultui vero pelles subministrant panthera, siue is est lupus ceruarius (Ris appellatur à nostratibus) maculosis ventre & pedibus: quae partes maxime in pretio sunt. Martes, siue Mardures, quas cunas dici-

G 2

mus,

Therma.

Fera.

Bifons siue
Zubr.Onager &
Alec. LociVrus siue
Thur.

Panthera.

Castor. mus, vulpes, lupi, Rosomaci, Lutra item & castores amphibia. Atque horum, castorum, inquam, cauda etiam inter delicatos, cibos, & pro piscibus habentur, reliqua carne inutili prope modum. Extruit autem sibi hoc animal cubile ligneum in marginibus fluminum & lacuum, cameris compluribus alijs super alias distinctum, ac secundum incrementum aquae domicilium mutat, ita ut cauda natante reliquum corpus in sicco maneat. Pellem habet in dorso hispida, sed mollem: unde simbriae fiunt exornandis vestibus hibernis & pileis. Vrsorum quoque vola cum digitis esitantur: pelles etiam stragulae vestis usum praebent. Quin & amicare his famulos coeperunt ij, qui feroculi videri volunt. Cuniculi, lepores, & sciuri cultui iuxta ac esui apti sunt. Sunt etiam in Podolia animalia sciurorum vel cuniculorum magnitudine, in caavernis degentia, varias & maculosas pelles habentia, quae & ipse ad vestitum & pallia foeminarum expetuntur. Cræcicos vulgò vocant. Omni autem genere ferarum magis abundat Lithuania propter vastitatem sylvestrem. De bison-tium venatione scire opere precium est, quòd in
campis

Bisontium
venatio.

campis Podolicis segregati ex agmine singuli ab equitibus sagittariis ordine in girum dispositis conficiuntur. Unus enim post alium fere ad equitantes, iaculantur, citatisque equis refugiunt. Efferata autem illa ictu & vulnere, refugientem insequitur. Interim ferit eam alius. Quae illa rursus priore dimisso insequitur, donec defatigata labore & vulneribus concidat. In sylvis verò ij deprehensi opportuno aliquo loco deiectu arborum à rusticanis hominibus ad id coactis, quasi intra sepes includuntur, plures etià quàm singuli, ita ut effugere inde non possint. Deinde extracta ex tempore principi & magnatibus ac foeminis cauea siue tabulato editori, ex quo tuto spectare possint, venatores cum venabulis ad suam quisque arborem disponuntur. Mox ab equitibus strepitu & clamore, admissuq; canum fera excitata è vepretis in medium propellitur. Quae à venatore post arborem latentè, ut cuique maxime appropinquarit, venabulo petitur efferataq; ictu, arborem, cuius obiectu ille se tegit, cornibus petit, & cum arbor sit gracilior, quàm ut ambobus cornibus in eam possit impingere, fronte ac toto corporis nisu in eam incum-

bit, cornibus utrinque prominentibus. Urget interim semel adactū in praecordia ferrum venator, sensim cedens appetenti se feræ, ac circum arborem giranti: nec desunt canes grandiores morsibus adiuuantes, donec ea exanimata vel defatigata prorsus concidat. Quod si venator ictum frustratus sit, aut minus opportunè intulerit, aut à fera etiam correptus & proculcatus fuerit, aliquis è vicinioribus rubrum pannum feræ obiectat. Hoc enim colore maximè effertur. Ibi ea dimisso priori, hunc petit recipientem se ad suam arborem, & ab eo feritur & conficitur. Lingua eius contactus vitatur, qua longius exerta attrahit ad se hominem, si vel extremā vestis eius orā contingat. Est enim ea scabra. Ursi verò, quamuis prægrandes, etiam viui capiuntur, reti implicati, venatoribus compluribus simul accurrentibus, & ligneis furcis caput pedesq; feræ ad terram deprimentibus, donec ea fune constringatur. Constricta in arcam ligneam concluditur, ita, ut se commouere nequeat, & aueritur, Vnde post, ubi libitum est, ad spectaculū, & urbanam vel campestem venationem emittitur. Sic autē colligatur, ut uno tractu funis ex arca promi-

Ursorum
venatio.

prominentis soluatur. Vidimus aliquādo in spectaculo equulum, & quidē castratum, cum Urso prægrandi commissum. Qui ex intervallo accurrens obuerso tergo calcibus vrsū petebat & refugiebat, vrsū ad stipitem, laxiore tamē fune alligato, Sed alia persequamur. De iumentorum genere bobus & equus abundat Polonia: camelis, asinis & mulis caret. Aliunde ij nonnunquam adducuntur, sed non durāt. Ouium itē & caprarū ferax est. Auiū quoque magnam habet copiā. Præter altilis autē, nempe gallos gallinaeos, domesticos iuxta ac Indicos, (qui nuper a deo inuecti sunt) anseres, anates, & columbas, in delitijs hæ sunt: Pygargus, quem quidam Bistardam vocāt, eò quod tardior sit propter molē corporis, & vix à terra euolet, pavo, grus, cygnus, perdix, bonosa, coturnix, sturus siue starnus, & quæ Cietrzevu & Cieciorca, & Glussetz, quasi surdaster, à nostratibus vocantur. Et ut rapaces aquilas, falcoes, accipitres, miluios, vultures, nisos, ardeas, & multas alias mittamus, minorū quoq; auicularū aptarū esui ingēs est copia. In his nobilis in primis ea, qua in solis ferè locuiciensibus campis cum niue existit ac disparet,

Animalia
domestica.

Aucē.

*auicula, passere non multo maior: quàm à niue
 Sniegula. Sniegulam vocamus. Turdus rarior est, itemq;
 Pardua. Pardua, quam ita vocamus nomine vernaculo,
 quando latinum non habemus. Avis est sylue-
 stris, gallina non multo minor, in campis Russi-
 cis & Podolicis. In iisdem reperiuntur coturni-
 ces & Podolicis. In iisdem reperiuntur coturni-
 ces virentibus pedibus, quarum esus spasmodum
 inducit. Ex auibus maiores atque teneriores
 sub hyemis initium gregatim auolant, verèq;
 nouo redeunt: Nonnulla minores, velut hirun-
 dines & Cypseli, implicitis inter se pedibus & a-
 liis conglobate, in lacus, paludes, & piscinas sese
 immergunt, ac vere nouo emergunt, & expli-
 cantes sese euolant. Hiberno quidem tempore re-
 tibus extracta à piscantibus sine ullo sensu &
 motu, & ad ignem admota, vel in hypocaustris
 calidis posita reuiuiscunt, & euolant, sed statim
 lesa frigore, vel ignis calore atque vapore inso-
 lito emoriuntur. Cetera hyemis tolerantiores,
 in syluis, vel circum domos & villas vitam de-
 gunt. Nec plura nunc de situ, vbertate & omni
 descriptione Polonia. Genti Polone sicut origi-
 nem, ita & linguam communem esse cum Boë-
 mis, Russis, Moschis, Croatis, Morauis, Silesijs,
 Cassu-*

Sniegula.

Pardua.

Coturni-
ces Russice.Auiculæ
rediuinæ.Lingua
Polonica.

Cassubiis, Bulgaris, Rasciis, Serbis, Illyris, &
 vniuerso nomine Slauico seu Venedico alibi ex-
 posuimus. Tametsi dialectis ea tam varia est, vt
 nonnulli ex his populis ægrè & vix se inuicem
 intelligant. Ceterum ab aliis omnibus linguis ea
 prorsus diuersa est: Nisi quod multa instrumē-
 torum, operum, & aliarum rerum ad opificia &
 communem vitam pertinentium vocabula à fi-
 nitimis, & priscis, ni fallor, incolis Germanis
 mutuata est. Sunt hodieque non modo mercato-
 res & opifices Germani multi sparsim in urbi-
 bus habitantes, verum oppida penè tota & pagi
 pleni videntur lingua Germanica in Submon-
 tana regione, eiq; finitimis Russia & Scepusia,
 itemque in extrema ora maioris Poloniæ, dedu-
 ctis eo, sicut & in Silesiam & in Prusiam, quo-
 dam tempore Germanorum coloniis, & multis
 de plebe compendij sui causa subinde immigran-
 tibus. Quin & equestres quædam familia anti-
 quitus è Germania ducunt originem. Cui rei
 argumento sunt stemmata siue insignia, & eo-
 rum nomina. Sed iam ij, atque etiam oppidani
 & pagani diuturnitate temporis ac domicilijs, &
 connubijs magna ex parte in Polonos transie-
 runt.

Histo. Pol.
lib. 1.Germani-
cæ linguæ
vſus.

H

runt.

Latine lin-
guae usus.

Libenter autem & Poloni propter multum usum & commercii cum Germanis condiscunt linguam Germanicam. Libentius etiam Latinam, propter sacrorum ritus & sacerdotia, scribendiq; usum, qui vulgatissimus fuit antiquitus hac lingua cum in priuatis scripturis & epistolis, tum in actis publicis, ac diplomatibus, mandatis, edictis, decretisq; principum, & omnium iudicum & magistratum. Estq; etiam nunc, aliquanto tamen minus, in usu. Nostras enim lingua neq; tam copiosa est, quam alia, neq; scriptu leuetaq; facilis. Sed Prussiae incolae, cum maxima ex parte Germani, aut e Germanis oriundi sint, in conscribendis actis iudiciorum Germanica lingua magis utuntur vulgo, mixtim Polonica & Germanica loquentes. Prisci Prussi, quorum perennes adhuc extant reliquiae, peculiarem habuerunt habentq; ab utraq; penitus diuersam. In Russia, meridionali praesertim, iam fere usitatior est Polonica dialectus, quam vernacula, ex quo gens ea Polonorum cessit imperio, Polonis propter ubertatem soli & militiam aduersus Tataros libenter ibi figentibus domicilia. Sunt etiam in Russia Podoliaq; Armeni, mercaturam

Armeni.

turam exercentes: Hebraei vero longe frequentiores, etiam in cetera Polonia, praeter Prussiam, sparsim oppida & vicus incolentes. Vtrique sua lingua utuntur: sed & Polonica, vel Russica: Hebraei vero passim & Germanica. Penetrarunt & Itali mercatores atq; opifices in vrbes primarias nostra ferè memoria: Estque nonnullus eius linguae usus etiã apud Polonos elegantiores. Libenter enim ij peregrinantur in Italia. Pagis autem & vicis potissimum, atq; etiam oppidigena Polona antiquitus habitat: quibus ferè castella & arces adiuncta sunt, dominorum & praefectorum domicilia. Vrbes munitas atq; cultas non multas habet. Princeps est Cracouia in minore Polonia, regum & regni domicilium: Quae cum adificiorum priuatorum iuxta ac publicorum splendore atq; munitione, tum rerum omnium ad victum cultumq; corporis pertinentium, & mercium exoticarum copia, emporio, magnis ad vitam degendam commoditatibus, hominumq; frequentia, ciuilitate, & elegantia facile primum locum obtinet, & cum clavis Germania Italiaq; urbibus certat. Germanis autem mercatoribus abundat antiquitus. Neq; caret Italis.

Habitanda
ratio.

Vrbs
Cracouia.

Habet opportunitatem Vistula fluij, quo pisces, ligna, & omnis adificiorum materia, & alia quadam è vicina Silesia importantur. Nonnulla etiam cum alio, tum in Prussiam deportantur, & inde merces exotica reportantur. Habet item suburbana ampla & frequentia, & cum hortis atque pomariis delicatis, tum vinariis piscium & pradiis culta, ac temperie caeli amœna. Adiuncta sunt ei duo oppida: à meridie quidem

Cazimiria.

Cazimiria, ponte ligneo iuncta interlabente Vistula. Est tamen intermedius urbi & pon-

Stradomia

ti continens viculus, cui nomen est Stradomia.

Rudaua.

Quem flexus Vistule tria latera ambientis, & influentis in eum Rudaua occursum facit insulam. A septentrione verò pomeriis urbis conti-

Cleparia.

nens est Cleparia, non tamen cincta mœnibus, ut est Cazimiria. Habet & arcem per amplam Cracouia, à latere Australi in colle seu rupe, Vistula & Stradomiae imminentem, mœnibus turribusq; munitam, & magnificis regia ac basilicæ, in qua sedes est Episcopi, duorumq; præterea delubrorum, & aliarum priuatarum domuum adificiis exornatam. Regiam quidem Sigismundus rex senior nostra memoria in eam, quæ nunc

visitur

visitur, formam, amplitudinem & splendorem redegit. Habet Academiam quoque omnium disciplinarum atque doctrinæ studii & professione florentem. Olim tamen, quàm nunc honestis disciplinis, & frequentia præceptorum iuxta ac studiosorum florentiorem, cum principes viri ornamentis patriæ magis fauerent ac studerent, necdum vel Luteranismo infectæ, vel ferro Turcico diuexatæ, & fermè subactæ essent gentes finitimæ. Sita est autem urbs ea non procul à finibus Silesiæ, Vngariæ & Russiæ, longitudinis quidem gradu 42. latitudinis verò 50. Secundum hanc sunt haud ignobilia oppida in eadem minore Polonia ac diœcesi Cracouensi, Lublinum, tricesimo sexto milliario versus or-

Academia
Cracouen.

Lublinum.

H 3 lati-

lat. verò 52. min. 30. itidem cōmercijs & emporio Germanorum exculta. Quae & ipsa Academia, opera & sumptibus Ioannis Lubrätij episcopi nostra aetate fundatā, sed à successoribus eius neglectā habet. Nunc tamē ea cura & munificentia Episcopi Adami Conarij instauratur. Habet & arcem, & basilicam sedemq; episcopi cum oppidis Srodca & Valisseuo, interlabente Varta flumine disunctā. Secundum hanc sunt oppida Calisia, Gnesna, vetustate & Archiepiscopi sede basilicaq; nobilis, vuschouua, quā Freistadium Germani vocant, Costenum, & Slupcia episcopi. In

Leopolis. Russia Leopolis longitud. grad. ferè 46. latitud. 49. sita, quinquagesimo à Cracouia milliario. Vrbs est satis munita, duas arces adiunctas habens, emporio, ciuiumq; elegantia & humanitate florens, ac sedc alterius Archiepiscopi, & duorum episcoporum, nempe Armenici atq; Russici non ignobilis. Sunt etiam oppida Premislia & Crosna: Quorum Premislia arce munita, & duobus episcopis, latino siue catholico, & Russico cohonestata est. Chelma quoq; itidem duos habet Episcopos: sed propter oppidi seu vici immuniti infrequentiam, Tataricasque excursiones,

catho-

Adam Conarius episcopus Polon.

catholici Episcopi cathedra Crasnostauia translata est. In Podolia Camenecia est, vrbs cum arce, natura loci manuq; permunita, triginta milliarijs bene longis distans à Leopoli versus ortum hybernum, longitudinis gradu 49. fermè latitudinis verò 48. minut. 30. Habetque & ipsa suum Episcopum. In Masouia Varsavia est

Varsavia. longit. 43. lat. 52. grad. & minut. 20. pari ferè spacio, hoc est, quadraginta milliarijs à Cracouia & Posnania. Deindc Ploscum basilica nobile

Ploscum. & episcopo, eiusque episcopi oppidum Pultouia cum arce, & Lomza. In Cuiavia sunt, Breste, & Vladislauia sedes & oppidum episcopi, cum arce,

Vladislauia. quam Stanislaus Carnouius Episcopus nuper splendidiorē, & magis habitabilem reddidit. In Prussia verò Gdanum siue Dantiscum, octogesimo fermè à Cracouia milliario, à Posnania verò quadragesimo, à mari vno fermè: longitud. quidem gradu 41. minut. 30. lat. verò 54. minut. 20. vrbs est è tribus oppidis coagmentata, portu, naualibus, & horreis nobilis: copia & varietate mercimoniorum partim maritimorum ex toto occidente & septentrione, partim terrestrium ex diuersis mundi partibus, & fluiatili-

um,

Torunia.

um, maxime Vistulae praevalentis opportunitate abundans: munitione firma, civium & conucnarum industria ac diligentia culta. Quae anno superiori, dum opus hoc primum editur rebellis facta, virtute & dexteritate fortissimi prudentissimiq; regis Stephani post insignem cladem & diuturnam obsidionem clementer in deditioem redacta est. Gdano proxima dignitate nunc est Torunia, viginti quatuor milliariis intorsum versus Posnaniam & Cracoviam ab eo distans, & in ripa Vistulae sita, longit. gr. 41. lat. 32. duobusq; oppidis distincta. Olim emporio & omnibus rebus florentior. Sed Gdani incrementa eam non parvis detrimentis affecere, & infrequentem reddidere. Quod ipsa itidem Culme prius usu venerat: Quae civitas ea dignatione fuit antiquitus, ut ab ea cetera omnis Prussia, atque etiam Masovia pleraque ius peteret: Quod inde etiam nunc Culmense dicitur. Viguerunt in ea non ita pridem etiam bonarum literarum studia. Nunc ea pro amplitudine sua infrequens est admodum: Cumque superiori tempore in ditione Regia fuisset, nunc paret episcopo: qui inde nomen habet. Tametsi cathedra

eius

Culma.

Ves Culme
ic.

eius est in oppido Culmesea, uno milliario inde distante. Elbinga etiam Prussiae urbs est gemina, Elbinga. permunita & copiosa: nisi quod eius quoque luminibus, ut ita dicam, officunt, ab altera parte Gdanum, ab altera Regius mons siue Koenix- Regius mons, siue Koenixber. berga, vicina, & maiore commoditate portuum copiosa urbes. Est autem Regius mons, ducalis Prussiae caput, tribus oppidis & arce magnifica, nostraque memoria etiam basilica & sede Episcopi Sambiensis insignis: terrestri quidem itinere decem octo milliarium, per Habum vero aliquanto minore intervallo à Gdano distans, long. gradu 43. latitudo 54. minut. 50. Pragola flumen oppida intersecat, & uno ferme milliario infra eam in Habum influit. Minoribus item oppidis frequens est admodum utraque Prussia, & quidem nec incultis, nec immunitis. In regia, primum est Marieburgum, cum ipsum per se Marieburgum. tum arce amplissima & munitissima nobile, situm ad Nogatum brachium Vistulae, sexto ab urbe Gdano milliario: Propter adiacetis autem insulae, cuius mentionem supra fecimus, ubertatem glebae, pagorumque frequentiam & cultum, copiosum &

I fre-

frequens. Ea verò in insula in palustri olim restagnantis Vistula solo operibus & praalti ac firmi aggeris obiecta ad utrunq; fluminis brachium effecta, magno hominum labore non sine periculo ab inundatione defensatur. Maior ea vocatur. Minor autem appellatur, continens ei ad occidentale Leni-vuca latus, & ad Motlaviam Gdanumq; pertinens planicies: & ipsa palustris olim. Nunc autem fossarum ductibus exculta & facta compascua. Marieburgo non multum ultra recedit Allesberga, siue Heilsberga, episcopi Varmiensis domicilium. Cathedra enim supra Fraumbergam est, quemadmodum superius attingimus. Initio verò, Brunsberga ea fuit collocata. Quod ipsum quoque oppidum geminum, permunitum, frequens & copiosum est, ita ut inter primarias vrbes Prussiae numerari queat.

Quam nuper vir ampliss. Stanislaus Hofius, S. R. E. Cardinalis & Varmiensis Episcopus una cum sacro eius ipsius Ecclesiae collegio studiis literarum atque doctrina nobiliorem reddidit, nobis adiutoribus, & in religione catholica conseruat, collegio religioso eorum hominum, qui de societate Iesu vocantur, in ea collocato. His oppidis

non

non multum cedunt Gutesstada, Allesteinum, Resla, Vormita, Melsacum, Vartemberga, Seburgum in eodem tractu ac diocesi Varmiensi. In Pomerania, Tucholia, Choinicia, Stargarta siue Starigrodū, Nouum, Gneuū, Dersauia. In reliqua Prussia, Neimarcum, Brodnicia, Stuma, Grudentū, Lubauia, Razinum, & inter hac interiectū ducale, Quizinum, quod Germani Marieuerder vocant, non ita pridem sedes Pomesaniensis episcopi: Cuius diocesis insulam quoque maiorem, & Stumense territorium completebatur. Nunc ea caret episcopo. Hac omnia oppida & ipsa per semœnibus cinctasunt, & ferè arces validas & benè exadificatas, sed vetustas, adiunctas habent. In cetera quoq; Polonia non infrequētia sunt oppida (aut si vicos appellare malimus) pleraq; sine vllis mœnibus, nec nisi ligneis adificijs, præter templa & castella, siue arces adiunctas. Sunt item arces in editioribus locis & rupibus extructæ, nullis adiunctis oppidis: Melstinum, Tencinum, Landiscorona, O-grodenecia, Lipouecia, Olstinum, Pilcia, Sorstenum, Soben, Ocecium, Visnice. Sunt & monasteria ad munitiōem pariter & commoditatem

I 2 habita-

habitorum ex ædificata, & vicis pagis ve non longe distantibus frequentata: Tinecense, Mogilense, Miechouienſe, Andreouienſe, Breſcense, Stananticenſe, Copriuunicenſe ſive Pocrivunicenſe, Lyſſecenſe, Cienſtochouienſe, Vitouienſe, Suleouienſe, Landenſe, Lubinenſe, Ceruenſenſe, Paradifenſe, Mogilnenſe, Tremesnenſe, Secechouienſe, Vangrouecenſe: & Sarnouicenſe, Pelplinenſe, Oliuenſe, Zucouienſe in Pruſſia.

Pagi.

Pagi plerique omnes ad lacus, riuos, & flumina ſiti ſunt, ſparsim duplici, vt plurimum, ordine diſiectis agreſtium domicilijs. In his caſe ſunt lignæ vel luteæ, humiles, pleraque omnes ſtramentis, nonnullæ aſſerculis inteſtæ, præter prædia domosque dominorum, quæ ampliores ſunt & cultiores. In Pruſſicis tamen pagis agreſtes Germani minus incultè habitant: Oppidani vero cultius etiam lateritijs ferè domibus interiectu trabium firmatis, & ad omnem commoditatem inſtructis: Quæ tamen pleræque ſtramentis te-

Vrbes quæ
lcs.

tae ſunt: nonnullæ lateritijs tegulis. Vrbes longè ſunt cultiores, niſi quòd habent domos anguſtiores. Cætera vero Polonia vrbes primariae laxioribus domibus, nec minus cultis habitantur. In quibus

quibus cum Germani mercatores ſuperiori atate lateribus & lapidibus elegantius ædificare cœpiſſent, nunc Poloni quoque eodem ſtudio tenentur, illosque ſuperare contendunt: Nec in vrbus modo, ſed etiam in villis lautius habitare ſtudent, Italorum ferè opificum opera & induſtria. Hypocauſtorum permagnus eſt uſus maiorẽ parte anni in tota Polonia, præter Caſſubiam, & Pruſſia partem quandam: ubi agreſtes per hibernum tempus accenſo in medio domicilijs foco, cum pecudibus, iumentis, ac cæteris animalibus & auibus domeſticis in ſordibus, fætoꝝ, atque fumo (licet non deſint ampla fumarĩa) vitam degunt: ſicut & in Samogitia, & alijs ad Septentrionem vergentibus regionibus. Quanquam hypocauſta quoque, agreſtium duntaxat, pleraque fumoſa ſunt, (vt quæ furnis ad coquendos cibos & panes intus extructis calorem excipiant, & fumarijs magna ex parte careant) Et anſerum, anatum, gallinarumque cum pullis ſuis, ac ouicularum quoque, capellarum, vitellorum, ac ſucularum, propter hibernum gelu, admiſſi & receptu ſordida. Balnearum item excalſactarum frequens eſt Polonis

Hypocau-
ſta.

Balnear.

Vestitus.

usus astate iuxta ac hyeme ad abluenda & leuanda sudore corpora. In quibus mares seorsum lauant a feminis. Vestium genus neq; unum est, neq; certum, aut suum cuiq; ordini, conditioni, aetati & generi hominum. Exoticis delectantur pluri. Femina passim cum alio cultu vario, tum virorum amiculis utuntur. Quanquam id nouum est. Reticulis tamen, aut lineis velis siue flammeis ex capita integunt. Puellae antiquitus nuda capita fertis aureis, gemmatis vel sericeis, vel floreis, vel herbaceis redimita progrediuntur in propatulum. Sed nunc ex atque etiam matrones pileis sericeis, pellibus suffultis, itidem ac mares ferè tectè incedunt. Victus genti antiquitus vulgo & in plebe, agresti presertim & vicana, succidia, lactarijs, pisciculis, oleribusq; potissimum constat. Nunc multi veruecina quoq; & vitulina, & bubula carne victitant: Quarum carniū fora in pagis quoq; apud templa & paræcias festis diebus instituuntur. Urbanis, atq; nobilitati victus est dapsilior: Et iam lautior etiā, mensaq; cum altilibus, tum feris animalibus, auibusque, & piscibus lautis instructa: In quibus permagnus est aromatum, neq; exiguus saccari & aliorum

Victus ratio.

orum exoticorum condimentorum usus: Nec oleribus exquisitis ea carent. Nec desunt bellaria, aliaq; lautitia cum dominatæ, tum exoticæ. Triticeus panis viniq; usus non ita pridem inoleuit apud elegantiores. Nunc quidem utroq; multum utitur etiā vulgus in conuiujs: Vino quoq; presertim in minore Polonia vicina Vngariæ & Morauia. Nec obstat precium. Cæterum siliginei panis, & cereuisie promiscuus est usus in tota Cereuisia. Polonia. Fit autem cereuisia in Prussia quidem ex ordeo, in cætera verò Polonia etiam è tritico minutatim molito seu confracto, & aqua decocto cum lupulo. Admiscetur nonnunquam tritico siligo, vel spelta, vel auena. Mel quoq; itidem Medo siue aqua mulcum lupulo aqua decoctum in frequenti usu est: Russis presertim & Podoliis, apud quos permagna est apum & mellis optimi ex dictamo & alijs benè olentibus herbis ac floribus collecti copia. Nec Prussis & Masouis mel deest: Qui & ipsi itidem id decoquunt. Medonem vulgo vocant. Solet autem is condiri Varsavia peculiari ter succo è cerasis, rubi ve malis expresso, aut aromatibus: & pro ratione condimentorum, Kerstrangi, Malinici, ac Troinici nomen accipit.

Corporum
habitus.

Color hominum ferè candidus est: capillus flauus, vel magis albicans: statura mediocris, aut mediocrem paulò excedens, habitudo corporum succulenta. Nisi quòd fœminis, & maxime puel-
lis nobilioribus urbanisq; studium est, ut se red-
dant curatura iunceas, quemadmodum inquit

Terentius.

ille. Alioqui formæ atque teneritudinis non magna ab ijs adhibetur cura. Fucare autem faciem & capillos tingere, indecorum habetur. Sed est in uiris iuxta ac fœminis naturalis quadam formæ bonitas, ingenuo rubore tinctæ.

Ingenia &
mores Pol.

Polonorum sunt aperta & candida, & falli, quàm fallere magis apta: non tam irritabilia, quàm placabilia: minimè proterua aut pertina-
cia: imò valde tractabilia, si commodè ac placidè tractentur. Exemplis autem in primis ij cõ-
mouentur: & sunt principibus & magistrati-
bus suis satis morigeri. Ad comitatem, ciuilita-

Hospitali-
tas & ciui-
litas.

tem, benignitatem & hospitalitatem prompti, ita ut ignotos & externos non modo libenter suscipiant hospitio, sed etiam inuitent, & omni officio prosequantur: & non modo ad conuictum atque familiaritatem quorumlibet faciles, ve-
rum etiam ad mores & imitationem eorum,

cum

cum quibus viuunt, externorum præsertim, fle-
xibiles. Iuuentutis laxior est paulò & neglectior
educatio: Sed ea natura bonitate compensatur. Educatio.

Ad Scholas quidem & magistros mittere mares
liberos, & latinis literis teneram atatulam im-
buere, omnibus, pauperibus iuxta ac diuitibus,
nobilitati ac plebi, oppidana præsertim, studium
est. Multi pædagogos domi aliunt. Itaque ne in
medio quidem Latio quis reperiat tam multos
vulgò, cum quibus latinè tamen loqui possit. Pu-
ella quoque nobiles & urbana vel domi, vel in
monasterijs vernacula, imò & latina lingua le-
gere & scribere discunt: Adultiores, puella qui-
dem reifam, culinaria præsertim & pecuaria cu-
randa, lanificioq; seu linificio potius, atque tex-
trina, & acu pingendi arti manus admouent:
Mares verò agricultura vel opificio cuiquam,
vel mercatura, vel magistratum & procerū,
sacerdotumue opulentiorum ministerijs & affe-
ctationi sese addicunt. Multi domi cum paren-
tibus vitam degunt, eosq; in refamiliari curan-
da subleuant, ac decedentibus eis, patres famili-
as facti, rem suam agunt. Complures libenter
peregrinantur, dispendiorum reifamilias negli-

Peregrina-
tio.

K

gentes,

gentes, egestatisque omnium, quae peregrinantes consequuntur, incommodorum tollerantes. Externa enim magis, quam domestica admirantur. Itaque linguas earum gentium, ad quas pervenerint, cupide et facile discunt. Quin etiam in victu cultuque corporis, et moribus novi aliquid peregrè afferre student, indeque elegantia laudem querunt. Quod iam ad opiniones quoque de religione proserpsit. Sunt autem docilia hominum ingenia, et valent quocumque intenduntur: Sed alienis inuentis perdiscendis ea magis accommodant, quam ut novi aliquid ipsi excogitent, et excellere magnoperè vllare studeant. Id adeò fit, siue quod uni alicui arti et studio non libenter sese addicunt, sed multa nosse cupiunt: siue incuria, segnitie, laborisque fugitatione, quae plerisque in rebus peculiaris est huic genti: praesertim quòd homines, ad quorum usum ferè liberalia iuxta ac mechanica studia referuntur, mediocritate contenti, exquisitam artificum et operum praestantiam non magnoperè requirunt: Seu denique quod ditiores ocio, delitijsque sese dedunt, relictà tenuioribus ingenij et industriae exercitatione: Has verò cum sit

diffici-

Studia.

difficile, ut ait Philosophus, egentem bene operari, praesidijs vita comparandis distineri, et alienis nonnunquam ab ingenio suo studijs et negocijs implicari necesse est. Atque ubi, quod satis est, compararint, et ipsi ferme superiorum similes evadunt, vel re ipsam tuenda cura, litiumque anfractibus, vel potentiorum consecratione distrahuntur, idque siue ambitionis stimulis incitati, siue quo se suosque certo aliquo praesidio ab aliorum iniurijs et contumelijs vindicent. Nescio enim quomodo fit, ut ad vita commoda et ornamenta non modo comparanda, sed etiam tuenda non satis praesidijs sit, hac nostra praesertim aetate, in solis animi et ingenii bonis, et in legibus ac iure communi. Non tam autem ad artes mechanicas tractandas Poloni apti esse videntur, quam ad studia doctrinae. Nisi forte illas contempserit potius, quam assequi nequere. Externis quidem plerisque opificibus antiquitus usi sunt, et utuntur etiam nunc non paucis. Bonarumque literarum atque doctrinae studia accuratius consecrantur, in primis ij, qui his praesidijs ex humilitate sordibusque

K 2 dome-

Aristoteles

Doctrinae
Studia.

domesticis emergere cupiunt, aut qui sua vel parentum voluntate ad sacerdotium animos adijciunt. Seueriores autem disciplinas ad nostra usque tempora potissimum consecrati sunt Poloni. Non defuere nobis sanè superioribus temporibus insignes mathematici, astrologi, dialectici & philosophi, atque etiam theologi, ij praesertim, qui vocantur Scholastici, cum instituta Academia Cracouiè. Cracouiè ante centum septuaginta annos Academia, magistri eius generis Lutetia Pragaque acciti, admirationi essent vulgo, & primoribus, atque ipsis etiam regibus. Humanitatis & linguarum eruditae studia diu neglecta iacuere: Nec solum apud maiores nostros, verum & alibi, fatali quadam temporum conditione. Proinde non erat, unde nostrates ea discerent post acceptas cum religione Christiana literas, & cultum vitæ mitioris. Quo factum est, ut illi quoque, qui tunc docti habebantur, & erant, nihil propemodum literis mandarent, nec in publicum sibi edendum esse ducerent, si quid fortè exercitandi sui, aliorumue docendorum causa conscripsissent. Neque sanè expedita erat edendi ratio, cum careret Polonia typographis. Ita docto-
rum

rum virorum memoria cum ipsis pariter extincta est. Nunc certè, posteaquam animaduersum Eruditio. est, in precio esse linguarum, eloquentiæ, humanitatisq; studia, cupidè ea quoque nostrates amplexi sunt, sed ad usum civilem & vulgarem, magis, quàm ad gloriam. Non defuere tamen nostra hac ætate, neque nunc defunt, cum in studijs humanitatis & eloquentiæ, tum in omni genere doctrinæ magni quidam & excellentes viri, qui cum commoda vitæ honestissimis disciplinis, & gloriæ, siue utilitati publicæ posthabuissent, eò euaserunt, ut admirationi sint, si non suis, certè externis, incorruptiùs iudicantibus. Sed eos recensere nunc necesse non est. Nec medicinam posthabent, posteaquam ea vulgatis delicatiore & laxiore victus ratione morbis, in precio esse cœpit. In alijs minus elaborant, propterea quòd minus ea conducere videntur ad commoda & ornamenta vitæ comparanda. Non est enim nouum, plurimos mortales hunc finem studijs laboribusque suis statuere, patresque similes illius habere, de quo canit poëta quidam: Sæpe pa- Ouidius.
ter dixit, Studium quid inutile tentas? Rem Rei famili-
aris cura.
porrò familiarem diligentius curare non ita

pridem, & eodem prope tempore, quo bellorum incommodis vacui, luxum, splendoremque consecrari, cepimus. Sed in ea minor est vulgo parata tuendi ac dispensandi, quam acquirendi diligentia. Maiores quidem nostri comparandis diuitiis non magnopere incubuere, satis habentes, sine magna cura & labore, unde in diem prope modum, si non lautè, non durè quidè certè, nec parcè cum suis viverèt. Itaq; tràquilliores tunc

Temporū
diuersa ratio.

res domierant. Minus appetebatur alienum: Minus erat litium: Minus iurgiorum atq; cadium: Minus fraudium & periuriorum. Maior autem erat fratrum & agnatorum, cognatorum affiniumq; inter ipsos cōcordia, & beneuolentia. Maior nō modò parentum, sed etiam quorumuis natu grandiorum reuerentia. Perrara finium regundorum iudicia. Herciscunda verò familiaria nulla propemodum. Cæterorum enim cognatorum, aut vicinorum natu maiorum interuentu & intercessione componebatur, si quid vlla de re exortum erat cōtrouersie, quod ipsi inter se vicini vel necessarii transigere familiariter nequiuissent. Res militaris quoniam cum instituto gētis, tum temporum quadā cōditione in honore

Rei militaris studium

fuit

fuit superioribus atq; adeò omnibus ferè seculis, extitere multi virtute bellica præstantes viri, maxime nostra memoria, Non ita pridem extincti. Et quamuis in diuturna pace & ocio, extant etiam nunc nonnulli. Nec emarcuit vulgò in Polonis vigor ille animorum, laudisque bellica studium, si qua se vsquam offerat idonea virtutis exerenda occasio. Meditationem & exercitationem viri sapientes requirunt. Idque ideò fortasse, quia desunt virtuti sua præmia, & quod ignauo ocio & conuiuio plusculum indulgetur. Ad hac autem, & festas epulas conueniunt plerunque vicini & necessarii inter se ad vnum aliquè viri soli, vel pariter cum fæminis. Nec turpe habetur, puellas quoque interesse, & earum colloquia, conuiuia, choreasq; à iuuenibus frequentari, parentibus earum cognatis ve natu maioribus præsentibus: Atque ita plurima conciliantur matrimonia. Nec rarò in eiusmodi conuiujs simultates & inimicitia abolètur, & vel dissolutæ, vel nutantes amicitia redintegrantur. Quanquam intemperantioribus compotationibus interdum cruenta quoque pugna inter conuiuas amicos & necessarios accenduntur, iurgijs

Cōpotatio
num com-
moda & in
commoda.

K 4 plerun-

plerunque inter viliora seruitia coortis. Potantibus enim dominis, nec illa à poculis arcentur.

Luxus Polonorum.

Aequales haustus,

Quin illiberalis conuiuator habetur, cui curæ non est, ut seruitia conuiuiarum benè pasta ac pota sint. Quo fertiliores enim sunt hæ regiones, eò magis indulgent homines vulgò crapulæ prolixioribusque conuiujs, & computationibus, ita ut multi eum solum ducant fructum laborum atque diuitiarum suarum. Vigent autem passim inter mares computationes ad æquales haustus non solum in conuiujs, verum etiam in cauponis, ad quas vulgus computandi causa conuenire solet: Eoque prouecta est hæ licentia, ut quod profestis diebus partum est, festo die potando ferè prodigatur. Atque inde fit, pro serpente potandi etiam profestis diebus & ocij consuetudine, & inertia, ut angustiore re familiari utantur multi: presertim cum nemini cura sit, quid priuatus quisque gerat negotii, unde & quomodo sese sustentet: & fructuosa sit autem dominis & magistratibus illa potandi licentia. Etenim non exigua & tributorum & vectigalium publicorum iuxta ac priuatorum portio è cauponis corrogatur. Exolefcit tamen sensim apud

apud honoratiore illa ad æquales haustus potandi consuetudo, eorum studio, qui apud eas gentes, quæ humanitatem studiosius colunt, peregrinati sunt. Sed lautitia in victu potuque magis ac magis indies inolefcit. In cultu quoque corporis, vestiumque numero, varietate, ac precio maior luxus existit. Nec solum exoticis panis & pellibus, verum etiam serico, & purpura vestiri, & argento, auro, margaritis, gemmis exornari mos inoleuit, inferioribus quibusque præstantium genere, honore, vel facultatibus exempla cupidè amplectentibus, nullis autem legibus sumptuarijs modum in victu cultuque corporis cuiquam ordini aut homini præscribentibus. Quo planiora autem & absolutiora sint omnia, quæ de gente Polona persequimur, ordines & genera hominum describamus: Quæ descriptio rei publicæ quoque fundamenta continebit. Distinguitur populus Polonus partim genere, partim ex religione sumpto vitæ instituto. Ac genere quidem in equestrem ordinem siue nobilitatem, atque plebem distribuitur: Religionis autem instituto in sacrum & profanum ordinem. Liceat autem nobis eum, qui sanorum at-

L que

Ordines & status hominum.

que sacrorum administrationem non habet, profanum appellare, vulgò ecclesiasticū & laicum, vel spiritualem & secularem statum & ordinē vocitant. De his posterius: Nunc de nobilitate & plebe. Nobilitas Polona ad regimen atq; defensionem catera multitudinis regionisque se-

Nobilitas.

Milites & equites.

gregata est. Atq; inde qui sunt huius ordinis, antiquitus milites, nunc equites ferè ab equestri militia cui sunt obnoxij, à latinè loquentibus & scribentibus appellantur: Vernacula autem lingua Schliachta, à generis nobilitate, mutuato, nisi fallor, à Germanis vocabulo, (quasi geschle-

Ziemanie.

chter) vocātur, & Ziemanie, quasi agrarij, vel, ut vulgò interpretantur, terrigenæ, à terra & agris, quos ferè colunt & habitant antiquitus, hereditarios, preciove, seu principis beneficio partos. Habet autem nobilitas multas & mag-

Nobilitatis prerogatiua.

nas prerogatiuas, quæ partim regum & principum munificentia firmata sunt, partim moribus & institutis inualuere: Quæ magna ex parte partim opportunis locis huic, & historico operi à nobis inserta sunt. Regi quidem ea soli ferè subiecta est. Iudicatur tamen ad præscriptum legum & à magistratibus regni & regijs, quemadmodū post-

sterio-

steriore libro ostendemus. Ecateris, priuatis præsertim, nemo nobilitatem cum agris & pagis subiectam habet, nisi fortè in Russia antiquitus, & prisco ducum gentis iure. Habet etiam Cracouiensis Episcopus in Seueriensi ditione: Habet & Varmiensis, eiusque ipsius Ecclesie collegium: Quin & Plocensis Præpositus: Et alij fortasse. Licet tamen homini nobili siue equiti scultetiam, ut vulgò vocant, siue aduocatiam, in bonis alienis paganis iuxta ac oppidanis voluntate domini obtinere: (De Scultetijs autem & Aduocatijs posteriore libro dicemus) Licet etiam priuati conditione in urbem vel oppidum cuiuslibet commigrare, saluis personæ suæ prerogatiuis, nisi is decus nobilitatis amittat. Nobilitas porrò genere censetur, & meritis, adiuncto vita instituto. Habentur enim nobiles, quorum maiores aut parentes virtutis ergò in eum ordinem al-

Nobiles qui

iecti, militiaq; adscripti, & gentilicio signo donati sunt, quiue ipsi hac meruere virtute sua. Sed præstabilius habetur, nobilem natum esse, quàm factum. Nasci autem nobilem patre simul & matre nobilibus oportet legitimo coniunctis matrimonio. Quanquam nec plebeia

L 2 mater

Nothi.

mater liberorum nobilitatem minuit, dummodo pater sit nobilis. Nothi quamvis nobilibus & illustribus orti, non censentur in familijs, neque nobilitatis prerogatiuis fruuntur. Conferendi porro huius decoris, hoc est, nobilitatis, potestatem solus habet princeps: Idque vel suo ipsius iudicio & beneficio facit, vel interueniente testimonio, & quasi adoptione clarorum & principum alicuius familie virorum stemma & gentem suam cum eo, qui ita creatur nobilis, communicantium. Eiusmodi tamen creatis nobilibus obtinere & possidere bona terrestria statuto quodam nouo non licet. Sed posteritas eorum pari cum alijs natis equitibus iure esse incipit.

Nobilitatis amissio.

mittitur porro nobilitas decreto principis, ob admissum dedecus, & atrox aliquod facinus. Contaminatur etiam, & abdicatur quodammodo, si quis desertis militiæ & agriculture studijs, sordidum quæstum faciat arte mechanica, vel tenuiore, & minutioribus mensuris ac ponderibus utente mercatura, & cauponatione. Est autem pari dignatione Polonica omnis nobilitas:

Nobilitas æqualis.

Nec est ullum in ea patritiorum comitumue discrimen, exæquata quodam tempore omnium condi-

conditione. Nuper adeò paucis quibusdam, parentum, vel ipsorummet amplitudine atque meritis, & principum beneficio Comitum decus Comites. de uo partum est. Ducum, qui peculiare habent Duces. dominatus vel territoria, nunquam aliud genus fuit apud Polonos, quam id, quod à Boleslao Krimousto principe propagatum fuit, cum is principatum inter liberos diuisisset. Verum id iam defecit. Russi habuerunt antiquitus suos duces, habentque etiamnum ij, qui dudum Lithuanicæ ditionis fuere, aut sunt etiamnum, & Volynij. Neque enim subactis, vel in deditioem acceptis ea prerogatiua adempta fuit. De Prussorum & Curoniensium ducibus post attingemus.

Multæ sunt autem nobilitatis Polonæ gentes, Gentes & familiae nobiles vn. de appellatae sint. & quasi tribus, non locis, & regionibus, verum signis quibusdam gentilitiis, quæ arma & insignia vocant, eorumq; appellationibus distinctæ, quæ singulæ rursus multas stirpes & familias cognominibus & agnationibus distinctas complectuntur. Verbi gratia, Leliuorum gens, cuius signum est, noua luna supernè stellam inter cornua continens in cælestino scuto, Tarnouiam, Pileciam, Melstiniam, & alias nonnullas

Cognomi-
na nobili-
tatis vnde
& qualia.

honestas & amplas familias comprehendit. Signa verò gentilitia, siue insignia partim à rebus, quarum sunt nota, quemadmodum Topororū ab ascia, partim ab euentu, ut Ielitorum à visceribus transfixis appellationem habent: Plurimorum ratio obscura est. Nisi forte à primis cōditoribus gentium ea sumpta sunt. Neque enim olim, ut nunc, ab arcibus, villis & pagis, quibus dominabantur, denominabantur equites: Sed undelibet sumpta aut indita nomina, ad longam posteritatem, amisso etiam vel cōmutato patrimonio, rectè trāsmittebāt. Qualia supersunt etiā nunc multa cum alibi, tū in Submontano & Sciriciēsi tractu, & in Russia. Vt sunt Herborth, Dunin, Iordan, Gladis, Pienianscus, Pirschala, Omita, Farureius, & alia eiusdem generis. Nūc malunt pleriq; de arcium, oppidorum & pagorum nominibus deflexa paululum per denominationem in ski siue ki voce appellari. Ea verò deflexio vel adiectio syllaba à latine loquentibus & scribentibus in ius commutatur, ita ut à Choina Choinski, & pro eo latine Choinius, à Crasne Crasinski, & pro eo Crasinius, à Lasco Laski appelletur. Ceterum pro eo non Lascius, sed Las-

cus

cus dicitur. Quod nos in historia secuti sumus, perspicuitati orationis & externorum auribus inseruientes. Idem veteres historicos græcos & latinos in barbaris nominibus factitasse animadvertimus. Interdum autem sine hac deflexione vel adiectione, arcis vel oppidi, vel pagi nomen, unde quisque ortus, vel cuius dominus est, cum præpositione de, vel à, vel ab, vel in, cognominis loco usurpatur, à magnatibus præsertim & clarioribus: ita ut verbi gratia, in Tencin, vel à Gorca, vel de Felstein, quis appelletur. Observaturq; in his vulgò discrimen quoddam, non magis à Polonis, quam a Germanis & Bœemis: qui itidem vtuntur huiuscemodi appellationibus. In enim præpositionem ijs ferè attribunt, qui domini sunt locorum: cæteras, etiam ijs, qui inde duntaxat orti vel oriundi sunt, etiam si ibi non habeant, ubi pedem figant. Gentilitiorum autem signorum, quæ quidem quarendo inuestigare potuimus, appellationes hæc sunt: In quibus enumerandis ordinem primarum literarum & vernaculæ lingue sonum seruabimus. Abram siue Valdorff: Amadei: Bialina. Biberstein: Bodulia: Bogoria. L 4 Boitza:

Signa siue
insignia
nobilitatis
Poloniae.

Boitza: Brog: Bożestado: Buincia, siue Buincza:
 Byliny: Cioleke: Copaczina: Coumia: Cielantco-
 ua: Coruitz siue Bies: Choleua: Cotfitz: Corab:
 Corciak siue Corczak: Dambroua: Dambroua
 altera: Dembno: Doliua: Dolenga: Drzeuicz.
 Druzina: Driia: Dzialossa: Godziemba: Gosdo-
 ua: Grabia: Griph, quod est Suieboda: Gryzima:
 Grzimala: Habdanc: Herburthova: Helm: Ia-
 nina: Iastrzembiec: Ielita, siue Koslarogi: Iedno-
 rozec: Iunossa: Korsboc: Kerdei: Labentz: Larif-
 sa: Leliua: Liada: Leuart siue Leopardus: Lod-
 zia: Lzania: Lis, quod est Murza: Mozela:
 Morskicot: Mandrostca: Nalencz: Niesobia:
 Nieczuia: Nouina: Oliua: Osmarog: Odrou-
 vanz: Ostoia: Orlia: Olobog: Ouada: Oxa: Pi-
 laua: Pirzchala: Poualia siue Ogon: Poboze:
 Pogonia, Polucosia: Pravuda: Pomian: Prze-
 ginia: Prus: Prus alterum: quod est Nauilki:
 Profnia: Rana: Raduan: Roza: Rogala: Rucha-
 ba: Rolia: Scheliga: Slepouuron: Socolia: Serui-
 captur: Schilde: Staricon: Starza: quod est Osso-
 ria: Strzemien: Strzegomia: Sternberg: Srena-
 ua: Sulima: Swirczek: Sirocomlia: Schumberg
 siue Cotfizza: Svinca: Tarnaua: Topor: To-
 pacz:

pacz: Trzaski: Tramby: Varnia: Vienaaua:
 Vuczelie: Vieruffoua: Venzik: Vadoua: Vier-
 zinkova: Zaba: Zadora siue Plomien: Za-
 grobia. Duorum nomina non tenemus, Ea sunt
 alba aquila anterior pars dimidia à capite cau-
 data tenuis, erecta, cum duabus stellis à tergo: Et
 quinque rosa alba in quincuncem collocata. Vn-
 de, simul est ex gente Iastrzembecia ego mater-
 num genus duco: Pater verò meus est Pirzchalia
 est Osmarogia. Nihil autem vetat his nostrum
 quoque adiungere, quo me unà cum fratribus
 meis, est omni posteritate nostra optimus Rex
 Sigismundus Augustus ornauit, dimidiam a-
 quilam pectore tenuis, naturali colore, extensis
 alis, laurea corolla circum collum redimitam in
 rubro scuto impartitus. Cui Ferdinandus Rom.
 Imperator electus immortalis memoria dignissi-
 mus, cum legatione apud eum eiusdem regis no-
 mine in septimum annum fungerer, gentilitium
 Austriaca familia siue stemma, rubram in albo
 scuto teniam per transversum ductam subdidit,
 est duo nigrae Imperialis aquila capita galea coro-
 nata superposuit. Cur autem minus liceat cuipi-
 am à se parto, quam ab alijs relicto decore gau-
 dere

dere? Et haecenus quidem de nominibus gentium Polonæ nobilitatis nobis dictum sit. Signa, origines, familiasq; describere, longum & operosum esset, ne dicam infinitum. Antiquitus sparsim nobilitas in agris habitat, in sua quisq; villa, vel castello, vel arce, rem familiarem operis & laboribus adscriptitorum suorum vel mercenariorum curans, & agricultura, gregū, armētōrū, & apiariorū fructu, itemq; venatione & aucupio nō modo sustentans sese cum domesticis suis familijs, verum etiā honestas diuitias comparans vendēdis ijs, quæ supersunt vsui domestico, quæq; desunt inde vicissim comparandis. Matres autem familias, & puella nobiles lanificium, & linum, canabumq;, & rem pecuariam tractantes non dedecet vendere ea, quæ ex huiusmodi re familiari & fructibus eius supersunt vsui domestico. Quin & culinæ curā ea gerunt, exceptis illustrioribus & senatorijs, quæ hac pleraq; dedignātur, aut pedissequarum opera peragunt. Iter facientes, fœminæ quidem carpentis, vehiculis, aut curribus vehuntur: Mares verò vel iisdem, vel equis potius pedestrem incedere per viam, longiorē præsertim, minus honorificū vulgò

Nobilitatis
habitandi
& viuendi
ratio.

Fœminarū
rudia.

vulgò habetur: nisi paupertas necessitatem imponat. Iam autem lautiores & elegantiores de nobilitate in urbibus domicilia figere, villis & rusticis prædijs relictis, incipiunt. Prodeuntem in publicum nobilem virum iuxta ac fœminam ^{Comitatus} asseclis maribus, fœminam verò etiam puellis pedissequis stipari, honorificum habetur. Et in eū vsus alit quisque domi suæ famulitium pro modo facultatum: idque simili figura & colore vestium, non sine sumptu & luxu vestiri vsitatum est. Aluntur & equi complures. Equitantes enim aut vehentem herum famuli honoratioribus non nisi per urbem, vel ad suburbana pedestres asseclantur. Ac Senatores quidem primarij pedestres iuxta ac equestres, medijs ferè inter asseclas mares incedunt, honoratioribus antecedentibus, cetera verò turba cum pueris subsequente. In cetera nobilitate asseclæ omnes heros sequuntur. Matronas autē & puellas nobiles mares quidem antecedunt, fœmine subsequuntur, præter filias, & quæ in filiarum loco habentur, & sorores puellas, quæ secundum antecambulones proximè matrem vel sororem præcedunt. Spectatur autem in famulis & pedissequis ^{Famuli & pedissequis}

cum usus ad ministeria, tum statura, forma, elegantia & genus. Nec deest copia equestrum ac nobilium iuuenum, qui vel studio civilitatis, prudentiaq; usu rerum comparanda incitati, vel tenuitate fortunarum adacti, vel praesidij contra vim potentiorum sibi suisq; comparandi causa, non modo in magnatum & episcoporum, sacerdotumq; ac doctorum clientelas, verum etiam in parium, ac tenuiorum inferiorumq; nonnunquam, eorum praesertim, qui magistratus gerunt, aut aliquo sunt numero in aula principis, aut opibus, industria, eruditione, gratia, ve populari valent, affectationem & ministerium parua, vel nullo mercede à parentibus & propinquis traduntur, vel ipsi sese addicunt. Duratq; ea servitus, quoad utriusque, hero, inquam, & seruo sine clienti placet. Multi etiam de ditioribus necessariorum & amicorum liberos pio quodam & honesto iuventutis educanda studio ultro sibi in familiaritatem & ministerium adsciscunt. Ad eundem modum & foeminae foeminis famulantur. Nec pudendum aut dedecori affine est genus hoc servitutis, sed liberale & sociabile: Nec rara est in eo vicissitudo, ita ut eum quis habeat

in

in ministerio, cuius parentibus ipse servaverit: Honestaq; habetur haec iuventutis equestris educandae ratio, equabilitatem quandam etiam in equalibus fortunis continens: Et multos ex humili loco ac tenui fortuna non modo ad mediocres, verum etiam ad summos nonnunquam honores, amplissimasq; facultates & opes ipsorum virtus, herorumq; beneficentia prouehit: idque maxime conciliandis luculentis coniugiis, vel sacerdotiis. Honestatis magna semper à nobilitate ratio habita est. Fraudem facere, promissum fallere, peierare, mentiri, probrosum & infame semper habitum est, atque etiam nunc habetur, quamuis in maiore, quam olim, habendi studio & licentia. Quod si quid eiusmodi in probro loco cuiquam obiiciatur, praesertim ab eiusdem ordinis viro, non tam legibus & magistratum iudicio & auctoritate, quam ferro manuq; vindicatur. Dissimulare quidem probrosum habetur. Locitamen ratio ducitur. Plebeis minor est

Nobilitatis
studia.

Plebs.

mulierum, quàm virorum, nullo ferè sexus discrimine, nisi quod fœminæ opificia non exercent, neq; vecturam: neq; negociandi gratia peregrinantur. Vicina tamen oppida intra fines regni adeunt, domiq; negociantur. In iudicio standi ius plebeij, qui non habent. In plebe autem numerantur, quicunque nobiles siue equites non sunt, siue sint agricolæ, olitores, apiarij & pecuarii, siue opifices & operarii, siue caupones, propole, vectores, & mercatores, & siue in agris, quemadmodum superius attigimus, pagis, atq; vicis vitam degant, siue in oppidis & urbibus. Ac urbe: quidem & oppida à mercatoribus, opificibus, & propolis habitantur. Vici autem & pagi, & suburbana prædia ab aratoribus, olitoribus, pecuariis & apiariis. Caupones verò, molitores, operarii, vectores, iumentorumq; locatores, utrobique sunt. Sunt autem aliquanto meliore & liberiore conditione urbani & oppidani, quàm agrestes. Ac census quidem annuum utriusque dominis suis pensitant, verum agrestes & vicani plerique omnes operas præterea gratuas ad colendos eorum agros, & alios usus domesticos, non solum manuaras, verum etiam cum iumentis ipsi, per se

Vibanorū
& agrestium
discrimen.

se, vel per mercenarios & operarios suos præstant. Nec aliò cuiquam commigrare inconsulto domino licet: ita ut videantur esse gleba adscriptitii, nec multum à seruis differant, præsertim ut nunc sunt tempora. Cmiecie seu Cmetones vulgò vocantur. His autem deteriore conditione sunt hortulani, qui hortos colunt. Vtriq; Chlopi appellantur: Quam appellationem, velut probrosam, non fert nobilitas. Habent sanè in eos domini vitæ necisq; potestatem: præter eos, qui ab ineunte ætate literarum studiis, sacrorumque ministerio sese addixerunt. In plebe urbana non desunt, qui rem lautiores per famulos & vicarios administrantes, ipsi ocio, honestioribus studiis, vel delitiis vacant. Multi lautius & sumptuosius victitant: Atque inde crescunt rerum precia, & non pauci ex iis ad egestatem rediguntur. Et hæcenus quidem de nobilitate & plebe. Iam de sacro siue ecclesiastico ordine. Quod ut planius fiat, de religionibus prius

Religio &
pietas Po-
lonorum.

pauca attingamus. Christianam religionem Polona gens, abiectò semel impio demonum cultu, sexcentis amplius annis constantè retinet, religioseque colit, hereticarum novationum

Hereses in
Polonia.

insolens & impatiens ante nostram statem. Nuper adeo nostra memoria Lutherana primum, mox etiam Berengariana seu Caluiniana labes à mercatoribus, & bonarum literarum studiosis iuuenibus, leuitate animorum, & curioso studio nouitatis inductis peregrè inuecta, multorum animos infecit. Quod olim etiam de Husitica & Viclefica extremis Vladislai Jagellonis regis, & primis filiorum eius Vladislai, & Cazimiri temporibus (cum horum iuxta ac illius aetas contemneretur) vsu venire cœperat. Sed principum & episcoporum virtute, auctoritate, studio, ac diligentia, ceterorumque procerum pietate, grauitate, & constantia malum altius radices agere permissum non est. Itaque retinuerunt ij tunc cum prisca religione etiam dignitatem auctoritatemque suam, & rempub. Quae qui nunc viuunt, utinam posteris etiam suis relinquunt. Iam autem non solum ille, quas dudum memorauimus, verum etiam Picardorum, Anabaptistarum, Arianorum, Pneumatomachorum, Trideitarum, Photinianorum, Ebionitarum, Recutitorum, & nescio quae non pestes, pro nefas, Poloniam, laxatis semel licentia habentis,

benis, agminatim inuadunt, & prae-textu, seu verius abusu libertatis, praecuntibus nonnullis de nobilitate, sibi quisque religionis magister, atque adeo rex & lex esse incipit. Sed haec alibi prolixius deplorauimus. Prussi aliquanto posterius Christo nomina dedere: Citius autem & cupidius Lutheranismum dogma amplexi sunt, urbani praesertim, & qui sunt Germanici sanguinis, propter mercatorum & opificum Germanorum frequentiam & commercia, & lectionem librorum importatorum à Germania. Quum enim eacolluies hominum quasi ad pileum vocata, semecclesiastica disciplina iugum excussisset, à magistratibus siue timore, siue peruersa animi inductione, & ob iusiurandum praceptoribus suis in Germania datum, eodem inclinatis, imò redemptis etiam, non modo non repressa est, sed magis etiam confirmatur & incitatur. Multi tamen adhuc pia maiorum instituta retinent, praesertim ubi magistratus officium suum faciunt, alienum non usurpant. Masouij tenaciores antiquae religionis & pietatis, à profanis nouationibus fermè abhorrent. Abhorrent etiam Russi. Gracos autè hi sequuntur, quos ab initio

Prussorum
religio.

Masouiorum
pietas.

Russorum
religio &
schisma.

N

religio-

religionis magistros habuere, & cum ijs à nobis, hoc est, à Romanæ & catholice ecclesie consensu sese per sacrilegum schisma præcidunt tanta pertinacia, ut nihil commune habere velint cum Latini. latinis. Sic enim nos appellant, qui in cultu diuino publicè latina lingua utimur, & cum sapientiss. & sanctiss. maioribus ipsorum Græcorum iuxta ac nostris summam Romani pontificis dignitatem & auctoritatem in uniuerso Christianorum populorum cœtu agnoscimus. Nec in multis præterea à nobis ij dissentiunt: & quidem ritibus & institutis ecclesiasticis magis, quàm dogmatibus religionis. Vulgant autem diuortia, quamuis leui de causa. Plurimi tamen ex ijs, ex quo tempore Polonorum ditione tenentur, ad nos & Romanæ ecclesie societatem & instituta transierunt, eodemq; cum cæteris Polonis iure sunt. Armeni. Armeni oppida quedam Russia Podoliaq; incolentes, suis & ipsi ritibus suaque lingua in sacris utuntur. Non abhorrent ij tamen sicut accepimus, à Romana ecclesia & Rom. pontifice: Iudæi. Quin principatum eius in uniuersa Christi ecclesia agnoscunt. Hebræi verò, quibus aliunde pulsus, Russia & Lithuania, ac totius ferè Polonix

nia oppida referta sunt, suam retinent religionem: nisi forte superstitio vel impietas ea potius dici debet. Feruntur etiam Tatai. Tatai. Tatars Ceremissi in uno aut altero oppido Podolix suis uti ritibus & impietate Mahometana, quemadmodum & Lithuanici. Quorum indelubro apud Trocos nihil præter pileum turbinatum, qualibus vulgo ea gens utitur, in suggesto editiore positum ante multos annos aspeximus. Sed mittamus barbaros incolas, cum falsis suis religionibus, & ad institutum nostrum reuertamur. Tam apud Russos igitur, & Armenos, quàm apud Polonos, qui Christi Dei, ac magistri nostri institutis cõuenienter pietatem colunt antiquitus, certus est sacer & co-
clericalicus
ordo. ordo eorum hominum, qui religioni sacrisq; peculiariter moderantur & inserviunt, non genere, sed eorum, penes quos eius rei potestas est antiquitus, & iam inde ab temporibus apostolicis (Episcoporum inquam) auctoritate, segregatione, & initiatione siue consecratione à cætera omni multitudine distinctus: quem sacrum & ecclesiasticum & spiritualem dici supra memorauimus. In quo non modo episcopi & sacerdotes verum etiam cæteri sacrorum administri,

Plebei ar-
cētur à nō
nullis ho-
noribus ec-
clesiasticis,

& monachi monacheque censentur, è plebeio iur-
ta ac equestri ordine allecti. Vtrisque enim an-
tiquitus iam inde ab initio patuit aditum ad hūc
ordinem. Patrum demum, aut auorum nostro-
rum memoria ab episcopalibus non tam functio-
nibus, quàm sedibus, & primarijs quarundam
opulentiorum basilicarum, siue ecclesiarum, ut
vulgò vocant, cathedralium honoribus, qua
prelaturæ & canonicatus dicuntur, plebei (the-
ologis, iureconsultis, & medicis aliquot exceptis)
excludi cœpere. Quod iam ad Abbantias quoque
& monasteria (ubi ex professo mundana omnia
abdicantur) inducitur. Secernitur etiam sacer-

Sacri ordi-
nis distin-
ctio.

Res num-
ria,

ordo vestitu & cultu corporis à cetera multitu-
dine: Sed & inter se non modò à ceteris sacerdo-
tibus episcopi, & ab utrisque monachi, verum
etiam ipsæ inter se monachorum & monacharū
sectæ partim figura, partim colore vestium, par-
tim toto vitæ instituto distinguuntur. Quæ
quoniam communia sunt Polonis cum ceteris
Christianis populis, persequi hic prolixius ne-
cesse non est. Proinde distinctis ordinibus, reli-
quam reifam Polonicæ rationem paucis conclu-
damus. In magna rerum omnium copia, ut fit,

maior

maior aliquanto fuit superioribus temporibus,
quàm nunc est, argenti & auri, rei quæ numariæ
penuria, præsertim cum auri & argenti metalla
nulla extarent, & minus nota essent nostris ma-
ioribus transmarina mercimonia. Neque pro-
prium habebant numum Poloni, sed externis &
maximè Boëmicijs vsi sunt aliquandiu. Cœpit
deinde ante ducentos, ni fallor, annos à Cazimi-
ro magno reges & argentum signari ad exem-
plum Boëmorum. Aureos verò numos primus
omniū Sigismundus rex huius Sigismundi Augu-
stipater nostra memoria signauit, bonitate &
pōdere Vngaricorū. Tametsi Alexandri quoque
fratris eius aureum numum vidimus. Sic au-
tem creuit iam auri precium, ut prope duplo ca-
rior nunc sit aureus numus, quàm fuit auorum
nostrorum memoria. Id adeò, partim propter
luxum, & crebriorem auri vsum, exportatio-
nemque ad exteros, partim quia deterior nunc es-
se fertur reliqua moneta, cum ponderis diminu-
tione, tum æris admixtione. Est autem ea mul-
tiplex. Ac grossus quidem argenteum numisma
est cum admixto ære, olim vicesima octaua,
nunc, quinquagesima secunda vel tertia, imò

Moneta.

Aureus.

Grossus.

Copa.
Marca.
Florenus.
Ferto.
Scotus.

iam quarta & quinta pas aurei Vngarici, sexagene siue copæ sexagesima, marcæ quadragesima octaua, floreni tricesima, fertonis duodecima, scoti verò dimidia. Sic vulgò dicuntur pondera siue genera, quibus pecuniam numeramus & computamus. Sunt & minores grossonumi. Medians quidem grossi dimidium, nona ferè parte superans cruciatum Germanicum, sed iam exæquatus. Solidus tertia pars grossi, ternarius sexta, obolus verò decima octaua. Atque hi quidem nunc erei sunt inalbati: Superiori tēpore habuerunt admixtum argentum, vt etiam nunc habent grossi & mediantes. Argentei verò sunt trigrossus ac segrossus, hic quidem sex, ille verò tribus grossis æstimatione par. Vtrumque primus signauit Rex Sigismundus senior, Sed iam pauci extant: Exportantur enim, & conflantur ab auaris Iudæis, mercatoribus, & argentarijs apud gentes finitimas. Permagnum est autem etiā nunc apud nos vsus externa moneta, qua pro mercibus vndelibet importatur. Magna sunt enim nunc, si vnquā aliās, Polonis variarum rerum cum ceteris gentibus cōmercia: Quanquā commutatione mercium permul-

Mercimonia.

ta

taperaguntur. Exportantur autem in primis, Quæ exportantur. siligo, triticum, ordeum, auena, & alia legumina, linum, lupulus, coria boum, sebum, aluta, mel, cera, succinum, pix, cinis, mali, asseres, cæteraq; materies fabricandis nauibus, & ornandis domibus apta: Cereuisia quoq; & herba quedā tingendis lana & serico idonea. Iam verò & boum, ver uecum, & equorum permagna vis nō modo finitimis, verum etiā remotioribus populis suppeditatur. Ac equi partim propter pernicitatē, & laboris, incommodorumq; tolerantiam, partim propter molliorem incessum à remotioribus etiam populis expetuntur. Importantur autem Quæ aliunde importantur. vicissim aliunde panni non modo sericei & aurei, sed etiam lanei lineique subtiliores, aulea, tapetes, & alia parietum, equorum, & hominum ornamenta, quorum opificia minus exquisita sunt apud Polonos, licet non desit materia, & alijs gentibus suppeditetur. Margaritæ item, & gemmæ, & pelles sabellinæ, pantherinæ, siue lupiceruaria, hermellina, mardurinæ, murium ponticorum, vulpinæ, lupinæ, ursina, & aliarum ferarum, quarum maiorem copiam produciunt interiores Septentrionis

N 4

Oriē-

Orientisque sylux. Husiones quoque siue Mari-
ani, & haleces, & alia salsamenta, & vento vel
sole durati pisces marini. Adhæc argentum, as,
orichalcum, & chalybs cum facta, tum infecta.
Boum etiam copiam auget vber pascuis Vala-
chia, siue Moldavia, & Bessarabia: sicut equorū
Vngaria. Vina plurima ex eadem Vngaria &
Moravia: Ex Austria, Rhetia, Slauonia, Ita-
lia, Creta, & Grecia importantur etiam, sed
pauciora. Gdanum autem Renense & Gallicum
& Hispaniense, Canariense quoque, & Creti-
cum nauibus aduehitur. Porrò aromata, & va-
ria eduliorum condimenta atque cupedia, quæ
vnà cum vino, & pannis aureis ac sericeis gen-
tem hanc atque regnum vehementer exhauri-
unt, de longè ab oriente & occidente importan-
tur. Harum autem rerum atque mercium ex-
portandarum & importandarum commercia
sunt Polonis, maritima quidem cum accolis si-
nus Venedici & Oceani Germanici, Pomerani-
nis, Mechelburgensibus, Holsacijs, Danis, Fri-
sijs, Hollandis, Brabantis, & alijs Belgis, Gallis,
Limonibus, Moschis, Sueonibus siue Suetis,
Noruegijs, Anglis, Scotis, Hispanis etiam &
Lusita-

Populi cū
quibus cō-
mercia sūt
Polonis.

Lusitanis. Itemq; per Pontum Euxinum cum
gentibus Turcica ditionis: Terrestria verò
cum Germanis, Morauis, Silesijs, Boëmis, Vn-
garis, Italis, Moldauis, Moschis, Armenis, at-
que Turcis. Sed iam hunc librum claudamus,
altero reipub. Polonæ rationem descripturi.
Ac primum quidem de Magistratibus & mu-
neribus publicis persequemur: deinde verò
iudiciorum, comitiorum, & belli ra-
tionem explicabimus, sic tamen,
utrobique, ut Prussos ad cal-
cem operis vitanda
perplexitatis cau-
sa reseruemus.

(:.)

O

P O L O -

POLONIAE
MARTINI CROMERI
LIBER ALTER.

De Republica & Magistratibus
Polonorum.

Monarchi-
am Poloni
amplectun-
tur.



DE tribus primis & simplicibus rerum publ. formis, quæ vel unius, vel paucorum imperio, vel multorum omniumve quadam æquabilitate iuris continentur, unius principatum Poloni semper, præter duo quadam tempora, de quibus in historia memorauimus, amplexi sunt, bonis plerunque & moderatis, & à tyrannide alienis vsi principibus. Fuitque contenta Polonia principis siue Ducis nomine & imperio, donec Otto tertius eius nominis Imperator Rom. Boleslaum cognomento Chrobrum (Chabrum vulgò vocant) paulò post susceptam religionem Christianam: hoc est, anno post Christum natum millesimo & primo, regio diademate & honore dignatus est. Nec tamen ultra quartum regem tunc

is

Hist. Polo.
lib. 2.

Regni Pol.
origo.

Hist. lib. 3.

MART. CROM. LIBER II. 95
is honos mansit apud hanc gentem. Nam post alterum Boleslaum, prioris illius pronepotem, ducentis amplius annis, principes Polonorum regio nomine abstinuerunt. Deinde verò anno Christi 1295. reuocatum & renouatum id in Pramislò, manet in hanc diem: Et quidem ad externos plerunque liberis liberi populi suffragijs delatum, cum antea Poloni externum principem non habuissent: Ac neque ex alia familia per quadringentos amplius annos, quàm ex ea, quæ à Piasto duxit originem. A centum & amplius octoginta annis regnavit perpetua successione Iagellonia magnorum ducum Lithuanie progenies. Non hereditario tamen, sed electionis iure. Fuit autem initio liberior dominatus principis, & nullis propemodum legibus adstrictus, infinitam non modo omnium rerum, sed etiam vitæ necisque omnium potestatem habens. Post susceptam verò publicè religionem Christianam, tempera re accipit primùm pijs monitis atq; doctrina episcoporùm & sacerdotùm (quibus nunc præclara scilicet referatur gratia, tunc permagna erat eorùm dignatio & authoritas) ac caterorùm Christianorùm populorùm

Hist. lib.

Regni re-
sumptio.
Hist. lib. 11.

Hist. lib. 14
& 15.

Principis
potestas.

O 2 imita-

Regiae po-
testatis fi-
nes.

imitatione & moribus. Deinde verò bellatricis nobilitatis meritis & obsequijs: fortassis autem & contentionibus multa de suo iure remittentibus & indulgentibus equestri ordini regibus & principibus. Nunc sanè angustis finibus regia potestas in sacrum & equestrem ordinem, & utrique subiectos homines atque bona, circumscripta est: Ac in sacerdotes quidem iam inde ab initio suscepta religionis Christiana rex nihil prorsus iuris habet: De equitis verò capite & fama, non nisi in comitijs cum Senatu iudicat, certis aliquot causis exceptis: Senatu autem inconsulto neque bellum cuiquam facit, neque fœdus publicè cum quoquam icit, neque tributa, vectigalia, ac telonia nova instituit, neque alienat quicquam de bonis regni, neque rem ullam maiorem ad rempubl. pertinentem statuit, aut facit. Porro leges novas condere, pecuniam extra ordinem publicè imperare, monetam signare, successorem sibi designare, ne cum Senatu quidem potest absque consensu cateræ nobilitatis, siue equestris & militaris ordinis: De quo ferè magistratus etiam publici & Senatores leguntur: ita ut penes eum ordinem nunc sit propemodum

dum summa reipubl. Itaque nunc regnum & respubl. Polonorum à veteri Lacedemoniorum, vel huius temporis Venetorum reipubl. ratione non multum differt. Ius creandi regis penes Se-^{Regis electio.} natum est, de quo paulò post dicemus. Atque id etiam equester ordo sibi vindicare cœpit, ita ut tum demum in eo ratum sit senatus iudicium, si assentiatur cætera nobilitas. Non temerè tamen disceditur à stirpe regia mascula, si qua extat. A nouo rege iusurandum exigitur in hanc senten-^{Iusurandum legis.} tiam, Quod secundum leges & instituta maiorum regnaturus sit, & suum cuique ordini & homini ius privilegiumq; & beneficium, à prioribus regibus collatum, saluum conseruaturus, neque de regni finibus & bonis quicquam diminuturus, quin amissa etiam ab alijs pro virili sua recuperaturus. Vicissim autem senatus omnis in verba eius iurat. Inauguratur autem (si tamen hoc verbo uti fas est) olim quidè in Gnes-^{Coronatio} nensi, nunc verò in Cracouiensi basilica ritu solenni Christianorum ab Archiepiscopo Gnesnensi sacris operante, ac duobus proximis episcopis: unctusque inter scapulas sacro oleo ante aram maximam, ubi etiam sacrosanctam Eu-
O 3 chari-

charistiam venerabundus accipit, & corona aurea redimitus, accepto in dextram sceptro, & in leuam pomo aureis, in editiore solio ex tempore p̄parato collocatur, omnibusq; ritè peractis coronatus in regiã reducitur. Postridie p̄pa itidẽ solenni coronatus in forũ urbis equo vehitur, senatoribus equestribus, episcopis quidem ponẽ sequentibus, profanis verò antecedentibus longo ordine. E quibus tres primores pomũ, sceptrum, & strictum gladium proximè ei præferunt. Ibi erectum ex tempore tabulatum sublime cum ijs pedester conscendit, & in editiori solio collocatur. Sedentẽ senatus paulò inferior ordine circũsistet. Deindẽ assurgens ille, versus quatuor mundi partes gladium vibrat, rursumq; residens, eius contactu siue leni ictu inter scapulas cuiusq; nobiles & equites auratos creat: quod perinde est, ac si baltheo militari donet. Urbani autẽ & oppidani magistratus in verba noui regis iurant. Inde ritè peractis omnibus, in arcẽ cũ eadẽ pompa reditur, & festis epulis indulgetur. Nec multo diuersa est reginae inauguratio: qua fit presente, deducẽte, & postulante pro ea rege. Deducit autẽ eã coronatã etiã ad forum rex ipse quoq; corona-

Regine coronatio.

tus

tus cum simili pompa. Sed non iuratur in verba reginæ, nec ei desertur vlla potestas aut iurisdictio. Vectigalia principis aliquanto luculentiora & ampliora olim fuere, quàm nunc sunt. Pensitabant enim ei omnes agrestes & adscriptitiij quot añis tributum poradline, quod nos rastrale dicere possumus (Regale etiã vocatur) in iugerum, seu laneum & mansum, ut vulgò vocant, duodenos grossos, & quidem latos siue Pragenses: qui dimidio eos, qui nunc sunt in vsu, grossos vernaculos excedunt. Quin si bonitatem & pondus argenti spectes, quadruplo, quemadmodum earum rerum periti affirmant, melior tunc erat grossus quàm nunc est. Pensitabant & alias quasdam cum numarias, tum pecuarias, frumentarias, auenarias, & aliarum rerum pensiones: nec modo agricolæ, sed & oppidani. Quin & equites siue milites non penitus immunes erant. Et iumenta autem hi ei, quacumq; iter faciebat, alijs secundum alios suppeditabant, & canes cum venatoribus eius alere necesse habebant. Ne monastica quidem & alia ecclesiastica bona initio prorsus erant libera ab huiusmodi oneribus ac tributis: Quorum appellationes videre licet in

Vectigalia principis.

Poradline siue rastrale tributũ.

Grossi Pragenses siue lati.

O 4 vetu-

Pensionū
piscarum
nomina.

vetustis principum diplomatis: Nempe prze-
vnod, po vuos, stroza, stan, po vuoloue, targoue,
Croua, pod vuody, Voginia, Narzas, sep, pod-
vuorouue, Opolia. Libera autem principi erant
ubique piscationes atque venationes: Alijs non
erant, ne in suo quidem cuiquam fundo, absque
peculiari principis indulgentia. Multæ quoque
maleficiorum principi dependebantur. Qua
cum ita essent, cumque permagna esset rerum
omnium ad victum pertinentium vilitas, &
necdum maritima cum externis populis com-
mercia extitissent, aut vulgata essent, non di-
straherentur fruges, & alij fructus pradiorum
principis, quæ ex pensionibus in cellam eius
comportata erant, neque ad unum aliquem to-
tius regni locum (quod non sine graui agrestium
pressura futurum erat) conuehebantur: sed in
prefecturis asseruabantur. Cumq; ad officium
principis pertinere existimaretur, non desidem
& uni alicui loco affixum habere, sed obire omne
regnum, & fines eius tueri, & omnium vsibus se
se exponere, querimonias afflictorum audire, ius
dicere, tenuiores à potentiorum iniurijs vindi-
care, quoquo is venerat cum equitatu & comi-
tatu

Princeps
Poloniam
obibat.

tatu suo aulico, eius prefectura fructibus & pro-
uentibus alebatur, quoad ei manere ibi libuisset,
opusve esset, siue quoad horrea celleque suffice-
rent, seu denique descriptis cuique prefecto pro
ratione prefecturæ, & prouentuum certis tem-
porum spacijs. Atque hoc illud est, quod scripto-
res quidam externi rerum Polonicarum impe-
riti ante nostram memoriam in eam partem ac-
ceperunt, & literis mandarunt, quasi rex Polo-
nus egestatis causa regnum suum obire perpe-
tuo necesse habeat, quo à suis hominibus quasi
precario sustentetur. Caterum postea cum prin-
cipes vel certo se loco continere, vel bellis disten-
ti peregrè diutius abesse cœpissent, dicti trahi cœpe-
re fructus pradiorum, qui prefectorum cum sua
cuiusque familia moderatis vsibus superessent.
Remissa sunt deinde principum beneficentia sa-
cro & equestri ordini, & utriusque adscripti-
tis & subditis pleraque omnes pensiones & one-
ra. Nunc sanè equestris & ecclesiastici ordinis
homines nihil regi pensitare necesse habent. Ac
ne oppidani quidem eorum, aut agrestes adscrip-
titi, præter binos grossos vernaculos de manso,
sive laneo (quæ idem sunt) pagano, & eo quidem

Error quo-
rundam
scriptorū

Vestigialū
imminu-
tio.

Cmetones.

Rastrale si-
ue regale
tributum.

P solo

solo, quem adscriptitius ipse sibi colit. Nam qui sacerdotibus & equitibus coluntur, itemq; suburbanis & scultetorum (de quibus post attingemus) agri ab ea quoque pensione immunes sunt,

Opera subditorum sacerdotum & equestrium.

Ne subseruiunt quidem principi sacerdotum & equitum homines agrestes & oppidani, praterquam ad arces tempore belli reficiendas, atque etiã nouas, si id è senatusconsulto fiat, cõdendas.

Stationes.

Non ita pridem abbates & Præpositi monasteriorum certas pensiones, quæ Stationes vulgò dicuntur, regi denuo pensitare cœperunt. Adscriptitij quoq; ipsorum ad colendos principia-gros, subuectiones, & pensiones quasdam frumentarias reuocantur, quo præfectorum regionum præsidio tutiores sint ab iniurijs improborum.

Metalla.

His autem exceptis, soli præfecturarũ adscriptitij in suis quiq; præfecturis agros colendo, & vectigalia pensitando rem familiarem principis sustinent: Quæ nunc tamen aliquanto exquisitius curatur, quàm olim. Habet is etiã è metallis mediocre vectigal. In iis autem conductitiarum operarum usus est: Quarum impensa deducta, reliquum cedit principi. Omnium verò metallorum in Polonia fructuosissimæ sunt salina.

Sed

Sed habet in iis equester ordo hanc prærogatiuã, ut in usum suum domesticum statis anni temporibus aliquanto minoris emat sale, quàm ca-

Nobilitatis prærogatiua in salinis.

teri homines. Et teloniis quoque mercium & vectorum prouenit vectigal principi. Caterorum hominum nemo ius ullum habet instituendi & exigendi telonii, prater peculiarem regis indulgentiam: idque ob necessariam extra ordinem refectionem viarum, pontium, & aggerum. Cæterum nautum à traiectu fluminum in suo cuiq;

Telonia.

solo instituere licet. Duplex autem est telonium: vetus & nouum. Ac vetus quidem exile est, quod ab iis penditur, qui intra fines regni negotiantur. Nouum verò maius aliquanto, quod bouum, equorum, coriorum, frumenti, lanæ, cere, sebi, & aliarum mercium, quæ ad exterarum oras exportantur, & earum, quæ aliunde importantur nomine pensitatur. Vtriusque immunitatem habent ecclesiasticus & equester ordo, modo ne mercaturã quis exerceat, hoc est, venum ea exportet, quæ ipse aliunde emerit, ac non de suo pararit. Si quis tamen boues emptos suo pabulo & frumento per hyemem aluerit, perinde habetur, ac si domi eius nati sint. Publicè quoque ciui-

Telonium vetus & nouum.

tates nonnulla habent immunitatem veteris telonij. De nouo fuit superiori tempore controuersia inter equestrem ordinem atque regem. Hac igitur nunc sunt perpetua principis vectigalia: Quae distrahere, aut addicere cuiquam iure hereditario rex, Alexandri regis lege prohibetur. Atque ea lex neglecta post, & ante paucos annos acerbius reuocata, multos conturbauit, & non exiguos motus excitauit: qui nondum prorsus sopiti sunt. Extra ordinem nihil à quoquam, nisi forte à Iudæis, regi pensatur. Ex his autem vectigalibus is cum domestica familia sua sese sustentat: inde comitatu suo aulico stipendia prabet: inde in legationes, dotes, & elocationes filiarum, arcium praesidia, & sartatecta, viarum publicarum refectiones, machinas & apparatus bellorum, praemia bene merentium de se ac de republ. & in alios usus impendit: Inde & senatoribus ferè, ac magistratibus publicis, & nonnullis sacerdotijs certi ac perpetui redditus antiquitus constituti sunt, partim pietate & beneficentia principum attributi, partim accepto in usus necessarios precio venditi. Et haecenus quidem de principe siue rege ac vectigalibus e-

Alienatio-
nes regi in-
terdictæ.
Alexandri
R. statutū.

Impensæ
principis.

ius.

ius. Iam de legibus. Legum scriptarū nullus fuit usus apud Polonos vetustioribus temporibus: Nec vlla extant antiquiores ijs, quas Cazimirus magnus rex condidit: Quae sanè paucula sunt. Nec multa ijs à successoribus eius adiectæ sunt. Extremis demum ferè temporibus Sigismundi senioris, & regnante filio eius Sigismundo Augusto magis ac magis exarsit, & longius progressus est pruritus & libido nouarum legum condendarum, & antiquiorum mutandarum. Quos fit, ut hæ propemodum exoleuant, nouæ autem vix, aut ne vix quidem inoleuant: sed vtræque, hæ quidem nouitate, illæ verò vetustate sua in contemptum vulgò veniant, maxima rei publicæ perniciæ. Earum autem condendarum potestas est simul penes regem, senatum, & nuncios nobilitatis nec nisi in comitijs. Statuta regni vocantur. Priscis temporibus viua lex erat Rex siue princeps: Qui cum vnus in tam amplo regno omnia neque præstare, neque pro-uidere, ac ne iudiciorum quidem difficultates rectè explicare posse videretur, & lubricus autem procliuisq; ad tyrannidem gradus in summa potestate esse soleat, adhibiti sunt ei Senatores siue

Leges Po-
lonorum.

Consiliarij
siue Senatores regni

P 3. Consi-

Consiliarii, qui & consilia actionesq; eius ad salutem reipubl. & iudicia ad iustitiam & equitatis trutinam dirigerent, & monitis consiliisq; salubribus, quasi viuis quibusdā legibus pro re nata cum animum eius informarent, tum potestatem modificarentur. Hic est Senatus Regius, multo amplior modo, quam olim, certo hominum numero constans, quos Senatores & Consiliarios regni appellamus. Qui non nisi iurati ad hoc collegium, & ad consilium admittuntur. Et perpetuum est hoc munus, quo ad vivit quisque, certis

Senatorū
genera &
numerus.

Archiepiscopi.

Episcopi.

Senatorū
numerus
& ordo re-
centior ad
calcem o-
peris adscri-
ptus est.

annexum honoribus & magistratibus, partim ecclesiasticis, partim profanis. Sunt autem in Senatu antiquitus, Archiepiscopi duo, septem episcopi, Palatini quindecim, Castellani quinque & sexaginta. Archiepiscopi sunt, Gnesnensis in maiore Polonia, Leopoliensis in Russia. Episcopi verò, Cracoviensis in minore, Posnaniensis in maiore Polonia. Vladislaviensis in Cuiavia & Pomerania, qui tamen iam à certo tempore Posnaniensem loco anteit: Plocensis in Masovia, In Russia Præmislensis & Chelmensis: Camenecensis in Podolia. Qui omnes, quo ordine nunc à nobis enumerati sunt, eum perpetuo servant in

in senatu, dicendaq; sententia, & in publicis celebritatibus. De Præmislis suo loco dicemus. Sunt quidem præterea tres Russici & Græci schismatis episcopi in Russia, quos ipsi Russi Vladicas vocant, nimirum Leopoliensis, Præmislensis, & Chelmensis: qui una cum sectatoribus suis, & alijs Russicis itidem episcopis, qui sunt in ditione Lithuanica, à Kiouisiensi metropolitano, & à Patriarcha Constantinopolitano, quod ad religionem & initiationes attinet, dependent. Habent & Armeni suum episcopum. Sed neque hic neque Russici pertinent ad regium consilium. Superioribus seculis, cum latius paterent versus occidentem solem fines Poloniæ, Vratislaviensis quoque & Lubussensis episcopi, & Camenensis, in senatu sua loca habebant: Atque etiam nunc duo priores in provincia Gnesnensi censentur. Et nostra memoria habuit uterque certa bona in Polonia. Nunc Camenensis episcopatus in ducum Pomerania, Lubussensis in Marchionum Brandenburgensium faucibus, Vratislaviensis in regum Bœmiæ ditione est. Secundum episcopos in Senatu sunt Palatini hoc ordine: Cracoviensis & Posnaniensis, alternis

Russorum
Episcopi.

Palatini.

vicibus inter se priora & posteriora habentes loca & suffragia: Deinde Sendomiriensis, Calisiensis, Siradiensis, Lenciciensis, Brestensis, Vladislaviensis, siue Iuni-vladislaviensis. Leopoliensis siue Russia, Podolia, Lublinensis, Belsensis, Plocensis, Masovia, & Rauensis, Castellani, Cracouiensis, Voiniciensis, Sandecensis, & Biencensis in satrapia siue Palatinatu Cracouiensi: Pofnaniensis, Medirecensis, Rogosnensis, Sremensis, Pramentensis, Criuiniensis, & Santocensis in Pofnaniensi, Sendomiriensis, Visliciensis, Radomiensis, Zauichostensis, Zarnouiensis, Malogostensis, Polanecensis, Cechouiensis in Sendomiriensi: Calisiensis, Gnesnensis, Landensis, Naclensis, Biechouiensis, Camenensis in Calisiensi, Siradiensis, Rospirensis, Spicimiriensis, Velunensis & Conariensis in Siradiensi: Lenciciensis, Breżinensis, Ino-vulodensis, & Conariensis alius in Lenciciensi: In Brestensi, Brestensis, Crusuiciensis & Coualiensis: In Iuni-vladislaviensi, Iuni-vladislaviensis, Bydgostiensis, & Conariensis item alius, itemq; Dobrinensis, Ripinensis, & Slonensis in terra Dobrinensi: In Russia, Leopoliensis, Præmisiensis, Haliciensis,

MART. CROM. LIBER II. 109
ciensis, Sanocensis, & Chelmenensis: In Podolia vnicus Camenecensis: In Lublinensi item Lublinensis: In Belsensi Belsensis: In Plocensi Plocensis, Racianzensis & Siepercensis: In Masovia Cyrnensis, Viżnensis, Varsauiensis, Vissegradensis, Zacrociensis, Ciechanoniensis, & Liuenensis: In Rauensi Rauensis, Sochaciouiensis, & Gostinensis: In Silesia vnus Ofuencimensis, Palatinum ea non habet. Ex his Castellanis, qui primi in vnaquaque satrapia modo à nobis enumerati sunt, eum inter se seruant ordinem, quo palatinos recensuimus, excepto Cracouiensi, qui ex quodam tempore palatinos omnes loco suffragioq; anteit. Voiniciensis item & huic proximus Gnesnensis prerogatiua quadam inter Calisiensem & Siradiensem Castellanos interiecti sunt. Caterorum hic esse legitimus ordo existimatur, ut Rauensi, qui superiorum extremus est, proximus sit Sandecensis: deinde Medirecensis, Visliciensis, Biencensis, Rogosnensis, Radomiensis, Zauichostensis, Landensis, Sremensis, Zarnouiensis, Malogostensis, Velunensis, Pramisiensis, Haliciensis, Sanocensis, Chelmenensis, Dobrinensis, Polanecensis, Pra-

Castella
noramor-
do.

Voinicien-
& Gnesn
Castellano
rum loca.

Q menten-

mentensis, Criuiniensis, Cechouiensis, Naclensis, Rospirensis, Biechouiensis, Osuencimensis, Breziniensis, Crusuiciensis, Bydgostiensis, Camenensis, Spicimiriensis, Inouulodensis, Coualiensis, Santocensis, Sochaciouiensis, Gostinensis, Vitznensis, Varsauiensis, Racianzensis, Siepercensis, Vissegrodensis, Ripinensis, Zacrocimensis, Ciechanouiensis, Liuenensis, Slonensis: extremi tres Conarienses: In quibus primum locum is, qui est in Siradiensi satrapia, medium qui in Lenciciensi, ultimum qui in Inouuladislauensi, obtinet. Sunt item in Senatu Magistratus quidam & administri principis, quos officiales regni vocant: Nempe Marefcallus, siue Marefalcus, qui magnus dicitur, Cancellarius, Procancellarius siue Vicecancellarius, ac thesaurarius. Est etiam vnus de magistratibus aulicis, seu curie principis, Marefalcus curiae: Putatur etiam duo praefecti seu Capitanei, nempe maioris Poloniae, & Cracouiensis ad consilium pertinere. Sed perrarò vsu venit, ut ij nõ aliquo alio honore Senatorio praediti sint. Horum autem omnium magistratum loca & suffragia in consilio sunt secundum Castellanos eo, quo hic à nobis conscripti sunt, ordine.

Nisi

Magistratus pertinentes ad consilium publicum.

Nisi si quo alio eminentiori honore ij cohonestentur: Quod fit plerunque. Hoc igitur est consilium publicum apud Polonos, & Senatus regni siue regni, sex & nonaginta consiliarijs constans: Quorum alij vocantur maiores, alij minores consilarii. Sunt autem maiores, Archiepiscopi, Episcopi, Palatini, primarij aliquot satrapiarum Castellani vsq; ad Siradiensem fortassis: Cateri omnes minores: qui posterius in consilium adhiberi coeperunt: & excluduntur nunquam à consilijs secretioribus. In hoc senatu censentur etiam Prussici consilarij. Verum de his & omni republ. Prussica separatim posterius persequemur. Accessere nuper (posteaquam hac nos conscripsimus) & Lithuanici cum antiquis, quos Sigismundus Augustus Rex ad numerum eorum adiecit. Eos quoque alii loco reseruabimus. Porro Secretarii admittuntur quidem & ipsi iurati in Senatum, sed ut auditores modo, & quasi seminarium quoddam senatus: Neque locum habent in consessu consiliorum, neque dictionem sententiae. Ex his autem vnus primi siue maioris Secretarii nomen & honorem obtinet, de quo plura paulò post:

Consiliariorum numerus. Diuisio.

Secretarij.

Referenda.

Q. 2 Duo

Duo referendarij siue supplicum libellorum magistri sunt. Putantur & succamerarij aditum habere ad locum habendi senatus, claudendi & aperiendi ostij causa, idque in suo tantum quisq; territorio. Iam & Senatorum, primariorum praesertim, filios adolescentes admitti in Senatum non inusitatum est. Quanquam solent & ij sacramento adigi in numero secretariorum, quo liberius intersint consilijs. Conuocantur autem Senatores à principe ad consilium, praesentes quidem quoties opus est: qui verò longius absunt, non nisi arduis de causis, utpote ad comitia, vel celebritatis alicuius gratia, nimirum ad nuptias principis, seu liberorum eius, aut si quis socius & obnoxius regno dux in verba principis iuraturus sit. Cum ijs verò, qui adsunt, princeps pro re nata consultat. Nisi fortè res grauior ac difficilior incidat, quae plurimum consilio & consensu sit explicanda, velut de indicendis comitijs. Tunc enim absentes singuli per epistolas regias consuluntur, maiores praesertim. Atque hac de genere, numero, ordine & officio senatorum siue consiliariorum regni suffecerint, si unum illud addiderimus, quod subseruiunt ij quoq;

Consilij
conuocandi
ratio.

Senatorij
communis
officia.

quoque principi & reipubl. quoties opus est, domi quidem in iudicijs cum alijs, tum recuperatorijs, quas commissiones vulgò vocamus, foris autem in legationibus obeundis, aut si quid aliud publicè cum dignitate peragendum est. Cum autem ii certis magistratibus & honoribus praediti sint, habent etiam praeter commune senatorium munus, curamq; totius reipubl. peculiaria officia pro diuersitate magistratum siue honorum attributa. Ac Archiepiscopi quidem & episcopi officia quae sint, nemini Christiano incognitum est: Nec vllum ii peculiare habent in Polonia, praeter ceteris nationibus: Nisi quod Archiepiscopus Gnesnensis perpetua quadam Pontificis Max. legatione fungitur, & legatus natus sedis apostolicae appellatur. Quo nomine ampliore habet iurisdictionem: de qua suo loco attingemus. Habet etiam primatis honorem ab eadem sede apostolica, absque eo, quod est antiquo gentis instituto, & praerogatiua primas regni, & princeps senatus. Proinde penes eum est potestas indicendi comitia, conuocandi senatum, senatusq; consulta definiendi & edicendi, absente rege, & regno vacante. Palatini munera sunt,

Archiepiscopus
Gnesnensis
legatus natus.

Primas.

Palatini
officium.

esse ductorem copiarum suæ satrapia in expeditionibus bellicis: indeque nomen habet lingua vernacula, ut Voieuoda dicatur, quasi dux belli, siue copiarum. Palatinus autem dicitur Romanorum imitatione, apud quos sub imperatoribus non obscurum erat nomen honosq; comitum palatinorum. Porro in pace palatini est, in sua cuiusque satrapia conuentus nobilitatis instituire, iisque, & iudiciis præsidere: preciarebus venalibus præter tempus comitorum & belli imponere: ponderum & mensurarum curam gerere. Iudeorum quoq; patrociniū & iudicia ad palatinum pertinent. Castellani quasi legati sunt Palatinorum, ductoresque & præsides nobilitatis sub suo quisque palatino. Appellantur autē Castellani etiam vernacula lingua mutuato à latinis vocabulo, à castellis siue oppidis, eorumq; territoriis, quæ singuli singula habent attributa: non quòd dominatum, iurisdictionem, aut curationem in eis habeant, sed legationē tantū bellicā, cuius modo fecimus mentionem: plerique etiā certos redditus anniuersarios: indeque suam quisque denominationem sumit, videlicet, ut Voiniciensis, vel Sremensis, vel
alius

Castellani
officium
& nomen.

MART. CROM. LIBER II. 115
alius cuiuspiam loci Castellanus vocetur. Vocantur etiam persæpe nomine vernaculo domini, loci appellatione in ki vel ski syllabam deflexa, verbi gratia, pan Posnanski, pan Ploski. Solus autem Cracouiensis Castellanus, præter nomen & redditus, nihil habet commune cum aliis: Sed liberum is honorem habet, absque ullo prorsus munere, præter commune Senatorium. Tam Palatinum autem, quàm Castellatum lege esse non licet quenquam in ea satrapia, in qua nullum proprium habet fundum, seu bona terrestria. Vocanturque ii utriusque vulgò communi vocabulo dignitarii, quasi dignitate & honore præditi, addito ferè satrapia, seu terræ nomine. Magistratus verò siue officiales regni ab officiis & functionibus quibusdam publicis, quibus funguntur ad vniuersam rempubl. pertinentibus, hanc sumunt communem appellationem. Nam peculiaria eorum nomina superius iam indicauimus: Quibus singulis REGNI nomen adiungitur, ut, verbi gratia, Maresalcus, & Cancellarius regni dicatur, eodemque modo ceteri. Officia verò singulorum hæc sunt. Maresalcus quidē magister est aula regia, & administer

Castellani
Cracouiē-
lis præro-
gatiua.

De Palati-
nis & Ca-
stellanis
lex.

Dignitarii.

Officiales
siue magi-
stratus reg-
ni.

Maresalci
regni offi-
cia.

consilii publici, penes quem ius est conuocandi senatum iussu regis, vel primatis, praestandi silentium & audientiam, faciendi potestatem dicenda sententiae, legatos externos introducendi, eiciendi e consilio eos, qui ad id non pertinent, pronunciandi decreta regia in causis infamiae & capitalibus, promulgandi ad populum senatus consulta, moderandi pompis publicis, hospites illustres suscipiendi, compescendi motus inquietorum atque turbulentorum non modo circum senatum & in publico, sed etiam in priuatis principis coenaculis & habitaculis, animaduertendi in delicta, quae in loco & oppido domicilii siue hospitii regii, vel comitiorum admittuntur, denique in comitiis & in comitatu regio diuersoria distribuendi, & imponendi rebus venalibus precia: unde etiam vectigal seu tributum forale ipsi prouenit. Marefalsci etiam est in aulicum regis comitatum & ad ministros mensae regiae, aliorumque munerum aulicorum (profanos praesertim) iurisdictio, censura, & animaduersio: eoque gestat is in publicis conuentibus, & regi in propatulum prodeunti praefert erectum sceptrum ligneum, siue baculum.

Cancellarius & Vicecancellarius

cancellarius, nominibus & loco distincti, sed potestate & munere exaequati, diplomatibus, edictis, mandatis, epistolis, & alijs scripturis regijs conscribendis atque signandis, quaeque ad eum mittuntur accipiendis, & legendis praesunt. Itaque in potestate sua habent signa regia, Cancellarius quidem maius, Vicecancellarius uero minus. Authoritas eorum eo usque patet, ut multa inconsulto principe signare: quae uero contra leges esse uidentur, iubenti illi negare possint. Dant etiam responsa regio nomine, & quibus de rebus consilium haberi debet in senatu proponunt: denique senatus consulta, regiaque & comitialia placita ac decreta literis mandant, & in publicum edunt. Sunt etiam ij cognitores priuatarum querimoniarum, & prouocationum ab urbanis & oppidanis, praefectorumque iudicijs, ad regium tribunal deuolutarum: Secretarijs, scribis, sacerdotibus, concionatoribus, & cantoribus aulicis ceremonijsque ecclesiasticis moderantur: is praesertim, qui est de sacro ordine. Lege enim, quamuis non antiqua, alterutrum ex ijs sacri, alterum profani ordinis esse oportet, cum antiquitus soli ferè sacerdotes eo munere funge-

R

ren-

Cancellarij
& Vicecancellarij officia.

rentur. Sunt autem ij in proxima expectatione honorum sui uterque ordinis. Sed neque sacerdoticum episcopa, exceptis Pramisiensi, Culmensi, Chelmensi, & Camenecensi, neque profano siue seculari cum ullo palatinatu vel Castellania retinere munus hoc licet, praeter peculiare indulgentiam, aut conuentionem: Est autem uisitatum, ut de Vicecancellario fiat Cancellarius propter loci & sententiae dicenda prerogatiuam.

Thesaurarius ipso nomine indicat munus suum. Est enim promus & condus thesauri regij, symbolorum siue insignium regni, quae sunt, corona, pomum, sceptrum, & gladius, suppellectilis & redituum regionum, scripturarumq; & monumentorum publicorum: author & moderator quorum vis quastorum, curatorum, atq; dispensatorum principis, & rationum reddendarum exactor, monetariae officinae magister, stipendiorum tam militarium, quam aulicorum solutor: reddenda principi rationi obnoxius. De Marescalco curiae, & praefectis, referendarijs, & secretarijs dicemus postea. Numerantur etiam inter Magistratus & officiales regni, duo duces exercitus: quorum alter generalis & supremus

Thesaurarij officij. Regni symbola.

Duces exercitus siue capitanei.

exerci-

exercituum regni capitaneus, alter campi ductor, seu campestris Capitaneus dicitur. Ac ille quidem dux est & moderator belli secundum principem, & vicarius principis. Ducit exercitum, capit locum castris, acies instruit, dat signum pugnae & receptus, commeatus & annonae curam in bello gerit, precia rebus uenalibus imponit, ponderibusq; & mensuris earum modum statuit, & in deliquentes animaduertit. Campestris uero, huius est quasi Vicarius a principe datus, excubiaru potissimum explorationumq; curam gerit, & mercenarijs militibus, illo praesertim altero absente, praest. Neuter tamen in senatu locum habet: Quin temporarij esse perhibentur, neq; inter magistratus regni habitis superioribus temporibus. Longè minus autem alij quidam, qui & ipsi nostra ferè memoria p magistratibus regni haberi & appellari ceperunt. Neq; tamen in Senatu locum habent, neq; functionem ullam ad uniuersum regnum pertinent: Ii uero sunt, gladifer, pocillator siue pincerna, structor mensae, quem incisorem uocant, dapifer, subdapifer, magister culinae, qui dapibus apparandis & cocis regijs praest. Et certè aut iudem sunt terrestres Cracouiensis satrapiae,

Magistratus quidam alij.

R 2 aut

Officiales
seu magi-
stratus ter-
restres.

aut ea sola de omnibus nullos habet. Itaque no-
quoque de sententia peritorum inter terrestre
honores & magistratus eorum officia expone-
mus. Dicuntur autem terrestres honores &
magistratus, qui non uniuersi regni, sed terra-
rum atque satrapiarum sunt peculiare. Officia
terrestria vulgò appellantur: & his qui præditi
sunt, officiales terrestres. Sunt autem ii Succa-
merarius, Capitaneus, gladifer, vexillifer, pin-
cerna, subpincerna, incisor, subdapifer, dapifer,
tribunus, iudex, subiudex, notarius, thesaura-
rius, venator, agaso siue equorum curator. Ha-
bentq; certas suas functiones siue curationes an-
tiquitus in sua quisque satrapia siue tractu, ac
terra, ut vulgò loquuntur: quarum qualibet o-
lim, discerpto in multos dominatus regno suum
ducem habuit. Eius autem hi fuerunt admini-
stri peculiare. Nunc magna pars solum nomen
nudumq; honorem retinent. Quales sunt gladi-
feri, pincerna, subpincerna, incisores, dapiferi,
subdapiferi, ac thesaurarii: nisi quòd in extra-
ordinariis iudiciis, quas commissiones vocant,
regis mandatis subseruiunt, & in colloquiis as-
sident. Tametsi etiam nunc ii peculiaribus suis
mune-

muneribus fungi rectè posse existimantur in suo
quisque tractu, à quo denominationem habet,
quoties eum princeps adit: Nempe ut gladifer
Posnaniensis in Posnaniensi satrapia gladium
ipsi præferat in solenni pompa: pincerna pocu-
lum administret: incisor siue structor mensam
apponat: dapifer dapes inferat: subdapifer da-
piferum cum sceptro seu baculo præcedat, sub-
pincerna potus curam gerat, thesaurarius con-
dus ac promus pecuniæ sit ac suppellectilis eius.
Ceteri sanè funguntur etiam nunc ferè suis mu-
neribus. Ac vexillifer quidem in bello vexillum
præfert exercitui suæ satrapia: Tribunus custos
est arcis in suo quisque tractu, durante bello: Ita
que vacationem habet militiæ: Venator vena-
tionibus & syluis præest: Agaso equitio siue ar-
mento equorum: Iudex causis & controuersis
privatis nobilitatis disceptandis & iudicandis
præsidet unà cum subiudice: qui eius est socius,
non vicarius, loco tantum inferior. Notarius
scriba est & actuarius iudicii: Sed habet ipse
quoq; in iudiciis ius dicende sententiæ, consuetu-
dinem magis, quàm legum præscripto. Cæterum
Succamerarius (ut eius partes postremò loco

Gladifer.

Pincerna.
Incisor siue
structor
Dapifer.
Subdapifer
Suppincerna.
Thesaurarius.

Vexillifer.

Tribunus.

Venator.
Agalo.

Iudex.

Subiudex.

Notarius
siue scriba.Succame-
rarius.

explicemus, licet honore omnibus his anteeat) olim fortassis praefuit cubiculo & cubiculariis principis in sua quisque terra: Nunc regendis modo finibus agrorum ac bonorum terrestrium praest: Quem itidem atque iudicem, subiudicem, & notarium iuratum esse oportet. Habetque is ad id munus obeundum vicarios, & ipsos iuratos in

Cameralij. singulis territoriis singulos, qui camerarii vocantur, siue cubicularii, propterea fortassis, quod antiquitus ministri cubiculi principis ad id munus legabatur a succamerario. Nunc is eos sibi legit arbitratus ex equestri ordine eiusdem territorii, & iureiurando adigit, mutatque quoties

Succamerarius Cracouiensis. vult. Cracouiensis Succamerarius praeter ceteris ea prerogativa praeditus est, ut salinarum eius ipsius tractus arbiter sit & inspector. Capitaneorum officia statim exponemus. Ceterum hi, de quibus modo egimus, non omnes in omnibus satrapiis sunt, neque in singulis singuli. Et Cracouiensis quidem satrapia succamerarium, gladiferum, dapiferum, tribunum, iudicem, subiudicem &

Officiales Cracouiensis satrapiae. notarium habet singulos: Posnaniensis ceteros quidem habet itidem singulos, Succamerarios

Posnaniensis vero, iudices, subiudices, & notarios binos. Ha-

bet

bet enim hosce terra Vuschaouensis peculiare, qua a Polonia quodam tempore seiuincta fuit. Sendomiriensis satrapia ceteros quidem & ipsa singulos habet, praeter tribunum, quem etiam Prissouense territorium non ita pridem suum habere cepit. Calissiensis item eosdem omnes habet sin-

Sendomi-
rensis.Calissien-
Siradicu.

gulos. Siradiensis structore & subdapifero caret: gladiferum, pincernam, dapiferum, habet singulos: succamerarios, vexilliferos, iudices, & notarios binos. Habet enim hos Velunense territorium suos, ex quo tempore auulsum fuit a Polonia, sicut arbitrator. Tribuni item duo sunt in eadem

satrapia, Maior & minor. Lenciciensis gladiferum, structorem, & subdapiferum non habet, ceteros habet singulos. Itemque Brestensis. Inouvaldislaviensis vero gladiferum unum habet, structorem & subdapiferum nullum: Reliquos om-

Lencicien-

Brestensis,
Iuovval-
discuien-

nes binos. Habet enim Dobrinensis terra peculiarem succamerarium, vexilliferum, pincernam, dapiferum, tribunum, iudicem, subiudicem, & notarium.

Russia quinos habet succamerarios, vexilliferos, pincernas, dapiferos, tribunos, iudices, subiudices, & notarios: Nepe Leopoliensem, Praemisliensem, Sanocesensem, Haliciensem & Chelmensem: gladife-

Russica.

R 4 rum,

Podolicæ. rum, structorem, & subdapiferum nullum. Podolia itidem nullum de his tribus: Reliquos vero singulos, exceptis tribunis, quos duos habet, Lublincen. Camenecensem atq; Trebovuliensem. Lublincensis satrapia gladiferum, structorem, & subdapiferum nec ipsa habet: vexilliferum, pincernam, ac dapiferum singulos, ceteros binos. Lucouienſe enim territorium peculiare habet succamerarium, tribunum, iudicem, subiudicem, Belsensis. & notarium. Belsensis succamerarium, vexilliferum, pincernam, dapiferum, iudicem, subiudicem, & notarium habet singulos, ceteros non habet. Plocensis. Plocensis succamerarium, pincernam, dapiferum, ac tribunum singulos, iudicem vero & subiudicem notarios binos (Habet enim hos Zaucrenſe territorium suos) Structore ac subdapifero ea satrapia caret: Rauensis vero structore item & gladifero: Subdapiferum unum habet: reliquos autem ternos, territorii distinctos, videlicet Rauensem, Gostinensem, & Sochaciouienſem. Masovia iudices habet undecim, totidem quot territoria: Nimirum Curnensem, Vitznensem, Varſauienſem, Nurenſem, Vyſſegrodenſem, Zacrocimensem, Ciechanouienſem, Lomzen-

MART. CROM. LIBER II. 125
Lomzenſem, Ostrolencensem sive Zembrouienſem, Roſanenſem, & Liuenſem: Subiudices & notarios totidem: Succamerarios uno minus: Zembrouienſe enim territorium eo caret: Pincernas atque dapiferos octonos. Roſanenſe enim & Liuenſe, atque item Zembrouienſe territoria hos non habent: Vexilliferum ne Lomzenſe quidem: Subdapiferum autem neque hac ipsa, neque Nurenſe, neque Vyſſegrodenſe: Porro subpincernas & theſaurarios totidem, quot subdapiferos habet Masovia, nempe quinque: Subpincernam item Rauensis satrapia habet: Breſtenſis: vero theſaurarium: Cetera omnes neutrum: Magistrum culine, nulla præter Cracouienſem, ſimodo non regniis est. Agasonem nulla, præter Ruſſiam: Venatores ſola Cracouienſis, Poſnaniensis, Siradiensis atque Lenciciensis singulos: Sendomiriensis vero & Masouitica binos Hac quidem Vitznen. & Lomzenſem: Illa vero Sendomiriensis & Radomiensis. Habent & Oſuencimensis & Zatorienſis terra ſuos iudices singulos: Habet etiam Seuerienſis ab episcopo. Cæterorum terreſtrium magistratum nullum habet Sileſia, præfectis ſive capitaneis exceptis.

Capitanei
ſive præfecti
ſi.

S

De

De quibus iam dicendum est. Capitaneus, quem praefectum rectè dixerimus addito nomine arcis, cui praest, custos est ac defensor nō solum arcis regie, verum etiam pacis atq; tranquillitatis publicæ in sua quisq; praefectura, quam à vitutam debet praestare & vindicare, & furibus latronibusq; repurgare. Itaq; iurisdictionem coercionemq; habet latè patentem, non modo in agrestes & oppidanos, verum etiam in equestri ordinis homines: Qua de re accuratius suo loco tractabimus. Adhac omnium aliorum iudicum, ecclesiasticorum iuxta ac profanorum sententias ad extremum executioni mandat, si executores alij nolint, vel nō proficiāt. Gerit etiam curā cōmodorum & reddituum principis, qui ex re familiari, ac sensibus & pensionibus oppidanorum & agrestium proueniunt. Et omnino arces, & villa, seu rustica pradia cum suis sartis tectis, & oppidapagiq; principis in ditione praefectorum sunt. Solum omnium Cracouiensis praefectus licet amplissimā iurisdictionem habeat, tamen sartorum tectorum arcis, & reddituum principis curā non habet. Est enim magnus procurator eius arcis, qui utrunq; hoc onus sustinet. Nā Posnaniensis

Cracouiē.
praefecti
priuilegiū

Magnus
procurator
arcis Cra-
couiensis.

præse-

praefectus licet maiores etiā prerogatiuas & iurisdictionem in tota maiore Polonia obtineat, atq; ob id generalis maioris Poloniae capitaneus vocitetur, curat tamen sarta tecta arcis Posnaniensis duntaxat, & redditus regios eiusdem territorij. Cetera enim territoria iurisdictioni ei subiecta, habent ferè suos curatores, quos etiā minus ppriè pfectos appellamus: de quibus post agemus. Oportet autem pfectum esse equestri ordinis, agros & fundos proprios in ea ipsa pfectura, cui pfectitur, habentem. Neq; externo autem, neq; regio vel ducali genere orto conferri pfecturam fas est. Nec duas cuiq; habere licet: Ac ne vnā quidem, primariam duntaxat & iurisdictione peditam, cum primaria Castellania vel Palatinatu eiusdem satrapiae, Posnaniensi & Cracouiensi exceptis: In quibus nō idem ius est. Ne Silesiæ quidem cadunt sub hac legem. Habet pfectus quilibet suum vicarium, quem Vicecapitaneum vel burgrabium vulgò vocant: Nos subpraefectum fortassis non ineptè dixerimus, penes quem est vicaria praefecturae totius potestas, & rerum iudicatarum executio. Habet & alterū administrum statorum, ac certis temporibus peragi

Maiorē
Poloniae
generalis
Capitaneus.

De praefecturis leges.

Vicecapitaneus.

S 2 solito-

Iudex ca.
strensis.

solitorum iudiciorum, quem iudicem castrensem dicunt. Vtrunque arbitratus suo creat & abdicat: Sed vtrunque iuratum itidem, atque ipsum praefectum, & ex equestri ordine esse, certa quoque bona terrestria in ea ipsa praefectura habere oportet. Nec eundem iudicem & suppraefectum, terrestrem-ve & castrensem iudicem esse fas est. Habet item praefectura quoque actuarium iuratum, quem notarium castrensem nominat. Non

Notarius
castrensis.

sunt autem satrapiae, verum arcibus ac territoriis ferè, quae districtus vocantur distinctae praefecturae: Nonnullae etiam complura territoria in

Praefectura
totius Po-
loniae.

se complectuntur. Sunt verò haec totius Poloniae praefecturae: In maiore quidem Polonia unica generalis, Posnaniense, Costense, Vvschouen, Calisiense, Gnesnense, Pysdrense, Coninense, Kcinense, & Naclense territoria complexa: In minore autem Cracouiensis, quae praeter primum, alia tria territoria, videlicet Prossouiense, Xianzense, & Lelouiense in se continet. Praeter eam sunt, Sandecensis & Biecentis praefecturae cum iurisdictione. In Sandomiriensi verò satrapia sunt: Sandomiriensis, Radomiensis (Stenzicense quoque territorium dudum complexa,) quod

quod iam peculiarem praefectum habet. Corciensis, quae & nouae ciuitatis dicitur, Chencinensis, Opocinensis, Pilsnensis. In Lublinensi eiusdem nominis praefectura est, & Lucouiensis. In Siradiensi Siradiensis, quae Schadcouiense quoque & Radomscense & Petricouiense territoria annexa habet: Velunensis item & Ostresouiensis. In Lenciciensi unica est, tria habens territoria, nimirum Lenciciense, Brezinense, & Orlouense. In Guiania Brestensis, Crusuiciense item & Coualiense, & Predecense territoria adiuncta habens: Iuniuoladislauiensis cum annexo Bydgosciensi territorio: & Bobrounicensis, Dobrinense, Ripinense & Lipnense territoria complexa. In Russia Leopoliensis, Premisliensis, Sanocensis, Haliciensis, Chelmenensis, & Crasnostauiensis. In Podolia Camenecensis atque Trebovuliensis. In Belsensi satrapia Belsensis, Buscensis, Grodlensis, & Grabenecensis. In Plocensi unica cum tribus alijs territorijs, Zauvucensi, Mlauensi, Srenensis siue & Srenscensi. In Masouia Cyrnensis, Vixnensis, Varsauiensis, cui Nurense quoque territorium paret, Vyssogrodensis, Zacrociensis, Ciechanouiensis, Lōzensis,

Zensis, Roſanensis (in qua est & Macouienſe territorium) & Liuenſis. In Raueniſi verò ſatrapia tres p̄fecturae ſunt, Raueniſis, Coſtinenſis, & Sochacionienſis. In Sileſia ſunt Oſuiencimenſis & Zatoriſis. Præter haſ præfecturas ſunt & aliæ de ſuperioribus ſerè detractæ, quæ peculiariter, quamuis minus latine, tenuta, earumq; præfecti tenentarij vulgò vocantur: qui partim non habent ſua territoria, partim habent, verum ſine vlla iuriſdictione in nobilitatem. Nam ea eſt penes veros præfectos, quibus eę tenuta voluntate Regia p̄pter utilitatem, vel aliqua alia de cauſa detractæ ſunt. Sunt autem ij tenentarij curatores modo regionum prædiorũ atq; reddituum, & caſtellarum plebiſq; ſubiectę, nõ diſſimili conditione magni p̄curatoris arcis Cracouiſis. In ijs leges eę, quæ de p̄fecturis dudum cõmemoratæ ſunt, locum nõ habent. Omnium autẽ præfecturarum redditus partim ex agricultura, & re pecuaria, partim è molis frumentareis & ſyluis, partim è cenſibus, & penſionibus agreſtium & oppidanorum p̄ueniunt, & vel certo pacto præfectis locantur à principe, vel eorum fidei cõmittuntur, ita vt rationibus reddendis obnoxij ſint. Condonantur

Præfecturę
ſine iuriſ-
dictione, ſi
ue tenuta.

Præfectu-
rarum re-
ditus & ad-
ministra-
tio.

natur etiã interdũ ob eximia merita. Oppignorrari quoq; præfecturas nõ inuſitatũ eſt, eas præfertim, quæ iuriſdictione carēt, quæq; nõ ſunt primarię cuiuſq; ſatrapie. Sedita demũ id legitimũ eſt, ſi rata redditũ portio quotãnis de capite deducatur. Quod cũ in deſuetudinẽ abiſſet ſuperiori tempore, comitorum decreto nunc reuocatum eſt. In ijs verò præfecturis, quæ iuriſdictionem habent, ſi uſus rei publ. oppignorationem requirat, etiã aſſenſu ſenatus comitali opus eſt. Sola Sendomiriſis priuilegio quodam neque oppignerari, neque locari perpetua locatione poteſt. Habent & epiſcopi, & proceres, atque equites locupletiores nonnulli arces & præfectos ſuos: Sed hoc nomine principi nequaquã obnoxios. Habet arx Cracouiſis peculiariter decem cuſtodes, qui burgrabii, ſumpto à Germanis vocabulo, appellantur, ſine vlla poteſtate, præfecti auctoritati obnoxios: Qui pacis iuxta ac belli tempore nocturnas, atque etiã diurnas, quando opus eſt, excubias per ſe, vel per admiſtros ſuos ſeruant: Habent que militia vacationem: & eo nomine ambitur id munus à multis, & à rege confertur. Salinę & alia metalla

Sendomiriſis præfecturę priuilegiũ. Præfecti alij præter regioſ.

Burgrabij Cracouiſes.

Zupparij ſiue ſalinatores.

habent suos curatores & administratos iuratos, & rationibus reddendis obnoxios. Praest autē salinis Bochnensibus & Veliscensibus, carūq; administris & operis vnus salinator, quem Zupparum Cracouiensem vocant. Russicis item vnus, quem Russicum appellant. Et est honorata hac vtraque curatio. Sed neque in regni, neque in curiae, neque in terrestribus magistratibus numeratur: Quemadmodum neque telona, siue quaestores teloniorum, neque tributorum atque exactio-
Telona.
Exactores tributorū.
Notarius thesauri.
Scriba castrensis.
Officia curiae.
 niorum exactores. Et ij verò vtriq; rationibus reddendis obnoxii sunt. Telona quidem, si non redemerint telonia: Quod faciunt plerunque. Hos omnes in hunc locum terrestrium magistratū conicere libuit, propterea quòd eorum curationes ad praefectorum officia non nihil accedunt. Scribam quoque siue notarium thesauri regii nihil vetat his adicere, quem rex ipse edit, ac thesaurario vicarium adiungit. Est & scriba castrensis, quem etiam notarium campestem vocant, mercenariorum militum conscriptor, & solutor stipendiorum. Sunt etiam à terrestribus magistratibus non multum diuersa ministeria quaedam in aula princi-

principis, quae officia curiae dicuntur. Quorum administrati terrestrium plerorumq; & regni officialium (quorum sunt cognomines) quotidianis ministerijs in aula principis funguntur, fidemque suam principi ad suum quisque ministerium iureiurando obstringunt. Sunt autem ij: Marescalcus, Thesaurarius, seu Vicethesaurarius, Succamerarius, Referendarij duo, pincerna, structor mensae, subdapifer, dapifer, magister culinae, & praefectus curruum. Nuper etiam his accessere, Vexillifer, ac ductor aulicę militiæ. Qui omnes addito nomine curiae, à superioribus magistratibus & officialibus cognominibus suis distinguuntur: Nempe vt Marescalcus curiae, thesaurarius curiae, atque eodem modo alij dicantur. Nec suo an & Secretarii in hunc ordinem
Secretario-
rū officia
 referri debeant, licet nullum peculiare certumq; munus attributum habeant, sed ad nutum principis presto sint in obeundis eius nomine legationibus, in scriptionibus & lectionibus publicarum & Regiarum scripturarum, in accendis ac deducendis ad regem, vel in senatum illustribus hospitibus & legatis principum, in exquirendis & referendis sententijs agrotorum, &

à consilio absentium primariorum senatorum, in recognoscendis pro principe locis, factis, & causis controuersis, regionum praesertim hominum & administratorum inter ipsos, vel cum magistratibus suis, & si qua sunt alia honesta, & cū dignitate coniuncta ministeria. Numerus eorū certus non est. In his eminet vnus, qui appellatur

Primi Secretarij officium.

primus seu maior Secretarius. Is absentiu Cancellariae praesidium vicem supplet in aula & comitatu principis: Nec tamen, ut illi, gestat signū regium, sed quoties opus est, petito ab ipso annulo signatorio tā diplomata publica, quā epistolas ipso praesente signat. Quod si is quoque absit, peragit ea quispiā de ceteris Secretarijs, quē princeps iusserit. Habet autē primus quoque Secretarius secundū Cancellariū & Vicecancellariū praerogatiuā capessendi honores publicos & magistratus, qui vacauerint: In arbitrio tamē regio positam. Habet & locum honoratum supra omnes officiales terrestres & aulicos, excepto Marescalco.

Marescalci curia.

Maresalcus curiae absente Marescalco regni agit omnia, quae illius muneris sunt: A praesente etiam socius adhiberi solet ac debet ad ea, quae sunt maioris momenti peragenda, praesertim cum eō pariter

pariter principi erectum sceptrum. Thesaurarius item Thesaurarij regni absentis vices gerit, adhibeturque & ipse a praesente ad pleraque omnia.

Thesaurarij curia.

Succamerarius, est magister cubiculi atque cubiculariorum puerorum, aliorumque domesticorum principis administratorum: Sub cuius potestate est suppellex ad lectum & cubiculum principis, cultumque corporis pertinens.

Succamerarij.

Ianitoribus quoque idem praesert. Referendarij, supplicum libellorum magistri sunt, & querimoniis hominum audiendis, Cancellariaeque, ut verbo legis utamur, referendis praesunt. Quinetiam in litibus urbanis disceptandis praesto sunt eidem Cancellariae, eiusque permissu exponunt regi cum consilio causas & controuersias litigantium. Nuper adeo sententias quoque rogari coeperunt in regis iudiciis. Sunt autem duo pari potestate, alter ecclesiastici, alter profani ordinis. Ductores copiarum, magistri stabuli, magistri culinæ, & praefecti curruum quae sint officia, ipsa eorum nomina satis ostendunt. Ceterorum munera iam sunt explicata in terrestribus officiis & curationibus. Eadem enim sunt horum, atque illorum: Sed cedunt hi illis praesentibus in sua cui-

Referendarij.

que satrapia siue terra. Hæc autem omnia honorata sunt ministeria: Minus illa, interioris cubiculi seruatoris, curatoris lecti, atque dispensatoris. Caterum stipendarii & aulici principis equites, Concionatores, & sacrifici, quamuis honoratos sint loco, tamen inter officiales non censentur: Multo minus stipatores siue satellites, cubiculariique, & pueri: Sed perpetui sunt administri principis, & præsto sunt ipsi iter facienti, & quouis loco manenti. Ac sacrifici quidem per vices operantur sacris quotidie presente rege, Canunt etiam festis diebus, benedictionesque & gratiarum actiones ritu Christiano ad mensam eius peragunt. Concionator sacris concionibus fungitur. Aulici verò (sic enim vocantur) equites equis stipendia merent, præsidii honorisque regii causa, & equestrem eum vel currulem equestres ferè comitantur. Qui equitatus numerosus est atque splendidus, nobili iuuentute constans. In qua sunt complures magistratibus & officiis non modo aulicis, verum etiam terrestribus præditi. Ei verò Marsalci moderantur. Cæteri ministri non habent necesse equos alere. Itaque pedestres prodeunt in publicum

Alia ministeria aulica.

Aulici equites.

cum principem deducunt. In solennibus tamen pompis non inusitatum est, ut equites quoque aulici pedestres equestrem principem antecendant. In longioribus autem itineribus ii, qui equis non merent, vel regis, vel oppidatim supeditatis, vel conductitiis equis aut curribus vehuntur. Ex his stipatores, præsidii causa sunt circum principem: Quod tamen recens est in Polonia: sed auget maiestatem principis. Cubicularii & pueri præsto sunt ad quavis domestica ministeria. Sed cubiculariorum peculiaris usus est in acciendis in senatum & ad regem consiliariis, & perferendis quoquo versus, literis, mandatis, edictisque regis. Quam ad rem oppidatim & vicatim eis mandato principis equi subministrantur: Quæ subuectiones, & lingua vernacula poduodæ vocantur: Cursum publicum latini vocant. Incedentem in publico principem, aulici quidem antecedunt, stipatores præ longis securibus more peditum Germanorum armati latera eius cingunt, Cubicularii verò cum pueris subsequuntur: Sed ita, ut & aulici proceribus atque senatoribus profani ordinis, & cubicularii puerique, episcopis ac secretariis ecclesi-

Stipatores siue satellites.

Cubicularii & pueri.

Cursus publicus seu poduodæ.

astici ordinis proxima principi loca honoris causa concedant: Nisi fortè regem regina sequatur.

Tunc enim episcopi quoque & secretarii cum proceribus antecedunt: Reginam verò longus ordo sequitur nobilium matronarū & puellarū.

Viliora ministeria.

Hęc igitur est ratio uniuersa aule & comitatus regii. Mitto enim cantores, abaci custodē, mapparium, canum venaticorum curatores, dimensorum distributores, ianitores, tibicines, tubicines, opifices, & alia viliora ministeria: Quę magna est turba, & sumptibus principis alitur. Et

Reginę comitatus.

quoniam omnia persequimur: Volumus quidem certè: habet etiam regina suum comitatum, nec modo puellarum & matronarum, quę in gynæceo sunt, sed etiam puerorum cubiculariorum, & aulicorum, & in his peculiare ministros siue officiales. In primis magistrum curiæ, qui

Magister curiæ.
Magistri curiæ.
Cancellarius siue secretarius.

omnibus præest, Reginamque prodeuntem cum sceptro antecedit: & magistram curiæ, matronam gynæceo moderantem: Deinde Cancellarium, vel Secretarium: Cuius sunt munera, literas nomine reginæ conscribere, & signare, & legere, & cōpellatibus eā responsa dare. Quod quidem nescio an cū magistro curiæ cōmune habeat.

Est

Est autem & hic discrimen inter Cancellarium & secretarium, quod hic non gestat signum reginæ, sicut illæ: sed ab ea, quoties opus est, utendum accipit. Habet regina etiam thesaurarium suum, & pincernam siue pocillatorem, & structorem mensæ, & subdapiferum, & dapiferum, & culinam ac stabuli magistros singulos: Itemq; dispensatorem, abaci custodem, mapparium, & ianitores eodem, quo regij sunt honoris discrimine:

Administri reginæ.

Quibus omnibus victus, vestitus, & mercedes à rege præbentur. In idem ipsius quoq; reginæ mensa instruitur, res vestiaria, mundus muliebris, & iumenta comparantur. Quod si ea regi superstes sit, vidua de suo, ac de fructibus & redditibus eorum honorum, quę rex ipsi dotis ac donationis propter nuptias nomine de amplissimi consilij sententia attribuerit, sese cum uniuerso comitatu suo deinceps sustentat. Atque hæc de magistratibus regni, terrestribus, & aulicis nobis decursa sunt. De ecclesiasticis magistratibus, honoribus, ministerijs & curationibus, quales sunt secundum Archiepiscopos & episcopos, suffraganeorum, abbatum, prepositorum, Decanorum, Archidiaconorum, scholasticorum,

Ecclesiastici honores & magistratus.

cantorum, custodum, cancellariorum, vicariorum in spiritualibus, officialium, commissariorum, ministrorum, priorum, custodum siue guardianorum, pœnitentiariorum, parœcorum, quos etiam plebanos vocant, non est operæ precium hic nos persequi. Ne de collegiis quidem, canonicorum, monachorum, & monacharum, fratrum conuentualium, vicariorum, psaltarum, mansionariorum, & si qua sunt alia. Neque enim peculiare quicquam habent apud Polonos præceteris gentibus & nationibus Christianis, neque ad rem publ. pertinent, exceptis Archiepiscopis & episcopis, & si quibus fortè præterea peculiariter quadam reipub. munera, quorum superius mentionem fecimus, mandantur. Magnus tamen, ut par est, honor eis & omnibus sacerdotibus habetur solo sacerdotij nomine. Maior etiam olim habebatur: id quod è vetustioribus literarum monumentis deprehēditur. Omnes autem ij episcoporum & Archiepiscoporum potestati & iurisdictioni subiecti sunt, præter, si qui pontificis maximi, cuius eximia potestas est, auctoritate exempti sunt. Plebes urbanae, oppidanæ, vicinæ, & agrestes partim principi pa-

Ecclesiastici ordinis dignatio.

Plebs Polonaa.

rent, partim proceribus & equitibus: partim certis sacerdotijs attributa sunt. Reguntur autem à suis quæque dominis, eorumque præfectis ac procuratoribus, ex æquo & bono siue ex arbitrio magis, quàm certis legibus. Quanquam non carent tamen suo quæque iure: Quod non est unius modi, quemadmodum posterius ostendemus. Præter dominos autem, eorumque præfectos & procuratores, habet plebs quæque oppidatim, vicatim, & pagatim suos magistratus. Ac in pagis quidem scultetum, siue aduocatum hæreditarium vocant, qui est quasi deductor ac defensor coloniarum: qui vel ipse per se, vel per vicarium suum, quem & ipsum aduocatum, seu iudiciale, vocant, cum adiunctis aliquot ex aratorum numero scabinis (sic appellantur iudices, siue assessores iudicij) ius dicit. In ciuitatibus autem & oppidis & vicis præter hos, sunt etiam consules. Ita vocamus eos, qui à veteribus decuriones appellantur: penes quos est ciuitatis cuiusque gubernatio & custodia: in delinquentes animaduersio: publicorum commodorum administratio, curaque adificiorum & sartorum tectorum publicorum. Inter eos autem unus præsidet

Plebei magistratus.

Scultetus siue aduocatus hæreditarius.

Aduocatus iudicialis. Scabini.

Consules siue decuriones.

V magister

Magister
ciuium.

magister ciuium, quem vulgò proconsulem vocitant, qui eos, quoties opus est, conuocat, & in consilium adhibet. Nam leuiora sine illis ipse gerit. Consulum non idem est ubiq; numerus. Habent item singulæ opificû societates & contubernia in qualibet ciuitate & oppido suos magistros, & his adiunctos aliquot seniores. In maioribus urbibus sunt etiam adiles vnus & alter de numero decurionum delecti, pecuniæ publicæ questores, & sartorum tectorum curatores. In oppidis verò & vicis communiter hæc à decurionibus curantur. Hos magistratus in oppidis præsertim, iuratos esse oportet, p̄ter aduocatos hereditarios. Nullos autē cōmunes magistratus pagi inter se, neq; ciuitates habent. Hæc de plebeijs magistratibus. Creandorum magistratum, & honorum mādandorum in Polonia non vna est ratio. Olim episcopi ex præscripto sacrorum canonum à collegijs primariorum sacerdotum, quæ capitula cathedralium ecclesiarum vulgò nominant, legebantur. Nunc princeps, vmbra tili quadã electione illis relictã, aut ne relictã quidē, solus arbitrato suo edit episcopum, & pontifici max. cōmēdat, (quod fiebat etiã à collegijs) ut ei

autho-

Magistri
contuberniorum.

Adiles.

Magistratum
creā
dorū ratio.Episcoporum
electio.Nomina-
tio.

authoritate approbetur, p̄ficiatur, & ab alijs episcopis consecretur. Cœperunt autem sic editi siue nominati indulgentiarum vel conuentionum quadã admitti ad consilia publica, priusq; approbentur à pontifice. Non item ad functiones sacras, & iurisdictionem ecclesiasticam, & administrationem honorum. Sed à morte episcopi collegium sacrum distributis inter se curationibus bona vacantia administrat: Excepta Gnesnensi diocesi, quæ peculiarem habet Oeconomum, etiam viuente Archiepiscopo. Ius autem dicit in ea iuxta ac in alijs diocesis vacante sede vnus aliquis, quem collegium administratorem temporarium renunciauerit. Abbatum & præpositorum eligendorum ius collegia monachorum hætenus retinere. Sed iam vix retinent, ab episcopis primū, deinde à regibus etiã labefactatum & violatum. Ad electionem quidē certè Regius assensus, & episcopi auctoritas accedat oportet. Cæterum in sodalitijs & conuentibus fratrum mendicantium neutrum horum requiritur. Ne in inferioribus quidem & quasi vicarijs locupletiorum monasteriorum curationibus, quas ferè p̄posituras vel prioratus vocāt. Prela-

Oeconomus
Gnesnensis.Admini-
strator.
Sacerdoti-
orum col-
latio.Abbatum
electio.

ti & canonici ecclesiarum cathedralium partim a pontifice max. partim ab ipsarum episcopis alternis mensibus creantur. Primariorum tamen secundum episcopos in unaquaque ecclesia prælatorum, & nonnullorum canonicorum edendorum, siue commendandorum, & ut vulgò loquuntur, presentandorum ius regi concessum est pontificum superiorum indulgentia. Indultum est idem ius etiam priuatis quibusdam, præsertim episcoporum curatoribus, in alijs quibusdam sacerdotijs. In paræcijs verò & alijs minoribus sacerdotijs vsitatum & legitimum est, ut ius edendi sit penes eos, unde profecta est dotatio cuiusque sacerdotii, vel in quorum bonis id, prouentusq; eius siti sunt, sic tamen, ut penes episcopum sit approbatio editi, & reprobatio, si non sit idoneus: aut si plures pariter edantur, diiudicatio. Quod de illis quoque qui à rege, vel alio quopiam profano commendantur, siue presentantur intelligendum est. Vocantur autem patroni vsitato iuri pontificio nomine, collatores etiam vulgò, qui ius hoc edendi, siue præsentandi habent: Quibus inuitis obtrudi sacerdotem siue beneficiarium per legem non licet, ne pontificis

ficis quidem maximi auctoritate: nisi ii sese indignos eo iure reddiderint, aut intra tempus legitimum uti eo neglexerint. Obtruso pœna est proscripcio. Quæ sic obiter, & præter institutum propemodum hic nobis perstricta sunt. Ad proprios reipubl. Polonæ magistratus reuertamur. Palatinos & Castellanos, & reliquum omnem Senatum regni princeps legit, & iureiurando obstringit sibi & regno siue reipubl. Idem confert præfecturas, ceterosque omnes magistratus, honores & ministeria publica. Sed in magistratibus regni illud receptum est, ut non nisi in comitijs renuncientur. In iudice verò & subiudice, & scriba siue notario terrestribus ita est adstricta legibus potestas principis, ut nobilitas eius satrapia siue territorii, cuius iudex, vel subiudex, vel scriba decessit, conuentu instituto auctore & præside palatino, quatuor patres familias equites eligat: de quibus princeps unum, quem vult in locum vacantem surrogat. Abrogari verò magistratus, aut honor ullus nemini potest, nisi per maximam vel mediam capitis diminutionem, hoc est, libertatis, ciuitatisue, siue nobilitatis & bonæ famæ amissionem: aut si quis alium

Senatus & magistratum equestrium creandorum ratio.

Iudicis, subiudicis, & notarij electio.

Magistratus & honores perpetui.

magistratum honorémue adeptus sit, quem cum priori retinere iure non possit. Ipse se quisq; abdicare arbitrato suo potest. Præfectura, & metallorum, teloniorumq; curatione princeps amovere quemlibet, quando vult, potest, nisi cui ipse promiserit, ac diplomate cauerit, ut ad certum tempus, vel quoad vixerit amoueri nequeat.

Aulico item magistratu & ministerio amouere queng; regi licet. Non temerè tamen id facit, nec ferè sine nota ignominix: nisi lex iubeat. Exactores tributorum annui ferè creantur à rege, vel

Plebeiorū
magistratu
um creatio

comitiali placito. Plebeios magistratus partim domini, vel præfecti creant, partim ipsi sibi ciues & oppidani legunt, præter Cracouiam, ubi Palatinus ius legendi senatus habet, abrogandi non habet. Nec nisi morte, aut maxima mediæ capitis diminitione honoris amittitur: Ex omni

Cracouien-
sis consuli
creatio.

etiam numero viginti quatuor consulum, quotannis octo, quos vult, Palatinus rebus gerendis præficit, quos præsidentes vocant: de quibus certo ordine singuli sunt magistratuum in sex hebdomadas. Nec multum diuersa est ratio consulum in aliis quibusdam ciuitatibus & oppidis: Nisi quod præfecti in sua quisq; ditionis oppido unum

aut

aut alterum legendi facultatem habent. Cazimirix, Cleparia, & Prossouia magnus procurator arcis Cracouiensis, cum in legendis consilibus, tum in aliis rebus præfecti vicem obtinet.

Idè aduocatum & scabinos iuris supremi Theutonici siue Magdeburgensis legit. Cæteros autè scabinos, ipsi consules siue decuriones in sua quique ciuitate & oppido legunt, & sacramento adigunt. Cracouia aduocatum quoque iudiciale.

iudicum
iuris supre-
mi creatio.

Cæterum Scultetus siue aduocatus hereditarius in quouis oppido, vico atque pago semel à domino constitutus magistratum hunc, obnoxium ipsi domino ad equestre ministerium, rei q; publicæ ad expeditionem bellicam, etiam ad hæredes transmittit. Quin & in externum transferre assentiente domino potest. Est tamen ius fasque domino amouere scultetum, & aduocatum hereditarium contumacem aut inutilem,

Scultetus
siue aduo-
catus hæ-
reditarius.

per soluto ipsi precio, quod habet inscriptum in diplomate, vel secundum estimationem emolumentorum atque adificiorum. Nisi quid enorme & priuatione dignum is commiserit. Quo quidem iure multi sic abuti cæpere ad augenda commoda sua, ut scultetis & aduocatis

V 4

hæredi-

hereditarijs sine ulla culpa eiectis prorsus, vel in ordinem redactis, agros eorum praedijs suis adiunxerint, iudicijs verò iudiciales aduocatos arbitrato suo praeficiant. Reditus magistratum regni exigui, terrestrium verò & aulicorum nulli ferè sunt. Ne urbanorum quidem & oppidanorum, & agrestium ulli ferè certi sunt. Honorem Poloni satis amplum & luculentum virtutis & honestorum laborum pramium esse duxerunt, etiam sine compendio: quod minus generosi animi magis plerunq; consecretantur. Sunt tamen certa mercedes, & quasi sportula, qua iudicibus iudiciorumq; administris penduntur à litigantibus. Primores aliquot Palatini & Castellani, mediocres tamen habent redditus, partim ex agris & praedijs, partim è salinis, vel telonijs, siue alijs quibusdam pensionibus à principe antiquitus in omne tempus attributis. Episcopi nonnulli per amplos habent, unde non modo ipsi commodè & cum dignitate viuere, & senatoria munera lautè sustinere, verum etiam inferioris ordinis sacerdotes, socios & administratos suos rectè alere ac tueri, & omnem cultum diuinum cū dignitate administrare, & egenis deni-

Reditus magistratum.

Episcoporum, & aliorum sacerdotum redditus.

Episcoporum, & aliorum sacerdotum redditus.

que

que liberaliter subuenire queant. Habent etiam decimas omnium segetum publico principum ac totius Polonia consensu iam inde ab initio suscepta religionis Christiana attributas, & alijs quibusdam pensionibus postea vel cumulas, vel commutatas: indeque cum alijs quibuslibet sacrorum administris, tum paræcis, prelatis, & canonicis certas portiones antiquitus segregarunt. Habent & luculentos fundos, praedia, pagos, oppida, arces, & territoria, partim principum itidem principum & regum, partim principum munificentia adiecta. Ne abbatum quidem, ac ceterorum sacerdotum, primariorum praesertim, quos prelatos vocant, & monasteriorum, atque etiam paræcorum pijs & honestis vsibus male prospexit similis pietas & beneficentia. Ipsi etiam superiorum temporum episcopi, abbates, & sacerdotes successoribus & posteris suis permultum addiderunt, patrimonialia sua, vel emptà aliunde bona, censusue sacerdotijs adiungendo, templorumq; splendorem, aedificiorum atque donariorum omnis generis magnificentia augendo, quo augustiorem cultum diuinum redderent. Atque haec omnia cum

Priscorum Pol. diuina cultus augendi studium.

X

ipsis

Benignitas
dei in pios.

ipsis adeò personis ecclesiasticis maiorum legibus ac principum benignitate immunia sunt a plerisque omnibus muneribus & oneribus publicis. Quo prolixior autem fuit hominum in ordinem sacrum munificentia superioribus temporibus, hoc erant abundantiores & ipsi, qui de suo liberales erant, licet minus curæ laborisq; rei familiari impenderent. Nunc passim in alienas donationes ac decimas inuaditur longè maiore auaritiæ rapacitatisque infamia, quam egestatis releuatione. Atq; id tentatur etiam (proh nefas) placito & auctoritate comitorum publica, quarefrenari potius talis priuatorum hominum temeritas & iniustitia deberet: ut fuit refrenata antiquioribus constitutionibus & magistratum seueritate laudabiliter iuxta ac utiliter. O tempora: o mores. Nos ad institutum nostrum reuertamur. Multi tamen è sacro ordine nullos habent certos redditus: sed partim Episcoporum & opulentiorum non modo sacerdotum, verum etiam profanorum stipendijs, partim cetera multitudinis quotidiana beneficentia & quasi stipe vitæ sustentant. Quales ferè sunt etiã ij, qui vocantur mendicantiũ conuentus, siue collegia.

Sed

Sed nos honorum & magistratuum omni fermè ratione explicata, ad iudicia transeamus. Eorum autem ratio varia & perplexa est in Polonia. Habet ordo ecclesiasticus, quemadmodum & apud alios Christianos populos, sua, quibus cæteri quoq; homines, nobiles pariter ac plebeij obnoxij sunt aliquatenus in ijs præsertim causis, quæ cum religionis, aut personarum, rerumue sacrarum ratione aliqua ex parte connexæ sunt: Quales sunt, de institutis & ritibus religionis, quæq; his aduersantur de impietate, hæresi, schismate, magia, incantationibus, scenore, sacerdotiorum cauponatione, quam Simoniam vulgò vocant: Itemq; de decimis, & fundis, & quibusuis censibus ac redditibus ecclesiasticis, de cade, vi, & iniuria sacris initiato homini, re iue, aut loco sacro, seu sacerdotiifundo illata. Adhæc de iure patrocinijsiue patronatus, quod vocant, & de sacerdotiorum iure quæuis controuersia, item quæ de iure matrimonij & natalium, & de miserabilium egentiumque personarum iniurijs, quæque ex obligatione in foro ecclesiastico facta, oriuntur. Testamentaria cause profanorum hominum in hoc æquè ac profanis foris

X 2 discep-

disceptantur, dummodo extra iudicium testamenta sint condita. Aliter enim, in eo foro disceptantur, in quo sunt condita. Nisi quid forte legatum sit pietatis ergo, & ad piam causam, ut vulgò loquuntur, hoc est, templis, ecclesiarumue ministris, aut egenis: Quæ causa propria est ecclesiastici iudicij. Est autem iudiciorum ecclesiasticorum summa penes episcopos: quorum vices gerunt ij, quos vocant vicarios in spiritualibus, Cancellarij, & officiales: Inter quos vnus, qui est primarius, generalis appellatur: Cateri foranei. Ab episcopis, eorumque vices gerentibus prouocatio est ad Archiepiscopos: Et ad Gnesnensem quidem ab ipso etiam Leopoliensi Archiepiscopo: Idq; eo nomine, quod ille est legatus perpetuus, siue, ut vulgò loquuntur, natus sedis apostolica. Pertinent autem ad eius prouinciam hi Episcopi: Cracouiensis, Vladislauensis, Pofnaniensis, & Plocensis in Polonia, Vratislauenensis in Silesia Bœmica ditionis: Lubussensis in Marchia Brandenburgensi, Vilnensis in Lithuania: & Medniciensis in Samogitia: Olim Culmensis quoque in Prussia, & Camenensis in Pomerania sub eo fuere. Sed auulsi sunt postea. Ad

Leopo-

Indices ecclesiastici.

Archiepiscopi Gnesnensis iurisdictione.

Leopoliensem verò, Pramislensis, Chelmenfis, Camenecensis, Lucensis, siue Luceoriensis, atq; Kiouiensis. Extrema tandem prouocatio est ad pontificem max. antiquissimo Christianæ religionis instituto. Omnes autem iudices ecclesiastici iudicant, siue ad eò iudicare debent è præscripto ecclesiasticorum & pontificiorum canonum: Et præter diras siue censuras & interdicta ecclesiastica, habent ius quoddam coërcendi fontes, in sui quidem ordinis homines laxius, in profanos autem restrictius, ita ut contra hos ad executionem rerum iudicatarum, urbanorum, ac terrestrium magistratum opem ad extremum implorare necesse habeant. Nec ij iure eis deesse possunt, aut debent. Habent & profani inter se nobiles iuxta ac plebey sua iudicia: quibus sacris initiatum aut sacerdotio præditum præesse non licet. Ac nobilitas quidem terrestribus iudicijs peculiariter subest: quæ à iudice, subiudice & notario terrestribus exercentur, alibi quidem quater, alibi sexies quotannis, alibi verò singulis mensibus: Nisi forte iudex, subiudex, aut notarius desit: aut bellica expeditio, vel comitia, colloquiæ (de quibus paulò post dicemus) inter-

Executio rerum iudicatarum ab ecclesiasticis iudicibus.

Terrestria iudicia.

ueniant. Tunc enim silent iudicia nobilitatis, non terrestria modo, sed & alia. Sunt autem in qualibet satrapia siue palatinatu certa oppida, in quibus ius hoc dicitur nobilitati, in eo ipso territorio bona agrosq; habenti. Nec euocari quenquam è suo territorio licet, nisi ipse certa obligatione nominatim ab hac prærogatiua recesserit. Caterum qui nulla habet bona terrestria, conueniri hoc iure non potest. Ne sacerdos quidem, exceptis causis finium regundorum, & adscriptitiu alieni profugi, casi, vel vulnerati: aut si ullo alio, quam sacerdotii nomine bona terrestria possideat, Oppida verò ac territoria iudiciaria hac sunt: In Cracouiensi quidem satrapia Cracouiensis arx, Prossouia, Xianzum, Lelouia, Biezzum, Cichouia, In quo oppido & Sandecense territorium iudicatur: In Posnaniensi, Posnania, Costenum, & Vvschoua: In Sendomiriensi, Sendomiria, Radomia, Opocinum, Chencini, Vislicia, Pilsna: In Calisiensi, Calisia, Gnezna, Pysdri, Coninum, Keina, Naclum: In Siradiensi, Siradia, Schadcouia, Petricouia, Radomsci, Itē Velunia & Ostressouia: In Lenciciēsi, Lencicia, Breżini, & Orlouia: In Brestensi, Breste, Crus-

Iudiciorū
terrestriū
loca.

Crusicia, Couale, & Pradecia: In Inouladislauiensi, eiusdem nominis oppidum & Bydgosia: Itemq; Dobrinū, Ripinū, & Lipnū: In Russica Leopoldis, Premislia, Sanocū, Halitia, & Chelma: In Podolica, Camenecia, ac Trebovulia: In Lublinensi, Lublinum, & Luconia: In Belsensi, Belsum, Buscum, Grodlum: In Plocensi, Ploscū, Plonscum, Bielscum, Racionzum, Zauucrze, Mla-vua ac Srenscum: In Masouia, Cyrscum, Vizza, Varsauia, Nur, Vissegradum, Zacroci-mum, Ciechanouia, Lomza, Zembrouia, Rozanum, & Liua: In Rauensi Rava, Gostinum & Sochaciouia. In Silesia verò Osuencimense & Zatoriense territoria suos utrunq; peculiare habet iudices, quicum delectis de nobilitate iudicunt, præfecto præsidente. Adeundem modum & Seueriensis Episcopi Cracouiensis ditio suum habet. Olim in Silesia ipsi duces in sua quisq; di-

Terrestri
iudicij cau-
sa.

tione iudicij præsidebant. His iudiciis disceptantur plerq; omnes causæ nobilitatis priuatæ ac ciuiles, quemadmodum loquuntur iureconsulti, ac ciuilitate institute. Regundorum finium controuersia hoc ipso quidem iudicio primum disceptatur inter equites, vel inter equitem

Succame-
rarij iudici-
um.

Et sacerdotem: Sed ad extremum ad Succamerarium terrestrem remittitur: Qui in rem presentem veniens, ipse per se, vel per vicarium suum camerarium illius territorii eam definit, certisq; metis atque signis fines controuersos designat. Atque hæc est unica Succamerariorum iurisdictio. Cæterum si cum regis bonis equiti sit controuersia, non apud terrestre Et Succamerarii iudicium ea disceptatur, Sed princeps equite postulante edit recuperatores aliquot de senatu ac terrestribus magistratibus siue officialibus eius satrapix, in qua est controuersia: quos commissarios appellamus. Inter quos etiam Succamerarius esse solet: Qui in rem presentem venientes iudicium id peragunt. Idem fit, si sacerdotalis fundus Et ager cum regio controuersos fines habeat: Nisi quod episcopus quoque eius diocesanos editis à principe recuperatoribus unum aut alterum de suis adiungit. Eademque ratio est petendi recuperatores à principe in causa heriscundæ familiæ, siue diuidendæ hereditatis inter fratres & propinquos. Quanquam hoc iudicium etiam præfectus exercere potest. Criminales verò causa de stupro, incendio, la-

Capitaneorum, seu præfectorum iurisdictio.

troci-

trocinio, & vi armata alienis adibus illata ad præfectorum siue capitaneorum in sua cuiusque præfectura iudicium pertinent. Ciuiles item, quæcunque aduersus eos equites instituuntur, qui certos agros Et bona terrestria nulla habent, Et qui, licet habeant, obligatione tamen sua ei foro obnoxios sese fecerunt, aut merent publica stipendia, aut sacris initiato homini damnum vel iniuriam intulerunt, aut alienum adscriptitium detinent, aut obstaculis denique liberam fluij navigationem impediuerunt, aut si quis executionem rei iudicatæ prohibeat. Dicit autem ius præfectus in arce, aut alio loco publico sua quisque præfectura sexta quaque septimana per se ipse, vel per vicarium suum iudicem castrensem. Atque hæc sunt iudicij castrensis causæ. Officij verò sunt, rerum iudicatarum executio: viduarum de bonis dot alibus eiectionum, Et aliorum spoliatorum restitutio: Itemq; in deprehensos in scelere, Et recenti, ut dicunt, crimine, aut si quis rem alienam apud se deprehensam non reddat domino repetenti: Adhæc in turbatores conuentuum & iudiciorum, & qui vetitis armis utuntur: in tolerantes censuras ecclesiasti-

Castrense
iudicium.
& officium

Y

cas

cas ultra annum in iniustos teloniorum exactores, & in sacerdotes, qui iuri patronatus profanorum hominum derogant, aut profanos praeter ius ad forum ecclesiasticum euocant, animaduersionis. In quibus causis quouis tempore cuius querenti praesto esse debet praefecti auctoritas per seipsum, vel per suppraefectum suum: Cuius iurisdictio ad causas officij pertinet, si praefectus ipse ius non dicat. Denique, furti suspectos prehendendi, reosque iudicandi, & supplicio afficiendi ius habet praefectus & suppraefectus eius. Equites tamen non nisi eos, qui ter ab eodem crimine damnatis editi, & in album furum relati sunt.

Regij iudicij causae.

Porro status controuersae, hoc est, cum de genere cuiusquam ambigitur, & ea causa, qua infamia, confiscationis bonorum, vel capitis poenam (praeter eas, quas dudum praefectis attributas esse exposuimus) annexam habent, atque etiam de caede equitis, ad solius principis iudicium pertinent. De quibus is in comitijs demum cum senatu cognoscit. Praeter, si maleficium in loco domicilij principis ipsius, & sub aspectu eius patratum sit. Tunc enim, si auctor recentis & calenti, quod aiunt, facinore comprehendatur,

datur, absque citatione princeps eum ipse per se, vel per Maresalcum iudicat. De personalibus vero causis civilibus, aut civiliter institutis, quae alioqui ad forum terrestre vel castrense pertinent, princeps itidem quouis loco ac tempore cum ijs, quos ad manum habet, consiliarijs citatum iudicat. Quae citatio curialis, & post curiam vocatur. Sed eius usus ita restrictus est, ut ea in minore Polonia contra eum, qui in maiore tantum agros ac domicilium habet, non valeat: neque contra. Id autem iudicium regionum terminorum nomen habet, Vbi etiam in praefectos & administratos suorum bonorum & reddituum, quod ad munera eorum attinet, quicumque & undecunque ij sint, princeps ipse sibi, instigatore ut vocant, officij petente, & cuius postulanti ius dicit: Ac de prouocationibus quoque ab officio castrensi ad se delatis cognoscit. Iniustus tributi publici exactor etiam apud episcopum, palatinum, vel Castellanium loci recte conuenitur. Belli autem & expeditionis publicae tempore, cum silent omnia su-

Citatio post curiam.

Regij terminis.

Exactores iniusti ubi conueniuntur.

Jurisdictio bellica.

tione flagitiosè aut sceleratè admittuntur. De iniurijs quidem damnisq; datis in expeditione bellica palatini vel castellani cuius querenti contra sue quisque satrapie, vel territorij homines ius dicunt. Si quis autem non pareat, principi deferunt. Ab omnibus porrò iudicijs nobilitatis prouocatio est ad principem: Nisi quòd ea, quæ sunt à terrestribus iudicijs, in colloquijs ferè prius disceptantur. Appellatur autem colloquium, peculiare palatini cum dignitarijs, ut vocant, ac terrestribus magistratibus iudicium: Quod semel quotannis autumnii tempore in qualibet satrapia siue palatinatu exerceri debet, prouocationem à terrestribus & castrensi- bus eiusdem satrapie iudicijs disceptandarum causa. Quod etiam terminos generales vocant. Vbi & alienationes, & obligationes bonorum terrstrium rectè fiunt. Ab hoc itidem ad regem est prouocatio. Silesii soli colloquiorum usum nò habent, neque principem, sed vicinorum duorum triumue principatum iudicia appellant, in eisq; acquiescunt. Verum id quoque iam exolefcit, pleraq; omni nobilitate in ius terrestre Polonicum sese transferente. Fuit aliquando in comi-

Appella-
tiones seu
prouocati-
ones.
Colloquia
& genera-
les termini

Silesiorm
prouocati-
ones.

mitijs facta mentio instituenda in Polonia no- uæ iudicum decurie, quæ de omnibus prouoca- tionibus absque prouocatione cognosceret, quale est in Gallia, quod parlamentum vocant. Sed non placuit, summam iudiciorum cuiquam, præ- ter principem concedere. Quo fit, ut principe plurimis & varijs iudicijs distento, & alijs mul- tis & grauibus tam ampli regni negocijs distra- cto, lites in multos annos comperendinentur, nò sine dolore & querimonia multorum, præsertim augete indies cupiditate hominum, nullaq; aut exigua certè temerè litiganti, & prouocanti, & iniusto iudici pœna imminente. Vnde capita- les existunt inter necessarios quoque & cognatos inimicitia, cædes innumerabiles patrantur, co- actisq; hominibus, & iustis propè exercitibus nonnunquam confligitur, dum offensus longa iudicii comperendinatione, armis ius suū quis- que persequi ac tueri contendit. Sed ad prouoca- tiones redeamus. Earum duplex est ratio: Est e- nim appellatio, qua inter litigantes solos discep- tatur iustè an iniustè iudicatum sit. Motio- uerò est, in qua iudex à quo prouocatum est, ne- cesse habet tueri sententiam suam, ut si iniqua

Iudiciorū
&
comperen-
diatio.

Appella-
tio.
Motio.

& legibus aduersa fuerit, ipse pudeat, mulcteturq;. Quod tamen iam ferme exoleuit. Vtrobique autem Regio vel colloquiorum iudicio iniustum decretum rescinditur, vel corrigitur, vniuersaque causa disceptatur ac diiudicatur, etiamsi ab interlocutoria sententia prouocatum sit. Tametsi non temere admittitur eiusmodi prouocatio. Cognitionum quoque principis de prouocationibus non vna est ratio. Nam de ijs, quae sunt à colloquijs, non nisi in comitijs cum frequenti senatu cognoscit. Ad eundem modum de ijs etiam, quae sunt à terrestribus iudicijs. Nam de ijs quoque recte à rege cognoscitur in comitijs, si prius ea instituantur, quàm colloquia. Itaque indiscriminatim prouocari solet ad colloquia, vel ad comitia. De cæteris verè prouocationibus, quae sunt ab alijs iudicijs, etiam extra comitia cognoscit is cum ijs consiliarijs, quos ad manum habet, quouis tempore & loco: sed tamen intra fines regni modo. Foris enim nemo equitum sistere se principi necesse habet vlla ex causa, exceptis fiscalibus. Tam in comitijs autem, quàm extra ea in iudicijs regijs adhibentur in consilium etiam supplicum libellorum magistri, siue Referendarii:

De prouocationibus
vbi cognoscatur.

darii: Itemque iudex, subiudex, & notarius eius satrapiae siue territorii, in quo iudicium exercetur: præter, cum de prouocatione ab ipsorum iudicio facta cognoscitur: Habentque ii postremi omnium dictionem sententiae. Atque his ferè foris atque rationibus nobilitatis iudicia peraguntur. Nam barbaricus ille mos, & à religionis Christianae institutis alienus, prouocandi aduersarium ad singulare certamen, & ferro usque ad necem vel deditioem de iure & iniuria, veròque & falso decernendi, nihil habet commune cum iudicio. Quod tamen nostra memoria semel tantum à Sigismundo rege seniore admissum est. Cum autem liberrimus sit nobilitati Polonia armorum usus, ad iudicium tamen terrestre & castrense, & ad comitia nemini armato venire licuit antiquitus: Nunc ea lex propemodum obsoleuit. Ecce autem, dum nos hoc opus, typographo altera editione parate, recognoscimus, p̄diit in lucem noua forma supremorum iudiciorum, in proximè præteritis comitijs Varisauisibus promulgata & edita. Iudicatur autem nobilitas suis legibus, quae paucae sunt, & constitutiones vel statuta regni vocatur (Tametsi Masouij peculiaria habet)

Referendarii, iudex, subiudex, & notarius terrestres in iudicijs regijs. Duellum, siue singulare certamen.

Statuta regni, & Masouiois

vel moribus, vel ex aequo & bono, siue ad eò iudicum opinione. Magnam autem in iis iudiciis vim habet exemplum, & res in simili causa à principe iudicata: Per magnam item, ne dicam nimiam, iusiurandum. Magnus est etiam usus preconum, quos ministeriales terrestres appellant, magnaq; eis fides habetur, ut idem ac tabellionibus in iure civili Romano & pontificio. Sed sunt ii ferè illiterati, plebei, & rustici homines, palatini vel delegati cuiuspiam Regii arbitrio, nec semper exquisito delectu creati. Verum in omni ferè functione sua unum aut alterum equitem testem adhibeant oportet. Actori nulla est poena, si causa cadat, vel eam non prosequatur: Ac ne litis quidem impensas reus soluit. Reus condemnatus si iudicatum non soluat, multatur & pignatur. Condemnatur autem actori in civili causa, quancumque is litem iureiurando interposito estimauerit. Licet tamen iudici ante iusiurandum eius estimationem moderari. Si non paruerit rei iudicatae, reus condemnatur in duplum: quod per lucrum appellant: Prior enim condemnatio lucrum dicitur. Si duplum ad certam diem non exoluerit, praefecti regii eius ter-

Res iudicata.

Preco siue ministeriales terrestres

Executio rerum iudicarum.

rito-

ritory, in quo reus bona vel domicilium habet, opem actor implorat. Ex decreto autem praefecti bona rei possidenda ei traduntur, adiecta certa multa, quod vadium vocant, si is prohibuerit. Sin iterum id fecerit, duplicatur multa: Sin tertium, triplicatur, quae vadia duplicata & triplicata appellantur. Quae tamen sublata iam sunt, Et post interpositum unum vadium, reus si pergat esse contumax, proscribitur. Proscriptus vero, si vi sese nihilominus suaq; tueatur, cuncta illius praefectura nobilitas contra eum armatur. Ac ipse quidem prehenditur, bona vero eius à praefecto possidentur, donec de rebus eorum, non modo iudicatum, sed multa etiam & vadia solvantur. Indicta vero causa, hoc est, non circumscriptum, neque convictum equitem, qui modo agri aliquid habeat, prehendere nulli magistratui ac ne principi quidem licet, praeter furem à servis poena inter conscios & complices ter editum, aut in maleficio quovis deprehensum, aut qui satisfacere nolit, vel non possit. Praefecto remissiori in executione rei iudicatae poena est, abrogatio praefecturae: Nisi forte eam oppigneratam teneat.

Nobilium prehensio.

Capitanei negligens poena.

Tunc enim centum marcarum multa ipsi à

Z

princi-

principe irrogatur, detrahenda de summa eius capitali, quoties officium suum non fecerit. Oppidanis verò & plebeis magistratibus equitem etiam in scelere deprehensum sine præfecti auctoritate iudicare omninò fas non est. Sed sufficiant hac nunc de iudicijs nobilitatis. Neq; enim omnem iudiciorum rationem & formam persequi hic nobis propositum est. Habet plebs peculiaria iudicia, in pagis quidem simplicissima, quæ vel ab advocatis iudiciarijs, & scabinis, vel à scultetis, vel à præfectis siue dominis, eorumve procuratoribus & administris sine strepitu & figura iudicij exercentur. In urbibus verò & oppidis exactiora sunt: Quibus equites quoq; qui in ijs domicilia & ius civitatis habent, sunt obnoxij in causis civilibus duntaxat. Ea verò partim penes advocatum & scabinos, partim penes decuriones siue consules & magistratum civium sunt, partim etiam penes magistratos contuberniorum.

Plebis iudicia.

Rusticana.

Urbana.

Magistrorum contuberniorum iudicia.

Consulium iurisdictionio.

Consules ac magistri contuberniorum sine strepitu & figura iudicij iudicant, hi quidem singuli cum adiunctis sibi primoribus siue senioribus de lenioribus causis, sui quisque generis opificum.

Consules verò de quibusvis, Proprietatis modo

do

do & possessionis rerū soli, & hereditatis, itemq; capitalibus atq; sanguinarijs exceptis: Quæ ad scabinorum & advocati iudicium peculiariter pertinent. Parvi momenti causas etiam magister civium solus cognoscit. A quo itidem, atq; à magistris contuberniorū, ad cōfessum consulū est provocatio. Ab his porrò ad Regē. Inolevit tamē multum in locis mos, ut prius præfectus, vel qui præfecti loco est, appelletur. Atq; inde demum ad Regem provocetur: Idq; de regijs modo oppidis intelligendum est. Nam quæ alii cuiquam subsunt, in ius provocationes fiunt ad eorum dominos: Ab ijsq; sine provocatione iudicantur. Sed si quis adversus eum, qui ipsi non subest, iniuste iudicaverit siue per se, siue per vicarium & procuratorem suum, vocari potest eo nomine in ius, cui est obnoxius. Porrò episcoporum & aliorum ecclesiasticorum hominum subditis opem superioris (nempe episcopi, vel archiepiscopi, vel pontificis max.) contra vim & iniuriam dominorum suorum implorare licet. In iurato autem iudicio (sic enim vocatur id, cui scabini cum advocato iurati præsident) accuratior servatur processus iudiciarius. Exerce-

Scabinorū iudicia.

Nobilitatis & sacerdotum oppida non subsunt iurisdictioni regie.

Iuratum iudicium.

Z 2

turque

turq̄, id ferè inter conciuēs quintodecimo quoque die, nisi is festus sit: Externis verò & hospitibus postulantibus, quoties opus est, exponitur. Atque hoc quidem emptum dicitur, illud expositum. Est & tertium genus iudicij huius, quod magnum vocant, ac ter statis anni temporibus ob grauiores causas magistro ciuium presidente exercetur. A iurato autem iudicio legitima est prouocatio ad aliud quoddam iudicium primum urbium. Quod quidem duplex est, itidem ac leges, quibus oppidani & agrestes fere vtuntur. Neque enim iisdem i cum nobilitate legibus tenentur. Ac in Masouia quidem, ubi ius Culmense viget, ad Varsauiensem, vel Plocensem, hinc porrò olim quidem ad Culmensem, nunc autem ad Torunensem in Prussia magistratū, atque inde demum ad regem prouocatur. In cæteris vero partibus Polonia, ubi iuris Teuthonici Magdeburgensis vsus est, olim ad Magdeburgensem ciuitatem prouocabatur. Sed Cazimirus magnus rex aliud quoddam iudicium in arce Cracouiensi instituit, quod iuris supremi Teuthonici siue Magdeburgensis appellauit. In quo aduocatus cum septem scabinis, magno pro-

Prouocati-
onum &
legum ra-
tio quibus
oppidani
vtuntur.

Culmense
ius.

Magdebur-
gic.

Iudicium
iuris supre-
mi Theu-
thonici.

cura-

curatore eiusdem arcis presidente, non tamen iudicante, iudicant de prouocationibus, quæ fiunt à iuratis quarumuis ciuitatum & oppidorum iudicijs. Inde verò prouocatio est ad aliud iudicium, quod sex ciuitatum dicitur. In quo eiusdem Cazimiri instituto bini certorum oppidorum decuriones siue consules Cracouiam conuenientes in arce ius dicunt sine prouocatione. De quo in historia fusius persecuti sumus. Cognoscit autem princeps de prouocationibus ijs, quæ ab urbanis & rusticis iudicijs veniunt, & omninò de controuersis plebeiorum sua ditionis atque etiam de querimonijs aduersus præfectos suos, ubi libet, etiam extra regnum, & cum quibus vult consiliariis. Sæpè etiam consiliariis & Referendariis, aut Secretariis earum cognitionem delegat, sed ita, vt ipse tamen ad extremum iis referentibus statum controuersæ, decernat: præsertim si causa ad equitem pertineat. Solum Cracouienses ciues hoc præditi sunt privilegio quod à Senatu urbano non nisi ad principem est prouocatio, & quod eius, itemq̄, Cazimiriensis & Clepariensis ciuitatum causæ ab eo non nisi Cracouix iudicantur. De quo disceptare non est

Sex ciuita-
tum iudi-
cium.

Hist. lib. 12.
De prouo-
cationibus
ab urbanis
iudicijs v-
bi princeps
cognoscat.

Cracoui-
ensis ciui-
tatis priui-
legium.

Scultetorū
iudicia.

huius loci. Habent & sculteti siue aduocati hereditarii pagorū & oppidorum nonnullis in locis inter se peculiaria iudicia. A quibus item ad ius supremum Teuthonicum, & inde ad sex ciuitates, vel ad principem prouocatur. Iure autem suo quisque iudicatur, prater, quod causa cædis & vulnerum Polonico tantum iure iudicantur,

Homicidij
iudicium
& pœna.

Quo reus actoris iureiurando peragitur. Ac in recenti quidem crimine comprehensus, eadem capitis luit supplicio. Post interpositam verò viginti quatuor horarum moram, ad certam & lege constitutam capitis estimationem damnatur: quæ diuersa est equitis ac plebei. Pro plebeio capite partim domino eius, partim liberis & heredibus cæsi cedit multa: Pro equestri verò, solis liberis & heredibus exoluitur. Equiti tamen pro equitis cæde ultra multam pœna est etiam carcer annuus. Sed Masouiorum legibus carceris pœna soluitur is, qui profugus annum totum exulauerit. Caterum plebeio equitem interfecisse, capitale est, nisi transigat cum actore. Vulnerum certæ sunt estimationes. Fit autem contemptu harum pœnarum, & capiendæ ex multa pecunia, ut crebrescant magis indies iurgia

gia cadesq;. Executio rerum indicatarum contra oppidanos & urbanos penes magistratum est in sua quemque ciuitate, aut si is negligat, domini, vel præfecti auxilium imploratur. Et hæcenus quidem de iudicijs. Comitiorum ratio nobis deinceps exponenda est. Duabus autem de causis ea habentur: propter consultationes de republ. & propter iudicia. Cum enim Polonis, quemadmodum supra memorauimus, ea potissimum forma reipubl. placuisset, in qua penes unum quidem esset iudiciorum, & rerum omnium in bello & in pace summa, sed ut is rerum agendarum & iudicandarum consilia cum compluribus consiliariis communicaret: hi porro cum propter alias functiones publicas, tum etiam propter curam rei suæ familiaris, ad latus principis assidui esse non possent, placuit, ut in ad certū locū & diē cōuocaretur à principe, ad exercēda cū ipso iudicia, cōsiliaq; de republ. capiendā. Hæc sunt comitia publica: Quæ etiam generales regni cōuēt⁹ vocāt. Qui olim simpliciorib⁹ & melioribus seculis bidui vel tridui spacio peragebātur. Augescētibus deinde iudicijs & rebus agēdis, extrahi cœpere in longius tēpus comitia: Sic ta-

Executio
urbanorū
iudiciorū.

Comitiorum
ratio.

Comitia
veterusta.

men, ut pro re noua & insolita annotarit Ioannes Dlugossus, in nonum diem ea extracta esse. Atque hæc fuit vetustorum comitiorum ratio. Posteriori tempore, hoc est auorum ferè nostrorum memoria cum vniuersa nobilitate, & vna de omnibus ciuitate Cracouiensi communicata sunt comitia: cœperuntque adhiberi legati nobilitatis, siue, ut vulgò loquuntur, nuncij terrarum, hoc est, satrapiarum atque territoriorum, & ciuitatis Cracouiensis, principio quidem vnam ob rem, quemadmodum in historia ex Dlugosso retulimus: Nempe sciscendi in bellum tributici causa. Deinde verò, cum siue incuria principum, siue consiliariorum conniuentia, multa, quæ ad salutem & amplitudinem reipubl. pertinebant, negligi, & nobilitatis prerogatiua minui viderentur, ad alias etiam consultationes de republ. accedere cœperunt, non ut consilarii, sed ut monitores principis atque consiliariorum, & custodes libertatis, & prerogatiuarum nobilitatis, ac legum publicarum. Laudabile sane & salutare in primis genti Polonæ (si eo rectè utatur) institutum, & ad optimè constitutarum olim rerum publ. Romanæ & Lacedæmonie

Nuncij terrestres.

Hist lib. 77

mores

mores accedens: Quarum in altera Ephori, in altera tribuni plebis principum & potentium libidini, inertiq; & inutilli administrationi reipubl. obiecti erant. Nunc igitur sine nuncijs terrarum non habentur legitima comitia. Atque eam ob rem quoties ea debent institui, indicuntur prius à rege nobilitati conuentus, quos vocant particulares, ad certos dies certaq; oppida: Maioribus quidem Polonis, hoc est Posnaniensis & Calisiensis satrapiarum equitibus Srodam: Cracouiensi verò satrapia Prossouiam: Sendomiriensi Radomiam: Siradiensi Schadcomiam, excepto Velunensi tractu, qui suum peculiarem conuentum Veluni habet: Lenciciensi Lenciciam: Cuiaviis Radeouiam: Dobrinienses tamen separatim Ripini conueniunt: Russis Viscnam, præter Chelmenses, qui & ipsi Chelmæ suum habent: Podoliis Cameneciam: Lublinensi satrapia Lublinum: Belsensi Belsum: Plocensi Razianzum in eodem tractu: Masouiis Varsouiam, Rauensi nobilitati Rauam: Sochacouiensi Sochacouiam: Gostinensi Gambinum. His igitur locis (nisi iusta causa obstet) nobilitas cum consiliariis & magistratibus terrestribus, siue,

Conuentus particulares.

Conuentus particulares.

Aa

ut

ut vulgò loquuntur, cum dignitarijs & officia-
 libus eiusdem satrapie, vel tractus ad templum
 conuenit, & implorata sacro publico ope diuini
 numinis, legationem regiam audit, ubi, quando
 & quibus de causis opus sit haberi comitia: De-
 inde praeuentibus consiliarijs legatos suos siue
 nuncios deligit, eisq; vel pecnliaria dat manda-
 ta ad comitia, vel vnuerse potestatem facit cu-
 randi ea, quacunque in commune è republ. fore
 videbuntur. Lege autem ab hoc munere legatio-
 nis excluditur, qui priuatum habet negocium,
 & litem in comitijs. Finitur nunciorum potestas
 vnicijs comitijs. Nec idem sanè est in omnibus sa-
 trapijs eorum numerus: Verum pro numero
 territoriorum esse debere existimatur. Nuncijs
 ita creatis in particularibus conuentibus, mox
 instituuntur alii conuentus, quos generales vo-
 cant. In maiore quidem Polonia Coli, in minore
 autem Corcini, quæ etiam Nouaciuitas nuncu-
 patur. Et ad hunc quidem Cracouiensis, Sendo-
 miriënsis, Russica, Podolica, Belsensis, & Lubli-
 nensis satrapiarum, Ad illum verò reliquarum
 proceres, & nuncii recens creati, ac de nobilitate
 qui volunt, constituta itidem à principe die con-
 ueni-

Conuen-
 tus genera-
 les.

ueniunt, audit isq; iterum mandatis regijs, man-
 data nobilitatis, & quæ postulat vsus reipubl.
 inter se conferunt. Atque inde itur ad maiora
 comitia. Quo ubi conuentum est, re sacra solen-
 ni itidem in templo publicè peracta, itur ad au-
 lam. Ibi principe & consiliariis in corona consi-
 dentibus, adstantibusq; ponè secretariis & nun-
 ciis, Cancellarius vel Procancellarius principis
 nomine proponit in medium, quibus de rebus in
 commune consuli operæ precium sit. Deinde con-
 siliarii, ab Archiepiscopis & Episcopis orsi, ordi-
 ne dicunt sententias. Hinc nuncii petita à rege
 venia secedunt in aliud cõclauè, iisdem de rebus
 inter se consultaturi. Reuersiq; siue eadem, siue
 alia die, per vnum aliquem exponunt id, quod
 ipsis in commune visum est, quid probent, quid
 verequirant. Nonnunquam pluribus mandāt,
 si plura sint negocia proponenda, vt suum quisq;
 edisserat. Non modo enim iis de rebus, quæ
 principis nomine propositæ fuere, sed etiam si
 quid aliud ipsis in mentem venit de republ.æ
 postulant, vel admonent. Id verò si est e-
 iusmodi, vt consultationem requirat, & ab eo-
 rum functione non alienum esse videatur, di-

Comitia
 regii.

Comitatus
 regii.

cuntur etiam de eo sententia à senatoribus, exclusis nunciis: interdum etiam non exclusis. In omnibus autem consiliis postremus omnium dicit princeps. Et quod ei placuit, decreti comitialis & legis habet vigorem, dummodo prioribus legibus, nobilitatisque aut sacri ordinis prerogatiuis ne aduersetur. Tunc enim refragari placito principis non solum senatui, sed etiam nunciis fas est. Itaque in eiusmodi consultationibus suspendit ferè sententiam suam Rex, donec inter nuncios & senatores, maioremve eorum partem conveniat. Sed hoc iam aliter modificatum est. Cetera autem consilia de republica, quæ legibus disertè excepta non sunt, nec prerogatiuis nobilitatis præiudicant, cum senatu solo princeps communicat. Quemadmodum iudicia quoque cum eo solo exercet, minimum biduo vel triduo singulis hebdomadis per tempus comitiorum. Sed interdum ea delectis aliquot è senatu delegat. Atque ii quotidie ferè, festis diebus exceptis, iudicant. Verum ab his quoque assessoribus (sic enim vocantur ii iudices) ad regem provocatur. Atque ii statum controversiæ cuiusque, decretumque suum in consessu reliqui senatus exponunt.

Iudicia comitiorum.

Senten-

Sententias tamen denuo non dicunt. Publicarum inter sacrum & militarem siue equestrem Controversiarum inter ecclesiasticum & equestrem ordinem arbitrum arbitrium atque transactio penes Regem est. Comitiam quotannis, nisi quid forte impediatur, institui usitatum est. Nihil tamen prohibet, quo minus vel rarius, vel crebrius instituantur. Crebrius quidem ut id fiat, requirit iudiciorum & provocacionum disceptandarum multitudo: Tametsi extrahuntur ea nonnunquam in quartum & quintum, ac sextum ferè mensem. Locus certus comitiis habendis olim nullus erat. Sed ubi principi collibuerat, etiam sub dio, & in territoris, ea peragebantur: Postea lege in unum conclusa sunt oppidum, in umbilico ferè & meditullio totius Poloniae situm Petricoviam. Comitiorum locus. Sed iam ea inde nova lege in gratiam Lithuanorum Varsaviam translata sunt. Potest tamen Rex assentiente senatu, iusta aliqua de causa alibi quoque ea instituire. Nec illud prætermittendum est, Quod initio comitiorum nunciis nobilitatis singulis certa pecunia in victum de publico numeratur. Senatoribus non item. Ceterum non venienti ad comitia senatori sine iusta causa, lege multa irrogatur:

Aa 3

gatur:

Synodi sacerdotum.

Gnesnen. archiepiscopi praerogativa.

Belli gerendi ratio.

gatur: Sed ea vix unquam à rege exigitur. Habet ecclesiasticus quoque ordo in Polonia sua comitia: quae synodi graeco, sed latinis non inusitato nomine appellantur. Quarum causas & uniuersam rationem è iure pontificio petat, qui uolet. Hic illud modo annotandum est, quod licet Archiepiscopus Leopoliensis suam habeat provinciam à Gnesnensi distinctam, tamen & ipse, & socii, vel, ut vocant, suffraganei eius Episcopi, Gnesnensis Archiepiscopi auctoritatem agnoscunt, cum in prouocationibus & iudiciis, tunc in Synodis: Ad quas ab illo euocantur. Est autem eius, mosque, Petricouia, Lencicia, aut Louicia prouincialem synodum tertio quoque anno, nisi res maiorem celeritatem aliumue locum episcoporum consensu postulet, institui: & adhiberi in consilium abbates & praepositos monasteriorum, & collegiorum sacrorum primariorum (quae capitula cathedralia uocantur) legatos binos, uel singulos duntaxat. Sed nos à synodis & comitiis ad bellum transeamus. Id autem in hac gente à nobilitate geri usitatum & legitimum est antiquitus: Quae cuncta equestris militat, quemadmodum antea diximus, idque pro modo

do bonorum & reddituum facere debet. Sed cum nulla publicè instituta sit bonorum aestimatio, modus hic fidei cuiusque creditus, labente in deterius disciplina & fide, arbitrarius factus est, non sine reipubl. totius incommodo & iniuria. Arbitrarium est & genus armorum. Tenuiores, & qui equum alere non possunt, pedestres militant. Sculteti quoque, sive aduocati hereditarij, & quicumque fundos terrestres hereditarios habent, non sunt immunes à militia. Multatur autem agris & bonis omnibus, si quis paterfamilias à bello abfuerit, aut filium adultum, fratremue, qui ipse separata bona, & militandi necessitatem non habeat, pro se non miserit. Ceterum pupillis impuberibus, agrotis, senio confectis, & uiduis per necessarios & famulos militiam obire licet. Habent autem vacationem militiae tribuni terrestres, praefecti arcium in finibus regni sitarum, vicarij ceterorum praefectorum iurisdictionem habentium, Vicecapitanei & Burgrabii, & qui republ. causa absunt. Habet item ordo cunctus ecclesiasticus, praeter eos sacerdotes, qui bona terrestria hereditario, seu alio quouis, quam sacerdotiorum iure & nomine obtinent.

Pena non militantiu.

Militiae immunitatem qui habeant.

Restas seu
restium
literæ.

ment. Euocatur ad bellum nobilitas antiquo more, dimissis quoque uersus per præfecturas literis signo regio consignatis: Quæ deinde in pertica resti alligata (unde restium nomen acceperunt) à preconibus siue ministerialibus terrestribus ad dignitarios & officiales, siue magistratus, primoresque nobilitatis cuiusque præfectura sublimis & conspicua circumferuntur, & in foris urbium & oppidorum alta uoce publicantur. Ter autem id fieri oportet interpolatis quater-nis septimanis: Nisi decreto comitali tempus id accidatur, binæque testes coniungantur. Post tertias demum restes domo se quisque mouet ad sua satrapix conuentum ad certum locum certamque diem indictum. Inde porrò authore ac ductore palatino cum sui quisque territorij Castellano ad constitutum à principe prope fines regni locum pacati proficiscuntur. Verum hoc quoque, ut alia nonnulla rectè à maioribus instituta, augete indies equitum licentia, conuientiaque magistratuum, in desuetudinem abiit, magno non modo sacerdotum, uerum etiam regionum, & ipsius nobilitatis prædiorum, & adscriptitorum incommodo damnòque. Necesse autem ha-

Bellicae
leges.

bet

bet princeps equestris ordinis homines ab hostibus in bello captos redimere, ac damna amissorum equorum, quæ ij extra fines regni acceperint, exoluere. Captum uerò hostem, nobilem præsertim, is qui cepit, principi tradere debet, acceptis pro eo duobus florenis. Vsu uenit nonnunquam, ut hæc copix diuidantur à principe de sententia amplissimi consilij: Ac cæteris quidem aduersus hostem proficiscentibus, unius aut alterius satrapix nobilitas, uel plurimum, si opus sit, ad præsidium eius ora, unde item belli aliqua est suspicio, relinquatur. Hæc est apud Polonos beligerendi ratio: Hoc robur militia, in equitatu situm. Hæ sunt opes & vires gentis: hæ copix, externis penè incredibiles, & cum quibusuis maximarum gentium opibus ac diuitiis comparande: Quibus olim principes Poloni res magnas & præclaras gesserunt, non domi modo illata bella propulsando, sed foris etiam hostes ulciscendo, fines imperij longè lateque proferendo, & amicis atque sociis succurrendo. Sed cum abuterentur in nonnunquam obsequio nobilitatis, eamque crebrorum ac diuturnorum, minimeque necessariorum bellorum incommodis exercerent, lege cau-

Bb

tum

Bellica ex-
peditio nō
indicitur
sine comi-
tibus.
Nobilita-
tis officiū.

tum est, intra hos ducentos annos, ut ne liceat regi bellum facere sine comitijs & assensu amplissimi consilij: & ut nobilitas fines quidem regni quoties & ubi opus est, absque ullo stipendio tueri necesse habeat, non sine principe tamen, praeterquam in interregno. Caterum extra fines ne ad ullam militiam educi possit inuita, nisi acceptis à rege in quemlibet hastatum equitem quinque marcis, quod perinde est hoc tempore, ac quinque coronati Gallici vel Italici. Peditatus nullus est ferè apud Polonos praeter mercenarium, si quem princeps conduxerit. Mittunt quidemei oppidani currus commeatu onustos cum peditibus: Verum is peditatus non multus est, & sternendis muniendisq; vijs, quam armis tractandis accommodatior. In extrema tamen necessitate & grauiori bello, euocata ad expeditionem nobilitate, oppidani quoq; & agrestes decimum quenque peditem decreto comitali armant & expediunt. Cum autem lentior sit expeditio hac vniuersa, & nonnunquam ciuibus & amicis magis, quam hostibus incommodare soleat, excogitata est ratio conducendi militis mercenarij pedestris & equestris ad subitarias Ta-

Mercenarij
milites.

mitt

Bb

taro-

tarorum, & aliorum hostium excursiones reprimendas, expugnandas munitiones, & alios militares labores subeundos aptior & promptior. Quæ copie pariter cum decanis, centurionibus, turmarum & cohortium ductoribus, tribunisque militaribus ab alterutro duce exercitius longe laxiori potestate, & seueriore disciplina, quam in expeditione publica reguntur. Est autem stipendium trimestre in equitem quidem senum, in peditem vero quaternorum florenorum antiquitus constitutum. Per exiguum id sanè est, nisi in magna alioqui rerum omnium ad victum pastumq; pertinentium copia & vilitate, longè leuius etiam precium rebus venalibus bellica lex imponeret, & charitas patriæ, studiumq; bellicæ virtutis & gloria, & spes adipiscendorum publicorū honorū magis, quam vlla merces iuuentutem multitudine & ocio abundantem ad faciendam stipendia excitaret. In hoc, verò stipendiū publicè confertur pecunia, tributo, quam exactiōem vulgò vocant, agrestibus ac oppidanis, regi iuxta ac nobilitati subiectis, imperato. Quo illi non inuiti agrorum domorumq; suarū vexationem redimunt: si modo redimunt, merce-

Stipendia
equitum &
peditum.

Tributa si-
ue exactio-
nes.

Bb 2 nario-

nariorum etiam militum, non contentorum stipendiis suis, licentia & rapacitate indies magis ac magis progrediente, & nec sacerdotum, nec nobilitatis, atque adeo neque regis ipsius bonis abstinente. Id autem tributum ex agris quidem in laneum seu mansum (certus agri modus is est) ex oppidis verò ostiatim penditur. Quinetiam venalis cuiuslibet potus nomine in oppidis iuxta ac in pagis pensatur. Pendunt & molitores de moletrinis quiddam: & sculteti siue aduocati de suis agris, itemque equites ii, qui nullos habent adscriptitios, & plebei, qui neq; domos, neque agros habent, & arte aliqua, vel opera sua victitant. Doctores, magistri, & scholastici, & qui literarum doctrineque studiis vacant, immunes sunt. Est & aliud quoddam tributum, in magna necessitate aliquando plebi uniuersae, exceptis scholasticis, imperatum: Quod quia de singulis capitibus pendebatur, capitale dictum est. Imponit nonnunquam & ipsa sibi nobilitas cum rege & proceribus tributum de agris, vel de censibus suis pensandum, si usus & necessitas postulet. Non nisi in comitiis autem hac tributa sciscuntur ac decernuntur, & quidem consen-

tienti-

Capitale.

tientibus consiliarus pariter & nunciis terrestribus. Cæterum ecclesiasticus ordo unà cum bonis & hominibus suis iam inde ab initio susceptæ religionis Christianæ non modo militiæ perpetuam, sicuti superius attigimus, vacationem, sed tributorum etiam publicorum immunitatem habet in Polonia. Verum ipse superiori tempore oppidanos & agrestes suos tributis, quæ cæteris imperantur, ultro reipubl. gratia subiecit. Nunc iam pro lege habetur, ut quoties regis & equitum subditis tributum imperatur, nec hi exortes sint. Pensitant ipsi etiam nonnunquam sacerdotes cum Episcopis rogati, urgente necessitate, & charitate patriæ suadente, de suis sacerdotiis certam redituum suorum portionem. Quam pensionem contributionem appellant. Eius verò decernenda ius est penes synodum provincialem. Exigendæ verò penes eos, quibus episcopi cum primario suo collegio in sua quisque diocesi mandauerit. Superiorum autem illorum tributorum, quæ plebi atque etiam nobilitati imperantur, exactio plerunque regis arbitrata, nonnunquam de senatus atque nunciorum sententia per satrapias compluribus imponitur:

Ecclesiastici
ordinis
immuni-
tas.

Quarta re-
giorum
reddituum

Nec diutius id munus durat, quàm ipsum tributum. Dispensatio penes regem ferè est thesaurarium regni manet. Nonnunquam tamen est ipsa alijs comitiorum decreto mandatur. Nuper adeò, excogitata est noua ratio comparandæ in defensionem regni militemq; mercenariū pecuniae. Rex enim benigniss. Sigismundus Augustus quartā partē reddituū regiorum in eum usum perpetuo reipubl. concessit. Quae pacis tempore in fiscum, in arce Rauensi constitutum, deponitur. Atque hac habuimus in praesens, quae de ratione belli, ac de vniuersa republ. Polonica in medium afferremus. Si quid praeterea requiritur, è recentioribus comitialibus constitutionibus petatur. Prussia Regia nobis reliqua est, quae quamuis eodem cum Polonis regno contineatur, tamē quia peculiare consilium publicum, peculiare leges, peculiaria iudicia est comitia, exariumq; est belli gerendi rationem à reliqua Polonia diuersam habet antiquitus, de his nunc separatim persequamur. Nec abs re fortasse fuerit si de ducali quoque obiter attingamus. Igitur ea pars Prussiae, quae nunc ducalis dicitur, ex eo tempore, ex quo deuictis barbaris populis sub iugum Christi

Ducalis
Prussia.

Christi missa est, simul cum episcopis suis Sambienſi & Pomesaniensi ad nostra usque tempora ordini Teuthonicorum Crucigerorum, qui se de hospitali S. Mariae militia Hierosolimitana dixerunt, paruit. Cuius ordinis praeses Magister generalis, socij verò administrationis, & praefecti territoriorum praepostores est commendatores appellati sunt. Qui cum pro amicis & socijs, Polonorum hostes facti essent, armis eorum adacti quodam tempore, una cum episcopis in verba regis Poloni iurarunt, & aliquamdiu maiestatem eius comiter conseruarunt. Sed cum id deinde aliquoties, & ad extremum nostra memoria Alberto Marchione Brandenburgensi Magistro, viro excelsi animi, est rei militaris perito, auctore detrectassent, Sigismundus rex senior, ut se & posteros suos illa perpetua defectionum bellorumq; molestia liberaret, & Poloniam Lithuaniaeque tranquillitatem maiorem prestaret, fratris ijs bello, est ad necessitatem deditiois redactis, est partim decedentibus è Prussia, partim habitu est religione abiecta manentibus, illum ipsum Albertum sororis suae filium singulari clementia pro Magistro Duce in Prussia iussit

Albertus
Marchio
Dux in
Prussia.

Prussia
feudalis
facta.

esse, hereditariumque principatum ipsicum fratribus, & posteris eorum maribus attribuit, ea lege, ut ij in verba regis Poloni ritu solenni iurarent: cum centum equitibus hastatis, quoties & ubi usus postularet, ei militarent: & in senatu regni locum haberent itidem, ac Magister habuisset. Extant pacta conuenta. Ex eo igitur tempore pars illa Prussiae ampla & copiosa, duarumque episcoparum suppressione auctior, sub duce esse coepit, summam omnium rerum potestatem, regi tamen Polono obnoxiam, habente, & arbitrato suo consiliarios sibi legente, & praefecturas, magistratusque mandante. Vtinam quidem is sacra intacta reliquisset. Nec plura nunc de ducali Prussia. Regia vero, ex quo à Crucigerorum imperio ad Polonum nomen (unde ferè detracta erat) ante centum annos sese recepit, recepta ea quidem est à Polonis in societatem iuris, & reipublicae, sed leges tamen suas & instituta à Theutonibus ferè hausta, vel post subactos & ferè extirpatos priscos & barbaros Prussos, de ductione coloniarum è Germania importata retinuit. Consilium quoque à senatu regni se iunctum obtinuit. Habuit etiam initio suum guber-

Regiae Prussiae respública.

gubernatorem, à rege datum. Sed postea suppressus est hic magistratus. Regiam autem appellamus, quae Regi Polonorum immediate (ut vulgari verbo utar) subiecta est. Cuius partes primariae sunt, Culmensis, Marieburgensis, & Pomerania citerior. His annumeratur etiam Varmiensis episcopa. Quae licet Episcopo suo & collegio sacrosuae Capitulo prorsus immediate subiecta sit, nec omnia cum superioribus eius partibus habeat communia: quemadmodum paulò post explicabimus, non segregat tamen sese à Regia, priuilegijs suis utens fruens. Vtitur autem omnis ferè Prussia, ducalis iuxta ac regia, iure municipali, quod Culmense vocatur. Quod tamen non satis certum est in hanc usque diem. Eruitur id quidem è tenebris, & colligitur, sed nondum in lucem prodit. Solae Elbingensis, Brunsbergensis, & Fraumburgensis ciuitates Lubecense amplexae sunt, vel secum fortassis attulere. Et quoniam utrunque id paucis capitibus continetur, in ceteris recurritur ad Saxonicum & Magdeburgense: indeque etiam ad Romanum, quibus de rebus neque Culmensi aut Lubecensi, neque Magdeburgensi & Saxonico

Hist. lib. 27
Leges Prussiae
forum.

Culmense
ius.

Lubecense

Magdeburgense &
Saxonicum.

Cc iure,

Regiae con-
stitutiones

iure, neque plebiscitis ciuitatum, aut constitutionibus regijs cautum est. Dedit enim constitutiones & leges quasdam sapientissimus rex Sigismundus senior, partim toti Prussia Regia, partim Gdanensi ciuitati peculiariter. Easq; auxit optimus eius filius Sigismundus Augustus, cum in ea vrbe esset anno post Christum natum 1552. Quibus conscribendis nos adfuimus. Non ita pridem etiam cum idem rex comitali decreto clarissimos & prudentiss. aliquot senatores ad Elbingensem & Gdanensem ciuitates corrigendorum quorundam errorum, & abusu causa cum summa potestate delegasset, condiderunt ij leges nonnullas, rebus, locis, atq; temporibus accommodatas. Quas nuper is, qui fuit princeps eius legationis, vir amplissimus, Stanislaus Carnouius Vvladislauensis Episcopus in lucem edidit. Vectigalia Regia non ampla sunt in Prussia: Ea q; proueniunt potissimum è ciuitatum pensionibus, agris, & praedijs insularis, & praefecturis: Quarum tamen pleræq; donationibus, venditionibus, & hypothecis in impendia bellorum superioribus temporibus accisæ, aut prorsus alienatæ sunt. Quod itidem aliis quoque

Stanislaus
Carnouius
Episcopus
Vvladislauensis
Vectigalia
Regia Prussiae

que vectigalibus in ciuitatum ius translatis factum est. Verum ea detrimenta crebris tributis, populariter in gratiam regis scitis vel decretis superiori tempore cõpensabantur. Metallorum ea regio ferax non est: Fruges non malignè profert, & linum, & lupulū: easq; merces trans mare mittit. Mittit & materiã fabricandis nauibus & vasis, exornandisq; domibus aptam, & cerã, & cinerem, & bubula coria, imò & carnes. Sed hac ei ferè suppeditat Russia, Samogitia, & Lithuania: Quin & frugum, & aliarum rerum ad victum pertinentium maiorem copiam eadem regiones, & Masouia ceteraq; Polonia ratibus & nauibus fluiatilibus subministrant. Accipit autem ea vicissim transmarinis cõmerciis vina, oleum, aromata, saccarum, sal, & alia condimenta mensarum, telam item & pannos laneos iuxta ac sericeos, & quas praterea mittit Lusitania & India diues cupedias: Ea q; omnia Polonis & Lithuanis Prussia transmittit. Hinc est vulgò simul & nobilitati res lautior, vestitusq; & habitatio cultior. In victu quidè frugalitas prisca adhuc fermè retinetur. Vtinã cõpotationes essent moderatiores. Sed est id commu-

Nascentia
in Prussia-
Prussorum
commerciaPrussorum
viuendi
ratio.

ne vitium Septentrionalium populorum. Ea tamen computationes Prussis ordeacea cereuisia crassiore fermè peraguntur. Vini non magnus est usus. Distinguuntur Prussi, itidem ac Poloni, sacro & profano ordine: nobilitate ac plebe. Sed paulò meliore est conditione plebs in Prussia, quam in reliqua Polonia. Eodem quidè cum nobilitate iure, & iisdem legibus utitur, prærogatiuis modo quibusdam inferior: per quas tamen plebeij neque à bonis terrestribus, neque ab honoribus & magistratibus, neque à sacerdotijs, neque à consilio publico arcentur. Nec nobilitas modesta & frugalis eos dedignatur. Quin decedit ea quoque unà cum sacro ordine nonnihil de immunitate sua reipubl. & concordia gratia. Sacerdotibus iustus honos habetur, à catholicis præsertim. Monachi & monacha, cum nostra memoria præfultore Luthero domicilia sua reliquissent, manent ea etiam nunc propemodum vacua & ruinosa, aliquot exceptis: qua sanè infrequentia sunt, & incolentes ea contemptibiles. Regis potestas in Prussia minus

Nobilitas
& plebs
Prussica.

Ordo ec-
clesiasticus
in Prussia.

Senatus si-
ue consilij
Prussicæ.

est restricta, quàm alibi. Senatus constat duobus Episcopis, tribus Palatinis, totidem Castellanis,

toti-

totidem Succamerarijs, & tribus primarijs Ciuitatibus: quarum non mediocris est potentia. Earum verò bini consules legati siue Nuncij pro singulis habentur, & alternis dicunt sententias. Episcopi sunt, princeps, senatus, & moderator, Varmiensis. In qua episcopa me Pius eius nominis quintus pontifex max. ultro petente D. Sigismundo Augusto Rege, amplissimo Cardinali Stanislao Hosio (ipso libentissimè assentiente) ante sex annos Coadiutorem, ut vocant, dedit, successoremque designauit, & collegium sacrum acceptauit. Sed reuertamur ad institutum. Est ergo princeps senatus Prussici Varmi-

Varmica-
sis & Cul-
mensis e-
piscopi.

ensis Episcopus: Huic proximus Culmensis, qui olim eum anteibat. Quorum hic Teuthonum Crucigerorum opera quodam tempore de Gnesnensi prouincia detractus, Rigensi addictus fuit, vehementer accisus redditibus, & episcopa, ecclesiaq; in ditionem ordinis ipsius redacta: Ille verò, Varmiensis inquam, initio quidem Rigensis Archiepiscopi metropolitancam auctoritatem agnouit, Nunc verò multis annis in nulla prouincia censetur, & soli subest in rebus ecclesiasticis Romano pontifici: Magistri & ordinis do-

Cc 3

mina-

minatum nunquam agnouit, amicitiam & societatem, cum & ipse plerumq; Germanici esset sanguinis, libenter coluit: nec sine malo ac detrimento suo, & ecclesiae suae. Ad regnum verò Polonia post reliquam Prussiam peculiaribus pactis cum rege *Caſimiro* initis sese adiunxit. *Vladislauensis* Episcopus habet non contemnendas possessiones in *Pomerania*. Atque ea tota ferme in diocesi ipsius est, indeq; *Pomeraniae* quoq; Episcopi titulum is usurpat, sed ad *Prussicum* consilium non pertinet. *Palatini* sunt, *Culmensis*, *Marieburgensis*, qui ante hac *Elbingensis* dictus fuit, & *Pomeranicus*: *Castellani*, *Culmensis*, *Elbingensis*, & *Gdanensis*: *Succamerarii* itidem atq; *Palatini*: *Ciuitates*, *Torunensis*, *Elbingensis*, & *Gdanensis*, in singulis satrapis siue palatinatibus singula, eundem ordinem seruantes inter se in consilio, quem sui *Palatini*. Hoc est consilium *Prussicum*. *Consiliarios* terrarum *Prussiae* vocant: Quos & ipsos more aliorum iuratos esse oportet. *Varmiensis* tamen Episcopus diuersam ab aliis iurandirationem & formulam pacto praescriptam habet. Nam is, si Rex est in *Prussia*, ipso praesente: Sin minus, nonnullis magistratibus

Vladislauensis Episcopi iuramentum.

Varmiensis Episcopi iuramentum.

MART. CROM. LIBER II. 195
tibus *Prussicis* ad id delegatis in arce *Marieburgensi*, praesente verba aliquo Episcopo, iuratur. *Ciuitatum* delegati iniurati ad consilium admittuntur, aliquone privilegio, an per abusum, nescio. Habent autem consiliarii *Prussici* sua loca, & ius dicendae sententiae in amplissimo totius Regni *Polonici* consilio. Verum ea loca ante aliquot annos post auctum *Lithuanorum* accessione senatum aliqua ex parte variata sunt, ita tamen, ut nihilominus Episcopi inter Episcopos, *Palatini* inter *Palatinos*, *Castellani* inter *Castellanos* consideant. Ad calcem operis huius ea singula secundum nouam constitutionem committalem inter alios notata sunt. *Palatinorum* iurisdictionis & auctoritas in *Prussia* maior est, quam in caetera *Polonia*: Penes eos sunt multa, & supplicia delinquentium, rerumque iudicatarum executio. *Tranquillitatem* quoque publicam in agris & extra urbes praestant. *Castellani* & *Succamerarii* eodem sunt iure, quo in *Polonia*. De Episcopis paulo post dicemus. Praeter hos autem magistratus, habent *Prussi* thesaurarium, praefectos arcium, siue capitaneos, gladiiferos, iudices, & scabinos: verum non pertinent

Consiliarii *Prussiae* ad Senatū Regni pertinent.

Palatinorum potestas.

Magistratus *Prussici*.

Theſaurarius ad conſilium. Theſaurarius eſt, qui pecuniam omnem & rationes à præfectis & adminiſtris regionum bonorum & prouentuum atque etiam tributorum publicorum exigit, & vel ipſe adminiſtrat, vel theſaurario Regni tradit. Olim iſ Oeconomus fuit ſeu procurator Marieburgenſis. Gladiferos ſingulos habent Culmenſis & Pomeranica ſatrapia. Iudices nouem ſunt. In Culmenſi quidem & Marieburgenſi ſatrapijs ſinguli: in Pomeranica uerò ſeptem, nempe totidē, quot territoria. Sunt autem ea, Slochouienſe, Tucholienſe, Suecenſe, Derſauienſe, Zucouienſe, Puſcenſe, & Mirachouienſe: Habent que ſinguli iudices in conſilio ſcabinos iuratos aliquot. Præfecti, arcium & reddituum regionum in ſua quiſque præfectura curam & adminiſtrationem habent: Iuriſdictionem nullam fermè habent, præſertim in nobilitatem, neque in oppidanos amplam: In agreſtes ampliorem. Solus Marieburgenſis neque reddituum regionum curam gerit, neque in agreſtes iuriſdictionem habet: arci modo præeſt, eiſque præſidio: quod perpetuum eſt. Caterum conſtitutione quadam, ampliores iſ cateris præfectis & magiſtratibus prærogatiuas

Theſaurarius.

Gladiferi.

Iudices.

Pomerania territoria.

Præfecti.

Marieburgenſis præfectus.

tiuas habet, uelut generalis locum tenens Regis in Pruſſia. Reddituum uerò & ſubditorum regionum, & ſartorum tectorum eius ipſius arcis curationem habet theſaurarius. Igitur primaria totius Pruſſiæ præfectura Marieburgenſis eſt: Cui Polonus antiquitus præſicitur: Nunc primus de Pruſſiis, è Polonia tamen oriundus, ei præeſt, uir uigilantiſſimus, & omni genere uirtutum ornaſſimus, mihi que amiçiſſimus, Ioannes Coſtka, nuper, Palatinus Sendomiriensis à Rege Henrico creatus. Secundum hanc in eadem ſatrapia ſunt hæ præfectura, Stumenſis, Gneuensis, Nouensis, & Stargardensis ſive Starigrodensis. In Culmenſi, Brodniciensis, Grudentina, Radinensis, Golubensis, Rogoſnensis, Brathianensis, Coualiensis, Copriouensis: In Pomeranica, Slochouiensis, Suecenſis, Tucholiensis, Derſauienſis, & Puſcenſis. Torunenſem uerò, Elbingenſem, & Gdanenſem præfecturas ciuitates ipſe ſibi regia indulgentia, & ex pacto uendicarunt, & per magiſtratus urbanos adminiſtrant. Episcopi cum collegijs ſuis ſuos & ipſi habent arcium atq; territoriorum præfectos & burgrabios, ſuosq; iudices, & aduocatos, & op-

Ioannes Coſtka palatinus Sendomiriensis.

Præfectura Pruſſicæ.

Dd pida-

Varmiensis
diocesis
ius &
prærogati-
ua.

pidanos magistratus. Habent & Cancellarios,
& officiales suos in causis ecclesiasticis uterque
Episcopus. Habent enim utranque iurisdictionem
& amplissimam potestatem in suis. Varmiensis
quidem episcopa in nulla censetur satrapia: Vno
autem, & non interpolato ambitu in modum prin-
cipatus bona certis finibus peculiariter circum-
scripta, & arcibus atque oppidis exculta habet:
Eaque sic diuisa, ut duas partes Episcopus, tertiã
collegium siue capitulum obtineat. In his utriusque
subiectam nobilitatem habent, & liberam iuris-
dictionem, ab omni Regionum magistratum
iurisdictione exemptam. Præterea pertinet etiã
Elbingensis ciuitas cum suo territorio ad Var-
miensem diocesim: Quamuis iam aliquamdiu
heretica labe infecta conniuentibus regibus, &
suffragantibus nonnullis magistratibus, ab ec-
clesiastica Episcopi iurisdictione sese subtrahere
nitatur. Bartena quoque terra & Natangia ante
200. annos eiusdem episcopi iurisdictioni subiecta
fuisse, & supra sex millia mansorum tunc Epis-
copo Varmiensi per fraudem & iniuriam Cruci-
ferorum detracta esse memorantur. Subditi e-
piscopi & collegij Varmiensis eodem, quo ceteri
Prussæ

Prussi iure municipalit utuntur: Sed habent etiã
peculiaria, inter se autem cõmunia instituta: Qua
Lands ordnung hoc est, terra constitutiones vo-
cant. Conuentus etiam communes habent. Ad
eos autem nobilitas, ciuitates, & sculteti cum li-
beris (de quibus postea dicemus) euocati, pro se qui
que binos vel plures etiã à singulis territorijs pro-
curatores siue legatos mittunt, ijs de rebus, qua
in consultationem veniunt, cum episcopo & le-
gatis collegij constituturos. Ceterum ea nobilitas
omnis, & aduocatus, & ciuitates, propter iusiurã-
dum, quo partim in episcopi, partim in sacri colle-
gij verba iurant, nouo quoque Regi, ac deinde
decimo quoque anno ei ipsi ex pacto fidem suã ob-
stringunt. Tamen si de 10. anno in desuetudinẽ abi-
it, sublata causa, hoc est, pacatis prorsus rebus Prus-
sicis, & extirpato ordine Teuthonica militia.
Iurant etiã sacerdotes, quando certum aliquod sacer-
dotium adipiscuntur: Primarium tamen, qui prelati &
Canonici cathedr. appellatur, intra mensem, po-
stea quæ in id collegium cooptati sunt. Eos autem pontifex
quidem max. creat, collegium verò unã cum Episcopo
eligit alternis mensibus: Excepto Prapposito, qui à
Rege editur, siue presentatur, ab episcopo proficitur

Canonicorum
& Prae-
latorum
Varmiensis
creatio.

Sed neque is, neque cæteri tres prælati locum & suffragium habent in collegio, siue capitulo, nisi sint etiam canonici. Culmensis ecclesia collegium ad quatuor canonicos redactum est. Qui singuli à cæteris unà cum episcopo cooptantur. Ipse autem episcopus à solo rege designatur, à pontifice max. creatur. Cæterum Varmiensis ex pacto recentiori è quatuor canonicis indigenis à rege propositis, unus ab eius ipsius ecclesie collegio deligitur: deinde hic quoque à pontifice renunciatur, & confirmatur. Ac tum demum sacris pontificalibus ad præscriptum ecclesiasticorum canonum initiatur. Magistratus terrestres in Prussia quoque, itidem ac in Polonia, à rege creantur: Iudex tamen ex aliquot à Palatino cum dignitarijs & cætera nobilitate de confessu scabinorum delectis, ab eo editur: Scabini soli à palatino cum cæteris dignitarijs illius loci creantur. Sunt autem & Prusici magistratus omnes perpetui, præter præfectos: qui regis arbitratu mutari possunt, nisi beneficio ac diplomate regio sibi prospexerint. Ciuitates à decurionibus seu consulibus, & quidem Germanicæ linguæ & sanguinis (Polonos enim pro externis habent, & neque

Episcoporum Prussici designatio.

Magistratum Prussicorum cõferendorũ ius.

Ciuitatum Prussicarũ magistratus & administratio.

que ad artes mechanicas perdiscendas admittunt) reguntur: Quorum non idem ubique, certus tamen est numerus. Et ipsi ius habent cooptandi, quos volunt, in sua collegia, quoties vacat locus, eoque maiore sunt dignatione & auctoritate, quando volunt, & obsequentio rem habent plebem. His præsent magistri ciuium, à decurionibus, ac de numero ipsorum delecti, & ipsi, itidem atque decuriones perpetui, in primarijs quidem urbibus quaterni, in cæteris vero oppidis bini, per vices annum gerentes magistratum. Habent item singulæ ciuitates iuratos iudices, siue scabinos, qui à decurionibus siue consulibus leguntur: Et ipsi autem perpetui sunt, nisi fortè in numerum consulum cooptentur. Neque enim eundem consulum & scabinum esse licet, præter Elbingam & Brunsbergam: ubi pars consulum loco scabinorum iudicia exercet. Cæterum unus è consulibus eis præficitur, quem scultetum vel iudicem vocant. Primariæ tres ciuitates etiam præfectos habent singulos, ut dudum memorauimus, quos vocant burgrabios, & eos quidem annuos ferè: Qui tranquillitatis urbanae, ac totius territorij curam gerunt, cau-

Consules.

Magistri ciuium.

Scabini.

Scultetus.

Burgrabij ciuitatum.

fasq; priuatarum iniuriarum & sanguinarias iudicant, & pro iis multas irrogant. Hunc solum magistratum rex in ciuitatibus creat, sed non nisi unum è sex vel octo è numero consulum eiusdem ciuitatis ab ipso collegio delectis, iidem autem consules ex omni ciuium numero, Gdani quidem centum viros, alibi verò pauciores deligunt, qui sint capita multitudinis, & quasi tribuni plebis: cum quibus communicant nonnunquam consilia de republica, & ex ijs cognoscunt postulata plebis. Vitantur enim coitiones multitudinis, propter externorum omnis generis hominum frequentiam, nequando in seditionem erumpant, ut nonnunquam factum est. Iudicia nobilitatis iudices terrestres cum suis scabinis, presidente palatino, bis quotannis exercent in certis oppidis. Infamiae tamen causa, & status controuersia, itidem ac in Polonia, ad regis iudicium pertinet. A terrestribus iudicijs prouocatio est ad consiliarios Prussiae: inde verò ad Regem. In oppidis verò iudiciaria potestas fere omnis est penes consules, exceptis paucis causis, quarum mentionem dudum fecimus, & si qua sunt aliæ ad burgrabios vel

Capita multitudinis.

Iudiciorum ratio.

Iudicia urbana.

vel palatinos pertinentes. Sed eam ipsi consules: quod ad priuatorum hominum inter ipsos controuersias attinet, cum iurato iudicio, cuius mentionem dudum fecimus communicarunt. Ab eo verò iudicio in primarijs quidem ciuitatibus ad consules ciuitatis cuiusq;, in ceteris autem oppidis ad consilium totius Prussiae: inde porò utrinq; ad regem prouocatur. Rex verò de quibusuis prouocationibus ubilibet, & cum quibus vult cognoscit. Plerunq; etiã cognitione delegat Cancellariis & iureconsultis. Alioqui priuatũ neminem è Prussiae regi euocare licet, exceptis iis causis, quæ sunt fisci, & iudicii regi propria. Magistratus terrestres iuxta ac urbanos euocat de iis duntaxat, quæ in magistratu perperam & p̄ter officium suum egerint: vel, si mauult, consiliariis Prussicis eas delegat, in comitijs cognoscendas. Delegat etiã vel iisdẽ, vel quibus vult, causas fisci sui, finium regundorũ cum suis bonis, ac diuidenda inter fratres & cognatos hereditatis: Quas is itẽ alias ab aliis ordinariis iudicibus p̄ prouocatione ad se deuolutas. Comitibus bis quotannis habetur in Prussia statis temporibus Maio q̄dẽ mense Marieburgi, Septembri autẽ extremo Grudeti.

Prouocationum ratio.

Comissaria iudicia.

Comitia Prussica.

Ex iustis tamen causis ea quoque loca mutari possunt. In ijs comitiis à consiliariis de republ. in commune consultatur, siue ultro, siue ex praescripto regio: de prouocationibus terrestrium & oppidanorum iudiciorum cognoscitur: & omninò iudicia vel à rege delegata, vel si qua sunt alia, exercentur. Cum ducalibus quoque Prussis, seu ducis ipsius legatis nonnunquam Elbinge ex fœdere, vel Marieburgi, constituta certa die, conuentus habentur, & consultationes de legibus, & aliis rebus communibus, & controuersis. Non ita pridem in Prussia quoque nuncii nobilitatis & minorum ciuitatum in comitiis adhiberi cœperunt, tributi sciscendi causa: cuius decernendi potestatem neque rex, neque consilarii soli usurpant. Ad regni quoque comitia nuncii nuper adeò mitti cœperunt. Sciscitur autem cereuissarium tributum plerunq; in usus publicos, vel in gratiam regis: vocaturq; id vulgò cisa vel accisa. Nonnunquam etiam de censibus, agris, domibus, bonis, & facultatibus, aestimatione facta, certa portio pensitanda decernitur. Varmiensis episcopa subditi nihil habent negotii cum comitiis. Solutus iis interest, & praest Episcopus,

Nuncij.

Tributum
apud Pruf-
tos accisa.Varmien-
sium liber-
tas.

ac

MART. CROM. LIBER II. 205
ac deinde de ijs, qua ibi constituta sunt, ad peculiarem conuentum suorum refert: de tributo praesertim. Nec temerè ij dissentire solent ab episcopi sui & conuentus Prussici sententia. Nihil tamen vetat, ipsos quoque arbitrati suo, auctoritate episcopi & Capituli praesente, peculiare leges, & ut vocant, ordinationes sibi condere, tributumq; sciscere. Quinetiam magistratus primariarum ciuitatum non rarò imperant ciuibus suis tributum peculiare, & operas, aliaq; onera in usus publicos urbium suarum, adhibitis capitibus plebis. Portus maris tres habet Prussia, Regia quidem Gdanensem & Elbingensem, Quorum hic in Habum lacum, ille rectà in mare procurrit: ducalis verò Regiomontanum siue Kœnixbergensem, quà Pragola fluiuis in Habum influit. Atque hic quidem cum portorij & omni iurisdictione & impendijs in ducis, duo verò reliqui in ipsarum ciuitatum, quibus adiacent, & magistratus potestate sunt. Verum ista tamen, magistratus inquam, sine permissu vel mandato regio claudendi & aperiendi portus potestatem non habet. Quod de tributo quoq; decernendo itidem nuper constitutum est. Quod ad

Ee bellum

Portus.
Prussic.

Belli ratio
apud Pru
cos.

Liberti.

bellum attinet, si qua vis hostilis ingruat Prussia, domesticis communibusq; plebi cum nobilitate viribus depellitur. Ac nobilitas quidem cum proceribus equestris militat, Sculteti item & liberi: (Quos ita vocant, propterea quod & ipsi ab operis & laboribus, quos rustici dominis suis præstant, gratuitam immunitatem habent, medijs quodam modo inter nobiles & rusticanos agricolas: Ferunt tamen nonnulla onera extra ordinem) Ciuitates equitatum atque peditatum suppeditant: Rustici peditatum tantum. Hæc ante institutam coadunationem (quæ necdum maturuisse videtur) de Prussia, & in vniuersum de Polonia nobis ^{σάφ' ἔργον}, quod a iuribus ^{καὶ} ^{ἐκ} ^{μαθήσεσθαι} sunt exposita. Quæ cum ciuibus nostris, tum externis non ingrata fore speramus.

Sic autem fiet, ut minus peregrinentur in historia nostra.

FINIS.



PERÆ præcium nobis visum est, coronidis loco hic adijcere nomenclaturas & ordinem amplissimi Senatus Regu, quemadmodum in comitis Lublinensibus ante quatuor annos constitutus est, & nonnihil ab antiquo (quem priore libro recensuimus) mutatus, posteaquam Lithuani sese cum Polonis penitus coniunxere, & in vnum reipublica corpus coaluere. Qui tamen ordo non tam accuratè in confesso, quàm in dicendis sententijs, & ferendis suffragijs seruatur.

Ee 2

Senato-

Senatorum Regni Poloniæ cum coniunctis
ei ditionibus dignitates & ordo, secun-
dum constitutionem Comitalem
Lublinensem, anno M. D.
LXVIII. editam.

Archiepiscopi duo.
Gnesnensis.
Leopoliensis.

Episcopi 13.
Cracoviensis.
Vladislaviensis.
Vilnensis.
Poznaniensis. } *alternatim.*
Plocensis. }
Varmiensis. } *alternatim.*
Luceoriensis
Præmislensis
Samogitiæ siue Mednicensis
Culmensis
Chelmenfis
Kiouienfis
Cameneensis

*Palatini cum quibusdam alijs exi-
mjs inter eos inuertis 35.*

Castellanus Cracoviensis.
Cracoviensis.
Palat. } Poznaniensis.
Vilnensis.
Sendomiriensis.
Cast. Vilnensis.

Palat. } Califfiensis.
Trocentis.
Siradiensis.
Castel. Trocentis
Palat. Lenciciensis
Capitaneus Samogitiæ
Brestensis
Kiouienfis
Iunivladislaviensis
Ruffia
Volynensis
Podolia
Smolenscensis
Lublinensis
Polocensis
Belsensis
Palat. } Nouogrodensis
Plocensis
Vitepscensis
Masouia
Polesensis siue Pod-
lassenfis
Rauensis
Brescensis
Culmensis
Mscislaviensis
Marieburgensis
Brasla-

Castellani minores 49.

{ Braslaviensis
Palat. } Pomeraniæ
Minscensis

Castellani maiores 30.

Poznaniensis
Sendomiriensis
Califfiensis
Voiniciensis.
Siradiensis
Lenciciensis
Samogitiæ
Brestensis
Kiouienfis
Iunivladislaviensis
Leopoliensis
Volynensis
Cameneensis
Smolenscensis
Lublinensis
Polocensis
Belsensis
Nouogrodensis
Plocensis
Vitepscensis
Czernensis
Polesensis siue Podlassenfis
Rauensis
Brescensis
Culmensis
Mscislaviensis
Elbingensis
Braslaviensis
Gdanensis
Minscensis

Sandecensis
Medirecensis
Visliciensis
Biencensis.
Rogoznensis
Radomiensis
Zauichostenfis
Landensis
Sremensis
Zarnouiensis
Malogostenfis
Velunensis
Præmislensis
Califfiensis
Sanocensis
Chelmenfis
Dobrinensis
Polanecensis
Præmentensis
Criminensis
Czechouiensis
Naclensis
Rospirensis
Biechouiensis
Bydgostiensis
Brezinensis
Cruficiensis
Osuienzimensis
Camienensis
Spicimiriensis
Inovulodensis
Coualiensis
Santocensis

Et 3

Socha-

Sohaciouensis
 Varfauensis
 Gostinensis
 Vifnensis
 Raciaznensis
 Sieprensis
 Viflogrodensis
 Ripinensis
 Sakrocziensis
 Ciechanouensis
 Liuenfis
 Slonensis
 Lubaciouensis
 Conariensis in Siradiensis Palatinatu
 Conariensis in Lencienfi
 Conariensis in Iunivuladislauensis.

Officiales Curia 10.

Maresalcus Regni Poloniæ
 Maresalcus Lithuanie
 Cancellarius Poloniæ
 Cancellarius Lithuanie
 Vicecancellarius Poloniæ
 Vicecancellarius Lithuanie
 Thefaurarius Poloniæ
 Thefaurarius Lithuanie
 Maresalcus Curia Polonica.
 Maresalcus Curia Lithuanica.

I. Brabantia
 II. Flandria
 III. Mithra
 IV. Frieslandia
 V. Hollandia
 VI. Zeelandia
 VII. Brabantia
 VIII. Flandria
 IX. Mithra
 X. Frieslandia
 XI. Hollandia
 XII. Zeelandia
 XIII. Brabantia
 XIV. Flandria
 XV. Mithra
 XVI. Frieslandia
 XVII. Hollandia
 XVIII. Zeelandia
 XIX. Brabantia
 XX. Flandria
 XXI. Mithra
 XXII. Frieslandia
 XXIII. Hollandia
 XXIV. Zeelandia
 XXV. Brabantia
 XXVI. Flandria
 XXVII. Mithra
 XXVIII. Frieslandia
 XXIX. Hollandia
 XXX. Zeelandia



